

萬有文庫
第ニ集七百種
王雲五主編

宋詩紀事

(七)

厲鴻馬曰增輯

商務印書館發行



宋詩紀事

(七)

馬鵠屬曰琯輯

國學基本叢書

庫文有萬

種百七集二第

者纂編總
五雲王

行發館書印務商

宋詩紀事卷四十

錢唐厲鶚緝

仁和顧之麟
王瀛洲勘定

李保

保政和中醫學博士

題朱翼中北山酒經并序

大隱先生朱翼中壯年勇退著書釀酒僑居西湖上而老焉屢朝廷大典醫學求深于道術者爲之官師乃起公爲博士與余爲同僚明年翼中坐東坡詩貶達州又明年以宮祠還未至余一旦夢翼中相過且誦詩云投老南遷愧轉蓬會令淨土變夷風由來只許杯中物萬事從渠醉眼中明日理書帙得翼中北山酒經法而讀之蓋有禦魑魅于煙嵐轉炎荒爲淨土之語與夢頗契余甚異乃作此詩以志之他時見翼中當以是問之其果夢乎非耶政和七年正月二十五日也

赤子含德天所均日漸月化滋澆淳惟帝哀矜憫下民爲作醪醴發其眞炊香釀玉爲物春投醕酴米授之神成此美祿功非人酣適安在味甘辛一醉竟與羲皇鄰薰然盈腹皆慈仁陶冶窮愁孰知貧頤德不獨有伯倫先生作經賢聖分獨醒正似非全身德全不許世人聞夢中作詩語所親不願萬戶誤國恩乞取醉鄉作封君續北山酒經

蓋

嶼

嶼政和中崑山令。

讀沖邈翠微集

聖宋吟哦只九僧詩成往往比陽春翠微閣上今朝見格老辭清又一人。中吳紀聞

元

勛

字不伐陽翟人政和閒知寧國縣事。

山門靈巖

諸山深窟宅石門限塵寰空洞初不礙風扉敞雲關高廣幾何許百夫可回環誰託遺蹟在冥濛煙霧間羽駕此來往朝昏想清班西風翠屏近藤蘿莫容攀因循再閱歲□見亦以艱忻茲固殊特獨冠江南山少陵惜未到我語憑誰刪寧國府志

吳

沆

沆字德遠撫州崇仁人政和中與弟澥各獻所著書澥得免解沆抵廟諱罷歸隱居環溪號無莫居士有環溪詩話

和友人趨寧化

聞君早晚趨寧化尙有新詩別故人試問幾程端可到還憂半載不相親傷心歲律峥嵘暮解事梅花摘索新去去冰霜頻莫厭庭闈和氣卽如春環溪詩話

春遊吟

鳥語煙光裏。人行草色中。池邊各分散。花下復相逢。

環溪詩話李待制云。

此所謂詩中有畫。

首夏

積雨有餘潤。游雲無定陰。燕飛華屋靜。鶯囀碧窗深。

環溪詩話此詩

殊有富貴氣象。

句

聖主思文德。元臣獻武功。一言深悟意。五利且和戎。沈給事云是使事。天地包羞日。山河匿怨中。給事云太逼。儒生別有淚。不是哭窮途。給事云作詩當如此。氣祲埋金闕。塵沙暝梓宮。古來嘗膽事。泣血望羣公。給事云好。

語 環溪詩話

吳

濤

濤字德劭。崇仁人。沆之伯兄。

在官院日作

時乖事轉掘。端居徒含情。不似墮前草。春來隨意生。

絕句

遊子春衫已試單。桃花飛盡野梅酸。怪來一夜蛙聲歇。又作春風十日寒。

環溪詩話。予伯兄德勸作詩。磨礲圓淨。都無病處。
方休在官院日。小詩并一絕句。最爲含蓄有氣象。

吳、沈

沈字德強。崇仁人。沈之仲兄。

暮春回文

嬌聲嚬處藏鸚小。美睡濃時落日斜。橋拂柳溪深漲水。眼驚春雨亂飛花。

環溪詩話。仲兄

詩從蘇黃中入

句

日長人靜聞風佩。久雨堂空生水衣。簷飛謝女雪。徑埽沈郎錢。和發青亭寫處定移牆上影。捲來如寄隴頭春。
墨梅。朱脣不駐曉妝薄。玉頰頻啼夜雨翻綠萼梅。花覺青春半。山將白晝陰。夢過一年還是。心更萬事竟成灰。環溪詩話。

徐端崇

端崇字崇之。璿子。政和閒隱居樂兒。

春渚紀聞東坡帥杭日與徐璣全父坐雙榆堂公指二榆曰二疏辭漢去璣應聲曰大老入周來公爲擊節久之繼而其子崇之亦復少年俊偉落筆千字有人得山谷道人清江詞示之崇之曰山谷當今作者所知漁父止此耶或請爲賦援筆立就識者奇之其末云魯邦司寇陳義高三闊大夫心徒勞相逢一笑無言說去宿蘆花又明月識者奇之

爲蟲所擾得一絕句

空堂夜合勢如雲溝壑寧知過去身滿腹經營盡膏血那知通夕不眠人

春渚紀聞時蔡京引用小人賦外

橫斂崇之此詩殆託以規諷云

方元脩

元脩字時敏桐廬人元英先生之後殿中侍御史蒙之子政和初審察監大觀庫後通判濬州

奉同程致道著作次鮑溶冬成答客韻送趙叔問奉議歸南都

宋文鑑
清秋不相借白髮日更多塵埃困煩促原野懷經過聊當倚滴潤資以生吾禾豈不念離羣驚鵠寧釋策王孫別都去澹若依松蘿暫別亦復難賡詩飲無何我行聊爾爾渺邈踰江河臘須□佳句相我滄浪歌

翁挺

挺字士特崇安人彥約子政和中以季父彥國恩補官調宜章尉朝臣交薦改授少府監終尚書

考功員外郎號五峯居士有集

讀許太史祭黃長睿文

祕書丹旐返旅殯尙丹陽海路三山遠江流萬古長交情惟太史傳業冀諸郎誰與銘泉壤臨文淚數行

曾

續字元嗣政和閒人

贈呂居仁

呂家三相盛天朝流澤于今有鳳毛世業中微誰料理卻收才具入風騷

紫微詩話

曾

繹字仲成

還家塗中

疎林殘嶺起昏鴉臘盡行人喜近家江北江南春信早傍籬穿竹見梅花

墨莊漫錄

左 緯

緯字經臣黃巖人政和中以詩鳴有委羽居士集

石公弱跋云經臣之詩六義之雋也

委羽山

委羽不知何處是。情人扶上木蘭橈。欲尋去路花梢密。爭認行雲酒浪搖。流水忽隨山腳轉。洞天疑把杖頭挑。逡巡不覺東風晚。殆有仙人弄玉簫。

石新婦山

煙蘿爲髻霧爲巾。獨立江邊經幾春。無故被人呼作婦。不知誰是畫眉人。以上赤城志

許少伊被召追送至白沙不及

短棹無尋處。嚴城欲閉門。水邊人獨自。沙上月黃昏。

詩人玉屑此二十字可謂道盡惜別之情至今使人黯然魂消

春晚

池上柳依依。柳邊人掩屏。蝶隨花片落。燕拂水紋飛。試數交遊看。方驚笑語稀。一年春又盡。倚杖對斜暉。
後村千家詩

臨海崇教寺

只把山爲界。紅塵自此分。竹窗吟聽雪。苦石坐看雲。意靜詩先到。心清道自聞。深慙王許輩。猿鶴舊同羣。
輿地紀勝

梅花

幾度尋春信。空歸及暮鴉。試搖枝上雪。恐有夜來花。望月穿深塢。迎風立淺沙。若同桃李發。誰肯到山家。

送別

騎馬出門三月暮。楊花無賴雪漫天。客情惟有夜難過。宿處先尋無杜鵑。以上詩林萬選。

天台道中

亂山深處是仙家。海變桑田日未斜。爲有慈親倚門望。卻愁溪上見桃花。天台山志。

句

一別又經無數日。百年能得幾多時。

赤城集委羽居士集黃裳序政

和癸巳陳璫跋稱其招友句云

荆溪林下偶談。陳了翁喜左經臣此句。以爲非特辭意清遠。可玩味也。老於世幻。逝景迅速。讀之能無警乎。然此乃古人已道之句。戴叔倫寄朱山人云。此別又萬里。少年能幾時。杜荀鶴送人遊江南云。能禁幾度別。卽到白頭時。但經臣語尤婉而不迫爾。

巢禽先覺曉。穴蟻未知霜。落葉。荆溪林下偶談。

孫邦

杭州人。宣和元年進士。官郎中。

唐氏林亭在新城

華屋沈沈野外居。茂林清蔭繞門閨。移花植果心無事。抱子弄孫歡有餘。閑過西疇觀利穫。嬾尋南郭命巾車。問君爲圃嗟予晚。便擬歸休學二疏。咸淳臨安志

何宏中

宏中字定遠。先世居雁門。宣和元年武舉廷對第二。調滑州韋城尉。後爲河東河北統制。有成真通理二集。

齊東野語。定遠爲韋城尉。汴京被圍。獨韋城不下。後爲兩路統制接應副使。以糧盡被禽。金人憐其忠。授之以官。定遠投牒于地曰。我嘗以此物誘人出死力。若輩乃欲以此嚇我耶。囚西京獄。久之免爲黃冠。自號通理先生。起紫微殿。遷徽宗東華君御容以事之。

後病歿。

臨終作

馬革盛屍每恨遲。西山餓死亦何辭。姓名不到中興歷。自有皇天后土知。齊東野語

程俱毛隨

俱字致道。開化人。以外祖鄧潤甫蔭入仕。宣和二年賜上舍出身。高宗朝擢中書舍人。兼侍講罷提舉江州太平觀。除徽猷閣待制。卒有北山集。

石林葉氏曰。致道詩章兼得唐中葉以後名士衆體。

穹窿葬事回邑有感

生別萬里餘，會面終有期。
死別不轉眸，一朝千古非。
白日光在天，元陰闕泉扉。
盈盈閨中秀，土化成枯骞。
冠笄共甘苦，謂見素髮垂。
那知生死變，不待桑蔭移。
室有病時茵，篋有嫁時衣。
了了眼中事，閑妝靜容儀。
垂楊手曾折，爲我當春稀。
迅流無迴波，落英無還枝。
空房閨無迹，新墳草離離。
傷心北門道，同來不同歸。

善權洞

嘗聞包山境，中有林屋天。
旁通號地脈，岳瀆潛鉤連。
茲山豈其類，湧洞皆中穿。
二巖岌山足，琤淙激奔泉。
牛羊走大石，吐受無窮年。
金堂下石液，雪積如烹煎。
從來米鹽稱，浪播里俗傳。
一洞啓山腹，穹窿亦聯縣。
誰題九斗字，大篆仍深鐫。
中藏丈五百，屹若龍騰淵。
謂仲嘉回頭問主人。
我輩定非凡，云何逐官牒。
常得我所耽，向來共幽討。
九鎖藏芝巖，而我自林屋。
翩然游皖濶，洪崖儻可俯。
不在南山西。

詠勸酒胡

簿領青州掾，風流麴秀才。
長煩拍浮手，持贈合歡杯。
屢舞回風急，傳籌白羽催。
深慙偃師氏，端爲破愁來。

墨莊漫錄飲席刻木爲人而銳其下置之盤中左右欹側微微然如舞狀久之力盡乃倒。
視其傳籌所至酬之以杯謂之勸酒胡或有不作傳籌但倒而指者當飲程致道詩云云。

和張敏叔遊滄浪亭

醉倒春風載酒人，蒼鬚猶想見長身。
試尋遺址名空在，卻笑張羅事已陳。
稍置曲欄穿徑竹，別開高閣俯汀蘋。
拏舟更欲陪清賞，要看毫端藻繪春。

南園

王子池臺迹已荒。年來華構壓高岡。長林不礙千山月。老榦猶含九夏霜。便覺平泉冠東洛。還依綠水記南塘。蝸廬卻喜通幽徑。岸幘時來一嘯長。

葺蝸廬吳下

四海無廬著此翁。故營松竹儘囊空。明知計出栢馬下。正擬身全木雁中。東郭易成生草舍。南村先怯卷茅風。向來豪氣今如此。敢與元龍較長雄。

九日寫懷

節物驚心兩鬢華。東籬雖繞未開花。百年強半仕三已。五畝就荒天一涯。豈有白衣來剝啄。亦從烏帽自敲斜。真成獨坐空搔首。門柳蕭蕭噪暮鴉。

龍尾硯同毛彥時隨聯句

歛水清以駛。歛山文且堅。程誰持玉斧琢。製此月樣圓。想當結繩後。要使鳥跡傳。雕鏤見骨格。豈與瓦礫全。毛坡陁百氏圃。澄泓九經淵。墨海不復見。柯嵒那可肩。星稀涵緯象。眉綠生春妍。程規模異鎔鐵。濡寫殊懷鉛。正當秋兔穎。發此霜松煙。毛一從毛楮游。幾作蟲魚箋。徵辭想妃子。搘首懷張顚。寧同李生瘞。聊續胡公鐫。程常疑老蚌殼。浸潤成膏研。毛堅逾鵝池鑄。質射銅臺挺。紛紛況多僞。渴雀同梔鞭。程琳坳隱多水。十手寄所宣。池光澈墨色。雲氣開毫聯。翔鸞及垂露。逸勢徒飛騫。毛誰云過珪璧。或用磨戈鋌。吾今欲焚棄。負未歸園田。程以上北山集

遊大滌

太湖隱吏疎且頑。手板拄頰看西山。
筆牀茶竈向何許。往來洞庭林屋閒。
側聞餘杭隱大滌。故整煙艇尋
苕川。相從喜得二妙士。金庭老客南昌仙。
早行不憚踏曉月。逸思自覺奔春泉。
岡迴澗轉若無路。但見老
翠漫秋煙。中峯一柱萬山表。勢與太華爭擎天。
神仙古洞絕壁下。蓬萊別館青雲閒。
天壇無人石室冷。借問白鶴何時還。
人生但爲形體累。會當去之如蛻蟬。
金庭客南昌仙。他時待我乘八景。舉手少別三千年。

洞霄詩集

胡程

程字德輝。晉陵人。宣和三年進士。紹興初史館校勘。出守嚴州。有蒼梧集。

楊誠齋序云。陳少陽上書德輝視其草。投畀蒼梧。召用爲郎。又以參政李公泰發之客見惡於秦丞。相坐廢餓寒困窮以死。

天慶觀觀畫龍

道人龍中來。醉與神物會。寫茲蜿蜒質。日月爲冥晦。
崩翻江海姿。素壁起濤瀨。呼吸見雌雄。抉石疑可碎。
蕭森殿陰古。衆真儼飛旆。注觀恐騰躍。夜半失像繪。
飛光者明珠。靈祕一何怪。爛爛照甍棟。那得久在外。
偷兒伺酣睡。不怕嬰鱗害。願言慎所託。未用期一快。

梁溪漫志。吾州天慶觀龍姑蘇道士李懷仁所畫。懷仁者酒豪不羈。嘗呼龍松江之上。狎而觀之。遂畫龍入神品。過昆陵天慶觀。大醉索墨槧數斗。曳苔帚裂巾袂。濡墨號呼奮躡。斯須龍成觀者失聲辟易。懼將搏也。懷仁後不知所終。而好事者每呼畫

工就龍模寫工運筆之際輒眩暈欲仆竟不能成觀者駭異郡人胡德輝因與客論近世名畫曰予每至畫龍處輒諦玩彌時不能休乃賦古風云云

遊秀峯寺

攝身下蓬萊放浪雲水迹非無簡書畏心賞寄泉石亭亭雲閒塔勝地聞自昔梯空上青冥如鳥著兩翼化城出天半寶甃坦如席環山割中斷裂地開震澤峩峩東西峯觀闕倚空碧千尋采香巡劍臥漣漪直當年館娃宮六月避暑夕琴臺延薰風萬女曳阿錫牛耳爭齊盟烏喙已薦食百家甬東村託足歸無宅焉知陵谷變大廈響千鳥矧茲風塵際樓殿踊山脊安隱大火中顯允象教力興予浩劫歎萬法本空寂

楓橋

朝辭海涌千人石暮宿楓橋半夜鐘明日館娃宮裏去洞庭呼起一帆風

滄浪亭

昔聞滄浪亭未到滄浪水先賢眇遺跡壯觀亦何侈飛橋跨木末巨浸折湖壘糟牀行萬甃繚牆周數里廢興固在天庶用觀物理緬懷嘉祐世周道平如砥相君賢相君子美東南美如何一網盡禍豈在故紙青蠅變白黑作俑茲焉始所有醉翁文垂耀信百世無忘角弓詠嘉樹猶仰止同來二三子感歎咸興起縹瓷醉新汲毀譽均一洗恕逢醒狂翁一別垂二紀雋哉老益壯論事方切齒我欲裂絳幔推著明光裏安得上天風吹落君王耳以上吳郡志

張致遠

致遠字子猷南劍州沙縣人宣和三年進士高宗朝歷戶部侍郎給事中出知廣州以顯謨閣待制致仕

題明月樓

明月樓前可萬家鳳山菴下日初斜風流耆舊消沈盡空睇寒江耿暮霞

能改齋漫錄廖尙書剛用中嘗夢中作詩其末句云家住五湖明月樓其後公薨葬於沙縣二十五里交溪鳳山之下其子遂建樓以明月目之張給事致遠賦詩

胡寅

寅字明仲安國弟淳之子初生棄不舉安國收育之舉宣和三年進士高宗朝歷官禮部侍郎兼侍講直學士忤秦檜以徽猷閣直學士奉祠致仕坐通李光落職新州安置檜死復元官卒謚文忠學者稱致堂先生有斐然集

紙帳

細皴卷寒波輕明籠白霧何以相徘徊歲晚正凝沍枕欹一尺竹被展幾幅布賢哉楮先生不以貧不顧夜玉圍紅綃羞澀強自賦書生說富貴志士安貧素風驚銀海潮春在明月庫先生睡方濃不覺糟牀注翰墨大全

和趙宣

冠月裾雲佩綠霞百年將此送生涯愁心別後無詩草病眼燈前有醉花落筆擅場聊寫意背山臨水逐

成家也須南畝多栽種。休似東陵只種瓜。瀛奎律髓

劉一止

一止字行簡。湖州歸安人。宣和三年進士。紹興初召試除祕書省校書郎。歷給事中。進敷文閣待制。致仕有苕溪集。

識舟亭

渺渺歸帆江北渚。脈脈相望那得語。舟中賈客嬋娟女。朝樂瀟湘暮荆楚。我欲招之間。計然浮名睡去如飄煙。買魚沽酒嘯儔侶。槌鼓弄笛殘彫年。

宿溪口

溪聲來天邊。風水共豪縱。夜氣劇奔馬。侵曉不能控。書生有清癖。詠雪寧忍凍。胡爲枕寒流。故遣不成夢。和巒鼇二子寒食少天色五字。

霧雨昏不醒。東風曉能酸。我食日不足。寧憂三日寒。

人言二月時。霏雨生樹杪。天色何時無。要問寒食少。里語春雨樹頭生。

聞杭州亂

飢來命餉寒索衣。官家養兵如養兒。時平軍健久玩弛。轅門笑歌驕莫隨。往時金陵囚刺史。今者杭州漕臣死。稽天烈焰窮朝昏。千丈紅霞炫江水。鄰州之兵如此兵。嗚呼世難何時平。

睡足齋

此地誰令著此翁。角巾欹倒鬢如蓬。興高絕壁松聲外。夢破寒花掉雀中。睡債幾時償。賽足書淫前日洗除空故人。若問安心法。一酌村酤薦晚菘。

次韻宋希仲侍郎見貽

今日宦游此作客。每逢佳處欲忘年。頗將幻境觀塵世。始信臞儒是列仙。野色分橋山帶邑。晚雲藏寺水黏天。公身未屬煙波管。莫向津頭買釣船。

冥冥寒食雨

冥冥寒食雨。客意向誰親。泉亂如爭壑。花寒欲傍人。生涯長刺促。老氣尙輪囷。不負年年債。清詩斷送春。

訪石林

山行不用瘦藤扶。度石穿雲意自徐。夜過西巖投宿處。滿身風露竹扶疎。

過梅溪省妻父臧翊善墳感歎

寂寞松岡鎖暮煙。平生忠信事茫然。臧孫有後真虛語。伯道無兒可問天。以上苦溪集

李質

質字文伯。參知政事昌齡曾孫。爲內侍梁師成所引。授右列睿思殿應制。

揮麈後錄。質少不檢。文其身。

賜號錦體謫仙。後隨從北狩。

艮岳百詠奉詔同曹組作存十八首。

艮嶽

勢連坤軸近乾岡。地首東維鎮八方。江不風波山不險。子孫千億壽無疆。
極目亭

千里飛鴻坐上看。山川風月在憑欄。不知地占最高處。但覺恢恢天宇寬。
跨雲亭

地高天近怯憑欄。下視浮雲咫尺閒。只怪輕雷起嵒際。不知飛雨過山前。
散綺亭

斷虹飛雨過天涯。碧落浮雲不復遮。明日陰晴真可卜。倚欄來此看餘霞。
蟠桃嶺

不到瑤臺白玉京。海中仙果但聞名。何人爲報西王母。嶺上如今種已成。

三秀堂

窗戶深沈晝不開。鳳凰時下九層臺。月明夜靜聞環佩。知有霓旌羽扇來。

書館

蓮燭詞臣在外庭。青錢學士已登瀛。回廊屈曲隨巖阜。挾策何妨取次行。

林華苑

連雲複道映樓臺。茂苑奇花日日開。但得如春天一笑芳菲何必曉風吹。

和容廳

白羽流星一點明。上林飛雁幾回驚。
弓開月到天心滿。風外惟聞中的聲。

漱瓊軒

淺碧分江入衆山。山深無處不潺湲。
開軒最近寒溪口。噴薄松風響佩環。

嵒春堂

桂影亭亭漾碧溪。尋芳曾被暗香迷。
碧桃開後晴風暖。花外幽禽自在啼。

鑑湖

水天澄澈瑩寒光。一片平波六月涼。
移得會稽三百里。不教全屬賀知章。

蘆渚

萬葉梢梢秋意初。斜風細雨憶江湖。
誰知雪壓波澄後。更與宮中作畫圖。

松谷

雲藏煙鎖晝蒼蒼。得地何須作棟梁。
聞道九龍扶輦過。一山風又作笙簧。

蠟梅屏

冶葉倡條不受羈。翠筠輕束最繁枝。
未能隔絕蜂相見。一一花房似蜜脾。

紫硯壁

沒水攀蘿琢馬肝。齋持堅潤出風湍。
潛藩每恨端谿遠。疊作山中峭絕看。

濯龍峽

山東蒼煙細路通。噴泉飛雨灑晴空。真龍豈許尋常見。故作雲閒飲澗虹。

柳岸

牽風拂水弄春柔。三月花飛滿御樓。不似津亭供悵望。一生長得繫龍舟。

揮塵後錄元符末。掖庭訛言崇出有茅山道士劉混康者。以法錄符水爲人祈禳。且善捕逐鬼物。上聞得出入禁中。頗有驗。崇恩尤敬事之。寵遇無比。至於卽其鄉里建置道宮。甲子宇內祐陵登極之初。皇嗣未廣。混康言京城東北隅地叶堪輿。儒形勢加以少高。當有多男之祥。始命爲數仞岡阜。已而後宮占熊不絕。上甚以爲喜。繇是崇信道教。土木之工興矣。一時佞倖因而逢迎。遂竭國力而經營之。是爲艮嶽。宣和壬寅歲始告成。御製爲記。命睿思殿應制李質。曹組共作百詠。

僧祖秀陽華宮記略。政和初。天子命作壽山艮岳於禁城之東陬。詔閻人董其役。工已落成。上命之曰陽華宮。大抵衆山環列于其中。得平蕪數十頃。以治園圃。以闢宮門於西。入徑廣于馳道。左右皆大石林立。僅百餘株。以神運昭功。數慶萬壽峯而名之。獨神運峯廣百圍。錫爵盤固侯。居道之中。東石爲亭以庇之。高五十尺。御製記文親書。建三丈碑。附於石之東南陬。其餘巨石並與賜名。惟神運峯前巨石。以金飾其字。餘皆青黛而已。此所以第其甲乙者。又有大石二枚。配神運峯。作亭庇之。寘于寔春堂者。曰玉京。獨秀太平品。寘于萼綠華堂者。曰慶雲。萬龍奇峯括天下之勝。藏古今之美。於斯盡矣。靖康元年閏十一月。大梁陷。都人相與排牆避處於壽山艮嶽之巔。時大雪新霽。丘壑林塘宛若畫本。祖秀周覽累日。咨嗟驚愕。信天下之傑觀。而天造有未盡也。明年春復遊陽華宮。而民廢之矣。

曹緯

緯字元象一字彥文。潁昌人。有俊才。釋褐卽物故。

自齊山借舟汎湖還家

十里平湖漫不流。晚風吹浪打行舟。定知歸得侵燈火。家在菰蘆最盡頭。宋文鑑

客有遺予畫梅者。淡墨暈成。因命之梅影。

憶昔神遊姑射山。夢中栩栩片時還。冰膚不許尋常見。故隱輕雲薄霧閒。聲畫集

雁

雲飛水宿過炎涼。回想來時道路長。夜月照驚惟弔影。朔風吹斷不成行。人間無處逃矰繳。歲晚何曾飽稻粱。儻以能鳴免烹死。繫書猶可到衡陽。後村千家詩

次韻曹好謙負春

作計尋芳不屬貧。可憐風物自良辰。飛花有意能留客。啼鳥多情解喚人。涉世乍驚翻手薄。論交多語白頭新。十年異縣傷流落。來往山州枉過春。

春日憶西湖簡家弟元寵

天涯孤客意堪哀。病眼逢春只強開。閉戶不知花老去。捲簾方覺燕歸來。風休澗水光如拭。雨霽箕山翠作堆。遙想西湖圖畫裏。幾多車馬踏青回。以上詩林萬選

曹

組字元寵。潁昌人。緯弟。宣和三年進士。召試中書換武階。兼閣門宣贊舍人。仍給事殿中官止副

使有箕穎集

良嶽百詠奉詔同李質作存十八首

介亭

雲棧橫空入翠煙。躋攀端可躡飛仙。介然獨出諸山上。磊磊排衙石滿前。

璿波亭

水影搖暉動碧虛。日華陵亂上金鋪。安知不是鮫人寶。往往淵中得明珠。

飛岑亭

微雲將雨洗層巒。石磴莓苔路屈盤。正是江南最佳處。仰看蒼翠俯澄瀾。

囉囉亭

聖主從來不射生。池邊羣雁恣飛鳴。成行卻入雲霄去。全似人閒好弟兄。

八仙館

蟠桃初熟玉京春。圓屋如規戶牖新。盡是瑤池高會客。豈容塵世飲中人。

蕭閑館

書草吹來種種香。好風移韻入松篁。丹臺紫府無塵事。偏覺壺中日月長。

梅池

玉鉢勻點鑑新磨。香逐風來水上多。應爲橫斜詩句好。故教疎影寫平波。

絳霄樓

翼瓦飛甍跨閬風。捲簾滄海日瞳曨。
佳時自有羣仙到。笑語雲霞縹緲中。

萬松嶺

蒼蒼森列萬株松。終日無風亦自風。
白鶴來時清露下。月明天籟滿秋空。

萼綠華堂

綠萼承趺正橐輕。清香續續度簷楹。
天教不雜閑桃李。賜與神仙物外名。

清虛洞天

玉闕金鎖一重重。只見桃源路暗通。
行到水雲空洞處。恍如身世在壺中。

躡雲臺

萬本琅玕密不開。深明碧鎖高臺更無一點遊塵到。
但覺雲隨步步來。

汎雪廳

月團攜下九重天。來試人間第一泉。
正在水聲山色裏。六花浮動紫甌圓。

景龍江

潤通河漢碧涵空。影倒山光曉翠重。
聞說巨魚時駭浪。只應風雨是神龍。

雪香徑

夾徑梨花玉作英。年年寒食半陰晴。
要看雪色無邊際。十二樓前月正明。

百花屏

衆香芬馥著人衣。雲母光寒露未晞。圍得春風勝繡幕。紛紛紅紫鬪芳菲。
飛來峯

突兀初驚倚碧空。翠嵐仍與瑞煙重。吳儂莫作西來認。真是蓬萊第一峯。

敷春門

帝力無私萬國通。尙思寒谷待春風。欲將和氣均天下。都在熙熙造化中。以上揮塵後錄

輦下寒食

海棠時節又清明。塵斂煙收雨乍晴。幾處青帘沽酒市。一竿紅日賣花聲。綵毬時向梭門過。繡轂遙隨輦。路行日暮人人醉歸去。熙熙春物見昇平。事文類聚前集

鴛鴦

蘋洲花嶼接江湖。頭白成雙得自如。春晚有時描一對。日長銷盡繡工夫。

翡翠

窺魚潛立小荷圓。照水飛鳴更碧鮮。鬪草人歸尋墜翼。綺窗將去補花鉢。以上前賢小集拾遺

夜歸曲

飢鳥啞啞啼暮寒。回風急雪飄朱闌。瑣窗繡闌_畫紅獸畫幕金泥接彩鸞。吳粧秀色攢眉綠。能唱襄陽大隄曲。酒酣橫管咽孤吹。吹裂柯亭傲霜竹。遠空寒雲渾不動。老狐應過黃河凍。暗回微暖入江梅。何處荒

棟挂玄鳳歸來穩跨青連錢。貂茸擁鼻行翩翩籠紗蜜炬照飛霰。十二玉樓人未眠。古今詩統。

邵彪

彪字希文。鎮江人。宣和三年進士。歷國子監丞。知楚州。

丹陽懷古

故里詩人去。湖山最寂寥。草深張祜宅。花暗許渾橋。鳳髓何時續。蓬萍觸處飄。鴻冥杳難及。霜鬢兩蕭蕭。鎮江府志。

范宗尹

宗尹字覺民。襄陽鄧城人。宣和三年上舍登第。高宗朝歷尚書右僕射同中書門下平章事。退居

台州

雖肋編范覺民作相方三十二歲肥白如冠玉。

旦起與裏頭帶巾必皆攬鏡時謂之三照相公。

遊大有空明洞 在黃巖委羽山

暫到山中禮法壇。空明雲氣逼人寒。當年孤鶴知何處。遙想天風墜羽翰。台州府志。

張邵

邵字才彥。烏江人。宣和三年上舍登第。建炎初以直龍圖假禮部尚書使金通問。欲降之不屈。徒于會寧府。和議成。及洪皓宋弁南歸。升祕閣修撰。敷文閣待制。知池州奉祠。卒有輜軒集。徒

待制張公行實。公在會寧，士多從之授書。生徒斷木，書于其上，捧誦既過，削去復書。中圓如瓠而首尾尖，目之曰木橄欖，蓋其俗兒童誦習率以此。

句

蘇鼂久絕寢衣想，姜被忽分挾纊香。謝樞密王公倫惠綿衾。

待制張公行實。

張嶠

嶠字巨山，襄陽人。宣和三年上舍中第。紹興中，官司勳員外郎，擢中書舍人，升實錄院修撰，有集。

劉後村詩話：巨山陳簡

齋之表姪詩法似之。

夷陵

吳越相持地，江山直險固。昔聞焚夷陵，今茲但遺堵。山遠欲連天，江寬疑浸樹。左顧渚宮塗，右眺襄陽路。野迥無居人，荒村但豺虎。依依念鄉井，愴愴悲墳墓。月淡江風寒，雲深楚山暮。佇立小踟躕，蒼蒼歸鳥去。

防江

大漠與吳越，天南天北頭。虜尤涉吾地，飲馬長淮流。飲馬猶尚可，莫使學操舟。

後村詩話語意

高簡意味幽遠。

絕句

壘砌南山路。叢筠冒水生。寒梅銷落盡。猶有數花明。

十日濃陰飛細雨。清川初漲水平沙。幽人閉戶春已半。開徧山南山北花。
故園墳樹想青蔥。寒食風光淚眼中。自痛不如偷父子。紙錢猶挂樹頭風。
一行疎樹對柴門。又見荒煙上晚村。日日牆陰觀日影。人生消得幾朝昏。

馬擴

擴字子充。中嘉王榜武舉。宣和四年。與趙良嗣使金。議割燕山。特除武翼大夫。忠州刺史。兼閭門
宣贊舍人。紹興初。爲湖南宣撫司參議官。有茅齋自敍。

使金和趙良嗣

未見燕銘勒故山耳。聞殊議骨毛寒。願君共事烹身語。易取皇家萬世安。茅齋自敍

句

未敢此時非趙括。已愁他日類田豐。

三朝北盟會編。紹興二年。曹成執湖南安撫使向子諲。據道州。宣撫司參議官馬擴。遣使臣張布齎劄子招成。成受招安。乃放出子諲。參謀范直方曰。曹成不可招保之使赴行在。馬曰。彼既不願遠出。促之是使散而爲亂也。宣撫使吳敏惑直方之議。馬之命到城。成卽復亂。湖廣被其害。直方得鄙而去。
以詩獻敏云。云遂拂袖歸。又數日。敏以資學宮祠。
之命到城。成卽復亂。湖廣被其害。直方得鄙而去。

王次翁

次翁，字慶曾，濟南人。禮部別頭試第一，南渡知處州。附秦檜，屢遷至參知政事。奉祠居明州。開馬擴辭職作

徒薪曲突論無憑。太尉山中混耦耕。頭額爛焦曾采錄。參謀先已享專城。

近來出處事何如。先輩風流掃地無。忽有子充驚末俗。一言未契便長驅。三朝北盟會編

傅墨卿

墨卿，字國華，山陰人。以大父恩補官。宣和四年，使高麗有功，賜同進士出身。進龍圖閣學士，提舉杭州洞霄宮。

句

百鍊鑑從天上鑄。五時花向帳前施。端午帖子容齋五筆

曹勛

勛，字功顯，陽翟人。組之子。宣和五年，賜同進士出身。紹興中，僑居天台。以韋太后北還迎鑾，功官

至昭信軍節度使。孝宗朝，加太尉，開府儀同三司。卒贈少保，謚忠靖。有《松隱文集》。

夷堅志：紹興中，曹勛使金，好事者戲作小詞，其後闋曰：單于若問君家世，說與教知便是紅窗迴底兒。謂勛父元寵昔以此曲著名也。

乾道聖德頌并序

宋詩紀事

卷四十

一〇六一

臣恭惟皇帝陛下膺上聖之期繼中興之統紹登四載恭勤百爲迺乾道改元政事具舉營戍罷屯黎民於變時雍廷臣小大率職致淮北之蝗入境自斃秋成之積歲登大有是皆陛下聖德昭著雖黃童白叟所不待言而知臣以草莽之賤迫桑榆之年際遇四朝叨塵二府豈不知清明之時方深貪戀大懼榮祿浮實莫允清議故控露忱悃仰瀆天聰特蒙賜俞已幸晚境安處閑退日聽康衢熙熙之謠頤老臣不當以翰墨輒塵宸辰然抃蹈之餘有不能自己者謹擬元和之作極思選言撰成乾道聖德頌昧死上進雖未能形容聖德之萬一庶少伸臣子歸美之誠其辭曰

維聖有作紹隆興運天經地義宗堯越舜風俗淳厚日星明潤冰天桂海咸祇成訓皇矣藝祖肇開宗祊用集大命再造羣生卜世卜年周室與京德懋聖孫區宇再寧龍潛出震握符御極恭儉慈仁已隆燕翼勵精治具羣工惟辟斯皇聖德以受方國躬秉要道化成斯民問寢侍膳克勤日新刑于四海率土興仁至矣聖孝悅安嚴親猾夏餘種久失我重稍恢雄略盡還尊奉復修絳樂亟續騫貢布昭聖武式皇鉅宋洪宣景命爰振皇綱詔令諭旨粉澤八荒宸奎逸彩龍鳳鳶翔煥乎聖文彬彬日彰誕敷武節克柔強鷺風靜邊柝煙沈晚燧櫓夫力田塞馬垂轡巍巍聖功允格康濟光啓元良鶴禁建儲遴擇端方贊翊詩書濬哲文思日親睿謨於赫聖明有開令圖當天執籙了無玩好貴異獻輸蕩然一埽力敦嘉靖詢謀政要不鑠聖斷坐臻是奧從容總攬用體乾剛文武一道督以經常王化溥博景風丕祥格天聖治時雍時康咫尺威顏豁達方寸日角珠庭金聲玉振穆穆皇皇天儀明潤洪惟聖表萬寓朝覲乃武乃文止戈好生華夏蠻貊底於丕平罔或反汗克斷惟明長策遠馭奕奕天聲寶緒重光密答純祐旣協皇極昭報方茂

堯父舜子撫封增舊行復九有亘萬萬壽大哉乾元萬物資之赫赫明世吾君繼之熾昌隆祚惟皇造之億萬斯年惟皇保之

獨不見

獨不見誰相憶花影上珠簾明月穿窗隙翡翠暗無光蒼苔點行跡鸞鑑挂珊瑚寶盤銷金碧彷彿聞簫韶夢想見顏色爲我報新人好好承恩澤君看後庭花芳菲能幾日

楊花曲

春光誰占得楊花獨自知未到傳消息將歸送別離隨風飛更急入戶舞還低大有撩人處妝臺惱畫眉

以上松隱集

沈晦

晦字元用錢塘人遷孫宣和六年廷對第一歷知建康府高宗朝進徽猷閣直學士出守衢州提舉太平興國宮

上方山居

月斜樹影穿窗入雨過山泉繞舍鳴野寺中宵人不睡蒲團布衲悟前生
天畔羣山一草亭半溪煙雨花冥冥老翁投老得此景日與溪山同醉醒
此生真與世相忘投老生涯寄上方洗足關門枕書睡連山松檜雨浪浪

括蒼葉紀

邵棠

宋詩紀事 卷四十

棠字仲甘號西坡南康軍都昌人宣和六年進士。

道經柘溪靜林寺

青山萬疊倚晴空中有招提一逕通老衲不關塵世事黃花紅葉共秋風詩林萬選

萬松嶺老僧

佛屋三閒破冷開半通雲氣半蒼苔行人莫問僧年紀嶺上喬松是手栽杭州府志

王洋

洋字元渤山陽人御史資深子以省試第二名中宣和六年甲科官博士歷典三郡晚守鄱陽洪忠宣以使金歸人無敢過其居洋獨候舍坐免去有東牟集

琵琶洲

塞外風煙能記否天涯淪落自心知眼中風物參差是只欠江州司馬詩

睿齋三筆吾州餘干縣東干越亭有琵琶洲在下唐劉長卿張祜輩皆留題王洋一絕句云云真佳句也

李長民

長民揚州人正民之弟南渡寓家海鹽

題鹿苑寺一擊軒

我聽風篁是梵音如何俗耳等閑聞自來擊處無人會千古知心只此君海鹽縣圖經

祖秀實

秀實，字去華，浦城人。弱冠釋褐第一，除國子博士。高宗朝，拜禮部郎中。

寄吳晞遠

官路聲名二十年，江鄉舊仰貳車賢。
推將事業歸塵外，收得功夫到酒邊。
解榻幾聞招隱士，炷香終日對韋編。
公朝況是登者哲，早晚蒲輪穩著鞭。

萬姓統譜：吳駿，字晞遠，中元豐八年進士。調潞州上黨簿。太宰張商英首加薦引，知虔化縣。通判永州，未幾告老。祖秀實以詩寄之云：

恭崇禮

崇禮，字叔厚，高密人。徙北海，登上舍第。高宗朝，拜翰林學士，退居台州，有北海集。

題石梁瀑布

林麓陰森徑曲盤，漸驚危步入重巒。
地分寶刹臨空翠，天設飛梁跨急湍。
霜暗雲蒸山氣肅，雪翻雷輶水聲寒。
我來不作多求想，試出神光徧現看。天台勝紀

宋詩紀事卷四十一

錢唐厲鶚緝

平湖陸銘鑒勘定

王晞韓

晞韓興化軍人宣和六年進士紹興間樞密樓炤宣撫關陝辟爲屬改京秩朝廷欲借兵西夏犄角金人差管押生蕃三百餘口歸夏國道無疎虞累遷大理少卿方庭實宣諭陝西贈以詩晞韓和之時秦檜方主和議誣以他獄欲置之死上閔其勞移潯州赦歸卒

和方廷實見贈

誰憐定遠不生還驛騎翩翩出漢關未有西風回馬首要傳飛檄過千山莆陽文獻

張闡

闡字大猷永嘉人宣和六年進士高宗朝累遷宗正少卿孝宗朝遷工部尚書顯謨閣學士奉祠卒謚忠簡

奉祠後作

八請犯天顏今朝出漢關渾如倦飛鳥日暮傍巢還合璧事類後集

王之道

宋詩紀事 卷四十一

一〇六七

之道字彥猷號相山居士無爲軍人宣和六年進士建炎中保山寨攝鄉郡尋以議和忤秦檜晚起漕湖南官樞密使有相山集

蒙城早行

蒙城在應天府汴河西上入京路

殘月千家閉荒城萬木號舉頭華蓋近回睇啓明高野迴霜迎面風清冷透袍十年河上路從此步金鼈

繡溪

畫橋雕檻接招提新有幽人傍繡溪千頃波明天上下兩臉光映水東西飛樓湧殿參差見古木修篁咫尺迷此景此時君信否綠楊影裏囀黃鸝

廬州志

詹度

度宣和中資政殿學士同知燕山府

送宣撫童貫平燕班師

長途春色送英雄滿目江山暝日紅劒戟夜搖楊柳月旌旗曉拂杏花風行時一決平戎策到後須成濟世功爲報燕山諸將吏太平取在笑談中

三朝北盟會編

蔡柟

柟字堅老南城人嘗爲宜春別駕宣和以前人歿于乾道庚寅曾公卷呂居仁輩皆與倡和有雲
翠隱居集浩歌集

泊釣臺

高臺百尺凌空碧。維舟夜久霜月白。瘦木宰宰搖枯藤。寒瀨潺潺落蒼石。先生退隱知幾年。漢家鍾鼎徒凌煙。高風千古磨不盡。山水照映長明鮮。我來俯仰慚羈旅。衝寒愁怕元冬暮。此身不負白鷗盟。暫此遲留亦何預。起來搔首江茫茫。孤篷卻逐雁隨陽。人生遊行豈易得。惟有此夕難相忘。釣臺集

登郡學檇古閣晚望

簷外川原迥。煙中草樹微。山城暮吹角。客子淚霑衣。歲月經身老。行藏與願違。歸禽帶落日。渺渺背人飛。

詠新荷聖老嘗謁韓子蒼令賦此詩

朱闌橋下水平池。四面無風柳自垂。疑是水仙吟意嬾。碧羅箋卷未題詩。以上西江通志

陸元光

元光字蒙老。歸安人。博學善吟詠。宣和初爲嘉興令。後改晉陵。

詠蟬

綠陰深處汝行藏。風露從來是稻粱。莫倚高枝縱繁響。也須回首顧螳螂。

庚溪詩話。蒙老宰晉陵時。州幕官有好讒謗同列者。一日同會聞蟬。蒙老卽席賦此。其人聞而少戢。

嘉禾八詠存二首

金魚池

池上春風動白蘋。池邊清淺見金鱗。新波已縱游魚樂。調笑江頭結網人。

五柳橋

五柳先生倦折腰。孤眠千載仰風標。青衫令尹頭如雪。不厭朝昏過此橋。至元嘉禾志

鄭強

強閩人。宣和中。萍鄉令。

化成巖

城郭囂塵外。江山勝概中。鏗然一灘水。和以萬松風。夾徑森奇石。危亭納大空。蒼巖不能語。曾識贊皇公。
袁州府志

程瑀

瑀字伯寓。饒州浮梁人。宣和中。太學試第一。官屯田郎中。謫監漳州鹽稅。高宗朝。累除兵部尙書。
龍圖閣學士。提舉江州太平宮。卒有鮑山集。

拜程剛愍公墓

早從賓客傅青屏。晚舉絲綸對紫薇。忠憤欲先同列死。胡塵驚繞屬車飛。墓閒挂劒心猶在。帳下談經事已非。太學諸生皆白髮。汪汪老淚溼征衣。

饒州府志。公名振。字伯玉。樂平人。少入太學。徽宗幸學。以右職除官。累擢國子司業。兼太子舍人。靖康元年。以吏部侍郎尹開封。金兵至。及于難。高宗立。贈端明殿學士。賜謚剛愍。墓在樂平懷義鄉。

李芬

芬宣和進士。

吳將軍元瑜丹青妙當世。吳王命扁舟下海陵。貌徐神翁像以歸。故爲詩敍其事以贈。

秦皇寤寐茅盈語。銳意長生欲輕舉。徐福藥就仙骨成。雲海茫茫但延佇。東西日月秋復春。海變桑田更幾人。忽思重看舊寰宇。驂鸞直下江淮濱。布衣野叟不耕藝。自向琳宮操祓箒。祕語親書悟世人。一坐忽然驚三十歲。淮南奉道聞真蹟。命使扁舟訪消息。畫手從來獨擅長。一見仙風心自得。歸來目斷蒼煙垠。三尺生絰醉墨翻。軸上神翁不解語。彷彿白鶴乘孤雲。海陵相望一千里。嗟我塵勞未云已。授書圯上會有期。誠心願取黃公履。宣和畫譜

黃次山

次山字季岑。豐城人。宣和進士。建炎中官吏部郎中。提點湖南刑獄。有三餘集。

田家春日

緯竹梁溪面。誅茅舍道傍。臘收冰下紙。春課社前薑。露草牛羊長。風花杖屢香。人生但如此。官獨爲誰忙。

前賢小集拾遺

趙良嗣

良嗣本遼人馬植。因童貫來降。改姓名李良嗣。薦于朝。獻策伐遼。賜國姓。累官延康殿學士。光祿大夫。以罪奪職。靖康初。戮于柳州。

宣和四年使金作

朔風吹雪下雞山，獨暗穹廬夜色寒。聞道燕然好消息，曉來驛騎報平安。

馬擴茅齋自序

上京作

建國舊碑胡月暗，興王故地野風乾。回頭笑向王公子，騎馬隨軍上五鑾。

程史趙良嗣，絳人，來降，以能文爲裕陵眷遇，曾兼史局令續通鑑長編，重和元年十二月推修四朝會要帝系后妃吉禮三類，實良嗣以參詳轉秩，後坐誅，全譜北遼遺事見良嗣與王環使女真隨軍攻遼，上京城破有詩云：五鑾乃上京殿名，保機之故

東也

劉

佖

佖，宣閒，爲昌國尉。

投洩潭龍宮

未躍天衢臥寂寥，碧潭流溢海山腰。埋藏頭角雖經歲，際會風雲在一朝。既若有心成變化，豈能無意及枯焦。神蹤許爲蒼生起，願擊香車上九霄。

延祐四明志

李處權

處權，字巽伯，洛陽人，鄆公淑曾孫，宣和閒與陳叔易、朱希真以詩名，南渡後嘗領三衛有崧菴集。

送二十兄還鎮江

此行檢校幽棲事佳處知公故未忘新筍豈應過母大舊松想已及人長老來對客須靈照貧後持家藉孟光世亂身危何處是二年孤負北窗涼濱奎律體

吳可

可、字思道。金陵人。宣和末官至團練使。責授武節大夫。有詩名。

孫仲益作汪彥章墓誌云大璫梁師成用事小人朋附目爲隱相武人吳可者師成許以能詩至出入臥內公罷符寶可過公致師成意曰聞名久矣幸不鄙過我禁從可拱而俟也公謝不往客曰吾曹望隱相之門如在天上召而不往何故公曰若使

李端叔跋云思道詩妙處略無斧鑿痕字字皆有來歷

病酒

無聊病酒對殘春。簾幙重重更掩門。惡雨斜風花落盡。小樓人下欲黃昏。

戲作冷語

思如冬露下紫薇花影中長哦白雪明光宮衆泉涌此萬

卷首

春霽

南國春光一半歸。杏花零落淡胭脂。新晴院宇寒猶在。曉絮欺風不肯飛。以上墨莊漫錄。

小醉

小醉初醒過竹村。數家殘雪擁籬根。風前有恨梅千點。溪上無人月一痕。

次韻劉元舉子規

蜀魄悲鳴楚國春。試憑清些與招魂。柔腸欲斷雲橫嶺。幽夢初回月挂村。客舍花光隨野水。故園柳色負柴門。飽聞錦里無窮樂。早晚歸來訪子孫。

遊清涼寺

延步石城塢。迢迢去興長。野田耕晚雨。寒樹倚斜陽。載酒追狂客。論才得漫郎。無因遂高蹈。時復借山房。
以上前賢小集拾遺

贈戴彥衡

病來謾喜折敂股。老去尙懷雙脊龍。他日扁舟會乘興。摩挲圭璧小從容。

羅願新安志。新安墨以黃山名。數十年來造者乃在婺源黃岡山。戴彥衡吳滋爲最。彥衡自紹興八年以薦作復古殿等墨。其初降雙角龍樣是米待制元暉所畫。繼作圭璧及戲虎樣。時議欲就禁苑爲窯。稍取九里松古松爲之。彥衡以松生道旁平地不可用。其後衢池工者載他山松往造亦竟不成。彥衡未幾死。

嘗出貢餘一圭示米公。米以爲罕有其比。詩人吳可贈詩云云。

句

東風可是閑來往。時送紅梅一陣香。

優古堂詩話。李方叔喜吳可小詩云云。殊不知張芸叟酴醿詩亦云。晚風亦自知人意。時去時來管送香。

趙季西

季西、宣和閒人。

丹青閣

跨壑飛簷屋數楹。上橫山色下溪聲。等閑題作丹青閣。未必丹青畫得成。

方輿勝覽。在建寧府開元寺側。元豐初太守

石禹勤建宣和中。趙季西命名且賦詩云。

章憲

憲字叔度。吳郡人。宣和中監漢陽酒稅。有復軒集。

吳郡志。章甫字端叔。自建之浦城徙居于吳。崇寧初除都官郎中。尋挂冠歸。藏書萬卷。雖校精密。年六十二卒。子八人。憲其一也。憲築道好德。操履高潔。鄉里謂之隱君子。其學師事王信伯而與朱子發呂居仁等游。嘗自作復軒記。謂葺先人之廬治東廡之軒。以貯經史百氏之書。名之曰復。以贍其學。其後圃又有清曠堂。詠歸清闕遐觀三亭。以慕古尚賢。皆有詩。

登齊雲樓

飛樓縹緲瞰吳邦。表裏江湖自一方。曲檻高窗雲細薄。落霞孤鶩水蒼茫。固知興廢因時有。獨覺江山共古長。回首中原正愁思。不堪殘日半規黃。

題處士顧禧漫莊

何許明人眼。松閒見古堂。泉聲到棐几。山影覆繩牀。愛酒陶元亮。聽蛙孔德璋。紛紛戰蠻觸。丘壑信難忘。

遐觀亭

吾慕陶靖節。處約而平寬。涉園自成趣。矯首復遐觀。我亦散遊目。俯仰天地閒。雲煙自舒卷。湖嶺相回環。永與形役謝。豈有俗慮干。想像斜川遊。千載乃相關。

松江謁王文孺令宰

暑退涼生過雨天。髡飛鷺浴暮江前。秋風小浪鴨頭水。斜日輕帆燕尾船。青眼卻欣逢地主。白頭相對聳詩肩。林塘勝處開尊俎。只欠冰輪特地圓。以上吳郡志

挽著作王先生

蘋

伊洛流風在。丘軻道益尊。遺經啓幽眇。後學有淵源。鑽仰知由戶。衰遲阻及門。三年思晤面。一旦絕微言。西觀才黔突。題輿卻佐州。濟時卑管晏。齋志在春秋。曖曖孤雲沒。沈沈厚夜幽。升堂聞禮樂。終覺媿程仇。

王著作集附

連南夫

南夫宣和末以太常少卿使金紹興中知泉州不附和議落職

滴水巖

滴水巖高路欲窮佩環聲響玉玲瓏一天星斗墮青漢萬斛珠璣瀉碧空滄海逕歸朝夕會曹溪不隔本源通何妨凝竚龕巖下更沐如來灌頂功廣東通志

許安仁

安仁字仲山襄邑人晚以特奏名得官調南劍州順昌尉

許彥周詩話李父仲山所著阨奇集自序曰水激之以亂石則有聲礪藏之以甃器則聲齊不下者二城田單因而縱兵文獨不待阨而後奇乎

和徽宗御製宮詞

輕寒慘慘透衾羅玉箭銅壺漏水多常是未明供服御夢回頻問夜如何許彥周詩話

夢中作

山色濃如滴湖光平如席風月不相識相逢便相得

許彥周詩話李父病中夢至一處泛舟環水皆奇峯可愛賦詩云云既寤而言之後數日卒

植竹吏隱堂後因題

珍重勞君慰遠遊繁聲疎影一堂秋主人看卽官期滿分付風塵與子猷

斬破中庭一畝苔。主人白髮手親栽。卽今誰信清貞節。須向三冬雪後來。能改齋漫錄

題善山院

瓦爐柏子裊殘煙。午夢醒時一暢然。不悟功名負終老。荒山飢走又三年。延平府志

周邦

邦海陵人居錢唐右文殿修撰知廣州糧之孫官迪功郎江東帥幕著政和大理入貢錄。

次陳彥育遊鍾山韻

雄壓吳頭控楚腰。千峯環拱治城橋。黃旗紫蓋旋歸漢。古刹淒涼尙號蕭。都后化鱗之地鹿苑院士人名爲蕭帝寺

北嶽經行匪濫巾。相陪來現隱淪身。春蘿秋桂還吾輩。白浪紅塵付若人。清波雜志

范周

周字無外文正之姪孫純古之子負才不羈安貧自樂所居號范家園。

中吳紀聞方臘之亂郡中令總甲巡護雖土流亦不免無外率府庠文作守時頗漫士嘗于元宵作寶鼎現詞投之極蒙嘉獎因遺酒五百壺其詞每遇燈夕諸郡皆歌之

巡夜絕句

自古輕儒孰若秦。山河社稷付他人。而今重士如周室。忍使書生作夜巡。

中吳紀聞方臘之亂郡中令總甲巡護雖土流亦不免無外率府庠諸生冠帶夜行首用大燈籠書一絕于其上郡將聞之亟爲罷去

題崑山絕頂

萬疊青巒厭巨崑。四垂空闊水天分。夜光寒帶三江月。春色陰連百里雲。桂子鶴鳴空半落。天香僧出定中聞。不將此境憑張益。三百年來屬老文。中吳紀聞

木香

暖風吹麝入鉛華。不肯隨春到謝家。半夜粉寒香泣露。也應和月怨梨花。墨莊漫錄

范公稱

公稱文正公之後。著過庭錄。

無題

赤縣東城尉。它年業舊儒。老爲知道馬。中有報恩珠。歲月侵餘齒。風埃上短鬚。賴逢同志友。襟韻不相孤。
過庭錄

燕照鄰

照鄰字明仲。陽翟人。隱居不仕。

絕句

女駢兒癡十口餘。進時無業退無廬。一窗風雨韓城夜。火冷燈青照舊書。過庭錄

范仲溫

仲溫字元實。祖禹之子。秦少游之壻。呂居仁之表叔。學詩于黃山谷。有潛溪詩眼。

鐵園山叢談仲溫嘗預貴人家會有侍兒喜歌秦少游長短句坐中略不顧及酒酣懷洽侍兒始問此郎何人仲溫遽起叉手而對曰某乃山抹微雲女婿也聞者爲之絕倒

句

夷甫雖黃須倚閣君卿脣舌要施行

紫微詩話

陸

宰

宰字元鈞佃子官朝請大夫直祕閣贈少師

施宿會稽志紹興十三年始建祕書省于臨安天井巷之東詔求遺書于天下首命紹興府錄直祕閣陸宰家書來上凡萬三千卷有奇

句

奴愛才如蕭穎士婢知詩似鄭康成

陸游劍南集云先少師宣和初有贈晁公以道詩云云晁公大愛賞今逸全篇偶讀晁公文集泣而足之士不逢時勇退耕閉門自號景迂生遠聞佳士輒心許老見異書猶眼明奴愛才如蕭穎士婢知詩似鄭康成早孤遇事偏多感欲續殘章涕已傾

崔子方

江上逢晁適道

渺渺連江雨微微到面風主人留一餉佳士得相逢會面嗟何晚論詩許有功君家好兄弟更覺此心同

亘
亘

亘字元邈。陽翟人。與陳叔易崔德符善。建炎中。以察官召卒。

江梅

千林含凍鬱蒼蒼。只有江梅獨自芳。暗吐幽香穿別院。半敲斜影入寒塘。冰膚宛是姑仙女。粉面端疑騎省郎。若是蜜奴曾拂掠。肯收紅豔貯蜂房。

瀛奎律髓。元邈梅詩三首。前二首云。趁暖不隨千卉折。凌寒先伴六花開。臨流照影爲誰好。映竹無人空自憐。皆佳。惟用索笑事不叶。故不錄。

飛鳶

旋旋晴空作鵠盤。仰空誰不羨高閑。豈知盡日勞心眼。只在塵寰腐鼠聞。

瀛奎律髓。此蓋譏相國寺前資寮僧而作。其爲人可知也。

王晉卿圖瀛山。筆畫精緻。京師貴遊蓄之。爲希代之寶。自圖書棄擲于路。陽翟張飛卿見而得之。過九江。以遺友人傅延之。延之出以示余。余悲而賦詩。
他日緘縢屬貴遊。詎知遷徙過南州。天涯與汝共淪落。淚溼溢江煙雨秋。清河書畫舫。

張茂宗

茂宗。徽宗朝知潭州。

留題衡嶽觀

靈嶽峯前遊古觀。此中何別藥珠宮。五雲仙客形皆異。十洞煙花景不同。鍊藥爐香金石氣。醮星壇冷薜蘿風。因聞大道修真訣。咫尺三清路可通。南岳總勝集

李先輔

先輔、廬陵人。

題朱陵洞水簾

一片挂蒼崖。分明不惹埃。蹙成珠顆白。垂下水簾來。野燕飛難入。山風卷不開。聲聲去朝海。無意戀巖隈。
南岳總勝集

蘇庠

庠字養直。澧州人。伯固之子。初以病目自號告翁。後徙居丹陽之後湖。更號後湖病民。紹興閒。居廬山與徐俯同召不起。卒年八十餘有後湖集。

鵝林玉露。紹興閒。養直與徐師川同召。師川赴養直辭。師川造朝。便道過養直。留飲甚歡。二公

平日對奕。徐高于蘇。是日養直拈一子。笑視師川曰。今日須還老夫下此一著。師川有愧色。

清江曲

屬玉雙飛水滿塘。菰蒲深處浴鴛鴦。白蘋滿櫂歸來晚。秋著蘆花兩岸霜。扁舟繫岸依林樾。蕭蕭兩鬢吹華髮。萬事不理醉復醒。長占煙波弄明月。

苦溪漁隱叢話東坡云此篇若置在太白集中誰復疑其非也

後清江曲

層波渺渺山蒼蒼輕霜隕木蓮葉黃呼兒極浦下答答社甕欲熟浮蛆香輕帆浙瀝鳴秋雨日暮乘流自相語一笛秋風萬事休白鳥翩翩落煙渚苦溪漁隱叢話

賦王文孺臞菴

王郎臞菴摩詰詩煙花遶舍江遶離石渠東觀了無夢筆牀茶竈行相期古人已往不可作甫里顧有今天隨東鄰蟹舍肯著我請辦箋笠懸牛衣

中吳紀聞吳江王份字文孺自號臞菴嘗築園于松江之側買樹作址計三百萬錢圃成極東南之勝蘇庠詩云云

前題

笛弄松江明月蓑披笠澤歸雲若道青霄快活五侯何處如君

浮天閣

玉蟾飛入水晶宮萬頃琉璃碎晚風詩就雲歸不知處斷山零落有無中秋落空江動碧虛黃蘆洲渚雁飛初我來欲訪鷗夷子爲挂西風十幅蒲

平遠堂

柳外西風六幅蒲。野塘睡鴨對春鉏。如何喚得王摩詰。畫作江南煙雨圖。

吳郡志。臞菴在松江之濱。邑人王份有超俗趣。營此以居。圍江湖以入圃。故多柳塘花嶼。景物秀野。名聞四方。一時名勝喜遊之。皆爲題詩。圃中有與閑平遠種德及山堂四堂。烟雨觀。橫秋閣。凌風臺。鬱峨城。釣雪灘。琉璃沼。臞翁澗竹廳。龜巢雲關。纈林楓林等處。而浮天閣爲第一。總謂之臞菴。份字文孺。以特恩補官。嘗爲大治令。歸休老焉。

送子經歸臨安

牛背行將老。鷗沙盟已寒。蓴鱸付張翰。書札報任安。古學飽胸次。驚瀾翻筆端。西湖十頃月。留取醉時看。
宿飛來峯下

吳中未歷佳山水。湖上懷思去惘然。雲去雲歸兩峯寺。鷗飛鷗沒夕陽天。客愁官渡落花雨。歸夢下湖春水船。想得對牀成夜話。何須隴月向人圓。以上咸淳臨安志

題張公洞

銅官之南山復山。捫蘿絕壁苔蘚斑。只今何處可容足。乞我石房雲一閒。毘陵志

德友近在咫尺。乃不相遇。因成一詩。

十日已吹梅信風。絕憐未許一尊同。喜君不減習主簿。媿我殊非龐德公。

德友求蒼菊花栽。戲作小詩代簡。

問訊雲蘿小隱家。剗藤醉墨半欹斜。酒餘落筆已殊絕。發興不須蒼菊花。

鐵網珊瑚，紹興中，建安徐詡跋云：蘇公隱丹徒，五召不起，周君德友主縣簿，願從之遊，文書往來，委曲如瑣，求之古人，未易一二也。

題塘壠山風漪軒

竹陰旣疎明，流泉復清駛。佳響聞山泉，涼風澹然至。幽人此安禪，閱世一遊戲。何必周八垠，是中有能事。

至湖上

沙晚水痕碧，蕭蕭蒲葦秋。鴻飛遙遠渚，木落見滄洲。藤杖吟還倚，風帘行可休。有懷誰共語，暝色起林丘。
以上鎮江府志

張彥智

句

兩岸更無通步路，四時常有避風船。

咸淳毘陵志：蔡三舍在宜興縣西洴浰四圍皆澤國。宣和閒，張寶文彥智遇風寄宿，贈以詩，有句云云。和者盈卷。

薛然

答賈支使寄鶴

瑞羽奇姿，踉蹌形稱爲仙馭。過蒼冥，何年厚祿會居衛。幾世前身本姓丁，幸有遠雲兼遠水。莫隔華表與華亭，勞君贈我清歌侶。將去田園夜坐聽，合璧事類別集。

楊軒

牡丹

楊妃歌舞態。西子巧讒魂。利劍斬不斷。餘妖鍾此根。光華日已盛。闌檻豈長存。寄語尋芳者。須知松桂尊。

合璧事類別集

鄭

鋼

宣和中承議郎。

題資州東巖

逕轉得幽谷。雲巖屹相向。豁屈偃重簷。彎環依疊嶂。緬想融結初。鐫鏤自天匠。了無斧鑿跡。但覺盤根壯。深可數千尺。廣逾八九丈。洞穴既窈窕。松門亦昭曠。廓含三千界。中列五百像。巨楠布幢蓋。翠蔓垂帷帳。木靈不知名。境幽或難狀。我時馳征轍。奔走倦塵鞅。獲此一段奇。欣然愜微尙。欲去興未闌。行行重回望。名勝志。

宋詩紀事卷四十二

錢唐厲鶚緝
錢唐許松勘定

陳序

序字彥育句容人從蘇庠學詩受知于浙漕向伯恭邀與同行妻以愛姬姬寇萊公元孫也伯恭聞于朝授和州文學終刪定官有碧巖集

遊鍾山題八功德水菴壁

寒騎瘦馬度山腰目斷清溪第一橋盡是帝王陵墓處野風荒草暝蕭蕭十年塵土暗衣巾亂走江鄉一病身西第將軍成底事北朝開府是何人清波雜志

方千里

千里官舒州簽判

題真源宮

萬歲丹霞府千函藁笈書時時瞻絳節往往下雲車近與剛風接高連上帝居登前望南岳清蹕滿空虛

宋藝圃集

錢惟岳

宋詩紀事 卷四十二

曹娥碑

曹娥廟貌樹豐碑。千古行人誦色絲。苦恨當年題八字。不旌賢孝只旌辭。方輿勝覽

胡致隆

致隆字藏之。臨江人。自號蕭灘居士。父彥明。與山谷進士同年。故藏之以詩取知于山谷。無子。遺橐不傳。

題吳生畫桃源圖

王宰十日畫一石。左思十年賦三都。誰似今時吳道子。咄嗟能辦武陵圖。武陵不與人間隔。可憐舊日無尋覓。蒼蒼煙水只依然。試倩漁舟問消息。聲畫集

題瘞鶴銘

當年誰爲襄元黃。潮打孤城草木荒。華表竟無新信息。斷碑空有碎文章。雲埋紫蓋峯何在。煙鎖青田路正長。遙想華亭披道氅。夜隨明月過錢塘。蘆浦筆記

星子樓

葛巾藤杖竹籜篋。靜夜江樓縱目初。海獸擎山出彭蠡。玉龍衝水下匡廬。三更雲盡猿啼露。十里月寒人捕魚。已問湖山借圭角。他年來此老樵漁。方輿勝覽

山谷坐上分題賦耦

平生冰雪姿。七星羅心胸。豈無有絲毫。上裨天子聰。而不自見達。胡爲乎泥中。沈疴正無賴。安得君從容。

其子亦可憐風味如乃翁合璧事類別集

喜曹劉二從事見過

蕭蕭細雨鎖柴門。喜見風流二使君。俊逸萬春猶錄事。清新子建尙參軍。飄零世路詩千首。寥落江湖酒一尊。多病楊雄謝來往。暮年誰更可論文。詩林萬選

羅從彥

從彥字仲素南劍州羅源人。從龜山遊以累舉恩授惠州博羅縣主簿紹興初卒學者稱豫章先生淳祐閒謚文質有集

題一鉢菴

可憐萱草信無憂。誰謂幽蘭解結愁。欲得寸田荆棘斷。祇應長伴赤松遊。豫章集

熊蕃

蕃字叔茂建陽人宗王安石之學長于吟詠嘗作茶錄

登金山

注海銀成壑浮空玉作堆鼇翻三島出鷺駕一峯來塔影波搖動鐘聲潮拍回猶嗟禪伯老虛入妙高臺。金山志略

何麒

麒張丞相商英外孫

外大父丞相初登科爲雒縣主簿經攝垍窯鎮稅官留詩護國寺中令狐監征錄以見寄謹再拜追和而記其後

傳翁遺墨臘咨嗟四海當年尙一家大老不爲今日用小詩徒遺後人誇興來思跨巴滇馬歸去方乘下澤車燕麥兔葵僧舍裏何如夢得訪桃花成都文類

虎丘

平地涌巖壑棲層驚大雄何曾遠人世真欲傍天宮白虎威靈在赤烏緣影空生公能說法音與塔鈴同

吳郡志

龍多山

世路聱牙赤水過故升天險問龍多書中舊識唐公昉圖裏又聞馮蓋羅

方輿勝覽在合州赤水縣北按唐孫職方樵龍多山錄有至道觀東有大池卽唐武后時放生池中峯有唐鷺臺院東有佛慧院有萬竹竹徑圍尺有東巖廣五十丈多唐人刻字又有靈山院泉自巖出瀦爲方池大旱不竭其山高明窈深變態萬狀有駕鶴軒下視涪水如帶烟雲出沒山之偉觀也圖經云廣漢人馮蓋羅煉丹于此晉永嘉三年舉家十七人仙去何麒詩云云

董瞿老

黃彥與從無逸求妻埋銘以硯謝之無逸邀予作歌

君不見呂黎翁南遷益覺文章工滑稽戲作毛穎傳陶泓之族稱弘農又不見東坡翁生涯寄食破硯中

託訶龍尾尊鳳味更誇丹石蒸赤紅古來文士耽翰墨十有八九坐此窮怪君落筆妙言語四壁才堪蔽
風雨幾年結柳送奴星文窮跳梁推不去硯能窮人君不鄙爾來訛慕得龍尾緹巾什襲不妄觀碑字三
縑何足擬玉堂視草乃稱之只恐元文似揚子君誇此硯文似羅奈君鹿裘帶索何我雖忍窮亦好事尙
能搜句爲君歌嗚呼魯公乞米家食粥不費銀鉤寫珠玉前賢小集拾遺

杜東之

雲安玉虛觀南軒感事偶書

古觀久荒涼寂然外人境草木旣榛蕪風雨亦頽隕我來一糞除地淨窗爲回晨光散桐陰夕照落柏影
置以六尺牀度此三伏永終朝饜清涼半夜或淒冷客至共浮瓜睡餘獨煮茗遙聞斗筲兒爭奪沸蛙鼴
街頭米十千旱井費糜粳對我脫粟盤徐餐休祝哽

穉梧值歲首擢起青琅玕其葉大如掌其陰匀若攢弱幹尋丈展氣已雲霄干期之四五載定足容棲鸞
我老無定居僦屋蝸螺跼平生輞川宅面勢胸中盤何當遂誅茅規庭十步寬非無松柏堅未易蒼龍搏
種此南窗下醉眠風雨寒

至自雲安題淨戒院

山口出雲鳩喚雨三月巴山蒸溽暑濁流來作虎眼文一葉孤舟命如縷道傍綠樹清陰涼中有金仙古
道場去家纔餘二百里且復看此青簷簷出門滿目傷羈旅歸舍還煎碎兒女欲問閑黎借榻眠臥對龕
燈淡無語麥芒焦桑椹紫田家夫婦忙欲死蠶入簇麥登場夫婦飽煖孰可當道傍書生空有婦不蠶而

衣真汝負功名富貴老不來書劍風塵一生誤何時卽買百株桑身耕婦織策最良董生莫厭徵租吏蘇子無由黑貂弊

雲安下巖

濤江翻雪卷湖灘晚泊巖屏暫解顏夙有淨緣逢寺喜老無生理伴僧閑殘雲已斷獨飛雨落日將沈卻照山半夜秋聲驚客夢一簾珠貝冷珊瑚以上全蜀藝文志

李祁

字蕭遠尙書郎謫監漢陽酒稅

郎官湖春日

兩山收雨暗平沙遮斷溪梅隔水花留得煙林作圖畫依稀松磴有人家空山玉葉照瓊瑰到處尋花共往回欲識春風最奇處試來同看雨中梅朦朧花影月黃昏著意春風入酒痕知是江梅喜佳客倒垂花葉照清樽

能改齋漫錄

十日春陰到水亭水邊楊柳一時青梅花過盡桃花惡乞取山礬入淨瓶

張師中

楓橋寺

吳門多精藍此寺名尤古距城七里餘冠蓋日亭午古逕通采香遠岫對棲虎巖屏橫野橋塔影落前浦露樓鳴曉鐘夕舸帆雙檣方丈中有人學佛洞禪語跡忙心已閑道樂行彌苦不爲喧所遷意以靜爲主

何必深山林峯巒繞軒戶吳郡志

徐忻

西清詩話徐忻作詩有唐人風氣嘗和雪詩云著衣輕有量入水淡無痕

劍池

劍去池空一水寒遊人到此凭闌干年來是事消磨盡只有青山好靜看西清詩話

周李

李字德紹海陵人燁之季父

悅川碾茶

獨抱遺經舌本乾笑呼赤脚碾龍團但知兩腋清風起未識捧甌春筍寒清波雜志

晁載之

載之字伯宇仕封丘丞有封丘集

晁公武郡齋讀書志世父封丘府君黃魯直薦于蘇子瞻云晁伯字謹厚守文從遊多長者願一語教戒之子瞻答云晁伯字詩騷細看甚奇麗信乎其家多異材也

感時事作

森森月裏栽丹桂歷歷天邊種白榆雖未乘槎上霄漢會須沈網取珊瑚

曲消舊聞。政和以後。花石綱。
澧盛。晁伯宇有詩人多傳誦。

昭靈夫人祠

殺翁分我一杯羹。龍種由來事杳冥。安用生兒作劉季。暮年無骨葬昭靈。

能改齋漫錄

劉旦

旦。敞之孫。樞密奉世之子。

句

膺門昔忝登龍客。董墓今悲下馬人。

能改齋漫錄。劉仲馮樞密之子。旦能詩。傳。

康伯嘗薦之。旦後過公墓賦詩。人多稱傳。

祖德恭

德恭字肅之。無擇弟。提刑無頗之子。宣政閒。待普州太守闕。寓居安陸。

致政張安卿承事挽詩

重歎張夫子。神襟遽弗寧。摧山傾嶽算。萎哲奄椿齡。舊室惟圖像。新阡但刻銘。何堪聽歌挽。埋玉在幽垌。

祖龍學集附

望汴京人。大父光圖爲安定靖王教授。望年二十。喜讀騷經。寓詞衡杜。聞每水邊沙外。屬思幽放。人莫測其意。

寄言

洞簫吹兮春煙綠。風光粲兮人如玉。搴木蘭兮溯流波。懷彼美兮憂心若何。曹助松隱文集

李 惇

惣字去言。公擇尙書猶子。

春晚

花瘦煙羸可奈何。不關渠事鳥聲和。無人掃地驚□□。分付輕紅上碧莎。墨莊漫錄

句

去國春城桃李花。楓林葉病尙天涯。今年九日風前帽。北客扁舟雨後沙。蒼黃避地小兒女。漂泊連牀老弟兄。紫微詩話

晁貫之

貫之字季一。曰增按朱弁風月堂詩話稱爲晁季一檢討。又云晁察院季一蓋其歷官也。

春渚紀聞晁季一生無他嗜。獨見墨丸。喜動眉宇。其所製銘曰。晁季一寄寂堂造者。不減潘陳。

句

草堂不見杜陵老，折得青松度水歸。訪杜師與不遇 紫微詩話。

晁謙之

謙之字恭道。居信州。紹興閒。以敷文閣直學士知建康。

南巖

南巖夫何爲。山作天倚蓋。山南谿山複。飛頂壓其外。當空橫廣額。架屋喉舌內。嘗聆釋氏說。仰覆各世界。千閒未可著。五畝良不隘。清冷氣射人。熱惱從此潰。崖奔木疎瘦。谷遠鳥幽怪。曷予與二子。高興偶相戒。松舟下清江。毛髮數蝦蟹。籃輿上峻嶺。幢節望杉檜。李侯勳門胄。文彩山作繪。趙君儒林孫。娉美蘭結佩。不爲城府遊。繼此日于邁。寧知老逾拙。意在精力退。得居溪南山。食飲與山對。夔魈入奧突。雲雨出紳檜。顧此誠未逢。欣然與心會。彭湖兩崖蹙。泉作一線濡。禪月古臺空。靈境自明晦。平生所驅使。詩酒俱好在。天涯得吾侶。物外從所快。便欲登赤城。一觀天宇大。廣信府志

章

綽

綽字伯成。橐之子。終戶部郎中。權知揚州。

句

船尾淮山青未了。馬頭隋柳綠相迎。送雙校書

中吳紀聞

范季隨

季隨學詩于韓子蒼。有陵陽室中語。

南源寺

嬾逐兒曹載酒行。竭來蕭寺作清明。江湖萬里此身健。風雨一春今日晴。露地野花雙戲蝶。並湖煙樹獨啼鶯。挂冠神武何時見。只合深藏諱姓名。撫州府志

呂知止

知止、本中從叔。

絕句

彭澤有琴嘗無弦。大令舊物惟青氈。我亦四壁對默坐。中有一牀供晝眠。

初涼

西風吹木葉。庭戶作涼時。夜有愁人歎。寒先病骨知。以上紫微詩話

許彥國

彥國、字表民。青社人。有詩集。

周邦彥云：寬平優游中極物情，惜乎

流落不偶，故世人知之者或寡也。

紫駒馬

黃金絡頭玉爲韁。蜀錦障泥亂雲葉。花閒顧影驕不行。萬里龍駒空汗血。露牀秋粟飽不食。青芻苜蓿無顏色。君不見東郊瘦馬百戰場。天寒日暮烏啄瘡。

秋雨歎 曰潞按此詩宋藝圃集作許顥

霖雨不出動隔旬。門外秋草長于人。江湖浩渺欲無岸。錦石最小猶生雲。微陽片月何曾見。只有莓苔昏筆硯。田家禾穗未暇悲。茅屋且爲螢火飛。以上宋文鑑

虞美人草行

鴻門玉斗紛如雪。十萬降兵夜流血。咸陽宮殿三月紅。霸業已隨煙燼滅。剛強必死仁義王。陰陵失道非天亡。英雄本學萬人敵。何須屑屑悲紅妝。三軍敗盡旌旗倒。玉帳佳人坐中老。香魂夜逐劍光飛。清血化爲原上草。芳心寂寞寄寒枝。舊曲聞來似斂眉。哀怨徘徊愁不語。恰如初聽楚歌時。滔滔逝水流今古。楚漢興亡兩丘土。當年遺事總成空。慷慨尊前爲誰舞。

苦溪漁隱叢話冷齋以此詩爲曾子宣夫人魏氏作。余昔隨侍先君守合肥。嘗借得許表民家集。集中有此詩。又合肥老儒郭全美。乃表民席下舊諸生。云親見渠作此詩。今曾端伯編詩選。亦列于表民詩中。覽者可以無疑。亦知冷齋之妄也。

采蓮吟

湖邊日落鴛鴦飛。羅衣香轉蘭舟移。蓮根斷處手滿絲。手滿絲不能理。秋雲深隔君子。

臨高臺

高臺跨崇岡。簷宇鎖空霧。新晴洗雙目。千里在跬步。霏霏漁浦煙。冉冉富春樹。風花不我私。何以理愁緒。誰疏白玉窗。中有浮雲度。浮雲吹不開。不見行人去。以上前賢小集拾遺

漁父

榮辱從來總不知。幾閒茅屋對漁磯。江鷗散處夜無伴。荷葉老時秋有衣。後村千家詩

晚宿江漲橋

鳥徑青山外。人家苦竹邊。江城懸夜鎖。魚市散空船。岸靜涵秋月。林昏宿水煙。又尋僧榻臥。夜冷欲無眠。

咸淳臨安志

葉大年

挽王學正偉

書劍當年遊上都。賢關蟲篆校諸儒。文華燦爛九苞鳳。俊氣駿駿千里駒。妙質競誰揮玉墁。白頭空此死樵蘇。遺編殘橐應猶在。搔首令人益歎吁。

遺文膾炙在吾鄉。賦罷誰能少薦揚。聲迹有妻先夢蝶。行藏無子付洴方。雲蘿煙蔓新泉宅。秋月春花舊野堂。交倡彩牋真翰墨。幾人知爲寶巾箱。

中吳紀聞。王偉字康國。居太學。有聲。鄉人謂之王學正。識與不識皆尊敬之。有堂名逸野。以累試不利。日遊適其中。讀書自娛。其持身治家。鄉中率以爲法。生平無子。王氏舉族祀之。不絕。葉大年挽之云云。

李遠字器之。

僕久客錢唐。有吹笛月下者。同旅聞之。淒然皆有歸思。屬令賦之。

柯亭之椽不復得。蘄州黃竹今尙存。蒼崖翠壁產修幹。千頃蕭索煙雲昏。羌人眼力發天巧。長笛裁成鳳

膺飽老龍餘響出空星。欲噴炎天作秋曉。西湖夜寂涼風生。山頭一鉤新月明。商聲悽悲羽聲壯。行子忽
忽難爲情時。無緣珠清音激皓齒。野王臨風三弄亦已矣。唯有愁端無古今。舉刀不斷東流水。深閨蘭燈
照空牀。笛聲不如離恨長。曲終人散一惆悵。回首江山非故鄉。萬事浮雲過寥廓。且醉杯中琥珀薄。君不
見玉管橫吹黃鶴樓。江城五月梅花落。前賢小集拾遺

陳君嚮

絕句

無形今古垂楊岸。客舍不禁風絮亂。佗年若解拂人頭。只恐青青顏色換。

陶朱新錄。君嚮少年在京悅一小賦作。

李若水

若水本名若冰。欽宗賜名若水。字清卿。曲周人。靖康初以上舍登第。由太學博士歷吏部侍郎。京
師陷。從欽宗幸金營。不屈死之。建炎初贈觀文殿學士。謚忠愍。有集。

靖康小雅。靖康之難。死節之士。公爲第一。弔之詩曰。烈烈李公。實備全德。義動幽冥。氣貫金石。扈蹕廬營。爰定忠烈。杞人之憂。
廢立大厄。公挺不顧。二酋面叱。勇甚雷霆。天地動色。命輕鴻毛。名高斗極。燎原之火。不變藍璧。滔天之溺。砥柱獨立。死得其所。

奉使太原途中呈王坦翁副使

舊持漢節媿前人。消息傳來苦不真。五鼓促回千里夢。一官妨盡百年身。關山吐月程程遠。詩界含秋句句新。孤館可能忘客恨。脫巾聊進一杯春。三朝北盟會編

衣襟中詩

胡馬南來久不歸。山河殘破一身微。功名誤我等雲過。歲月驚人和雪飛。每事恐貽千古笑。此心甘與衆人違。難唯有君親重。血淚斑斑染客衣。

能改齋漫錄

化成巖

翠石黏雲溼。寒巖帶蘚深。樹函懷古意。水印讀書心。經濟神猶在。幽棲逕可尋。青甃吾舊物。稅駕臥山陰。

江西通志

句

東風無迹秀芳草。野鳥不言銜落花。一庭鳥跡天書怪。八尺簾紋人字寒。蟬聲千里暮。雁影一天秋。

合璧事類後集

毛寶

寶字文友。靖康元年以朝請大夫延康殿學士知杭州。

冷泉亭詩

并序

昔人以爲冷泉未極其妙。因加小亭。然冷然水光。滃然山翠。以故去者過半。予以謂不必加功。但去其

尤贊者斯善也。如明鏡而加繪畫，非不美好。所以爲清明者逝矣。拂拭菑翳，舊觀復還。
面山取勢，俯山中。亭外安亭自蔽，蒙眼界已通，無礙物。胸中陡覺有真空。試尋櫓響，驚時變洞中事。卻聽
猿啼與舊同。白猿事萬事須臾成壞裏。我來閱世一初終。咸淳臨安志

富直柔

直柔，字季申。弼之孫。以父任補官。靖康初，賜進士出身。高宗朝，累除同知樞密院事。提舉洞霄宮。
題萬象亭并序

燕堂後本登覽勝處。窘于短垣叢薄中，未見識拔。觀文葉公政成之暇，命鑿垣策臺，建亭其上，遂爲一
府面勢殊特之觀。落成有日，謹賦拙詩，少見欣快之意。

堂後山川面面通向來。奇觀窘蒿蓬。元戎小試經綸手。萬象都歸指顧中。雨罷卷簾憑爽氣。酒酣極目送
飛鴻。明年鳳閣鸞臺上。好寄新詩下北風。淳熙三山志

鄧肅

肅，字志宏。沙縣人。欽宗朝召對，補承務郎。張邦昌僭位，奔赴南京，擢左正言。罷歸家居。紹興三年
卒。有栟櫚集。

花石詩

蔽江載石巧玲瓏。雨過嶙峋萬玉峯。艤尾相銜貢天子。坐移蓬島到深宮。
浮花浪蕊自朱白。月窟鬼方更奇絕。繽紛萬里來如雲。上林玉砌醉春色。

皇帝之圃浩無涯。日月所照同一家。北連幽薊南交趾。東極蟠木西流沙。

安得守令體宸衷。不復區區踵前蹤。但爲君王安百姓。圃中無日不春風。

耕欄集

宋史本傳蕭少入太學時東南貢花石綱作詩十一章言守令
搜求擾民用事者見之屏出學欽宗嗣位召對便殿補承務郎

寄朱草齋

歸帽納毫真得策。要牋留帶計還疎。公如買菜苦求益。我已忘腰何用渠。閉戶羽衣聊自適。推窗枯葉對人書。帝都聲價君知否。寄付新傳折檻朱。

陸文裕溪山餘話章齋觴客耕欄以冠帶寓之醉起章齋曰留以質紙筆明日如約章齋受筆還冠而以紙少留帶曰儒無千幅終不還故耕欄爲寄此詩前輩風流調笑謠謡如此

曾如驥

如驥泰和人爲寶慶通判死金兵之難建炎改元贈敷文閣待制謚忠愍

題考功印紙

謹將節義二字結果印紙一宗了卻神遊何處澄江明月清風

豫章詩話金兵薄寶慶通判泰和曾公如驥遣弟如駿歸曰吾旣以身許國不得顧先人宗祀矣汝其圖之涕泣與別復取考功印紙題其上云云澄江指泰和故鄉也事亟矣書舍生取義一章于壁以明己志城將陷左右請迎降公叱之登子城投資江死郡人義而斂厝之明年建炎改元太學生上書敍其功

何迂叟

迂叟，字次仲，黃州人。

遊赤壁和答韓子蒼

兒時宗伯寄吾州。諷誦高文至白頭。二賦人間真吐鳳。五年溪上不驚鷗。蟹嘗見水人猶怒鵠。有危巢孰敢留。珍重使君尋故跡。西風悵望卡城樓。

能改齋漫錄：東坡謫居于黃五年，赤壁巨鵠棲于喬木之上，後賦所謂攀栖鵠之危巢，俯馮夷之幽宮。是已韓子蒼，靖康中守黃州，三月而罷，因遊赤壁而鵠已去，作詩示何次仲。迂叟次仲和答。

王以寧

以寧，字周士，湘潭人。由太學生仕鼎澧帥幕。靖康初徵天下兵，以寧走鼎州，乞師解太原圍。建炎中，以宣撫司參謀制置襄鄧，有詞一卷。

道中聞九里香卽木犀花，湖南呼九里香。

不見江梅三百日，聲斷紫簫愁夢長。何許綠羃紅被客，御風來獻返魂香。墨莊漫錄

句

人情千里白頭浪。世事幾番黃葉風。和人 茗溪漁隱叢話

熊彥詩

彥詩，字叔雅，安仁人。靖康中，太學博士。

三朝北盟會編，自帝蒙塵，憐人館于齊宮。日遣蕭慶須索城中物，校書郎劉才、邵傅宿、國子監主簿葉將、博士熊彥詩、上官悟等五人押經書印板，并館中圖籍，往營中交割。

屏山夜雪和劉彥沖潭溪四景之一

夜深寒妥帖，前村人斷絕。
何許小茅茨，開門滿山雪。

翰墨大全

司馬朴

朴字文季，溫公之姪孫。以外祖范純仁恩補官。欽宗時爲兵部侍郎。以奉使見留金人，挾以北去。居于祁陽，授以官不可，竟握節而死。高宗贈兵部尚書，謚忠潔。

無餘居士齋壁有沈博師遊道林岳麓詩石刻穆仲等和之因亦次韻。

湘西勝景豈易論。羣山騰闊萬里奔。
鶴泉一麓騫鵬囁。松風十里藏祇園。
當時侍御偶題寫筆力，孰敢爭榮尊。
東京少年妙詞藻。南陽舊族齊陰樊。
天心月脇出奇語。使我展讀忘朝昏。
差差戈劒隱一敵。落落旗窮道妙角與根。
他人勸酒逐驚魂。二子頻酌勤空樽。
醉中詩成渺江海。風外帆影徒飛翻。
卷藏篋笥何戢戢。風生襟襼何軒軒。
嗟乎我亦有餘腐。陋哉羊政囚華元。
中州集

句

積雪日出，呆雪飛梅已殘。朋遊要及時，閣鄰有遐觀。乘此蕪穢平，快覽天宇寬。霽色混銀界，曠望連江干。山如白毫相，滉溢清揚端。一氣轉浩渺，萬里皆瀰漫。優哉賦梁苑，想像排廣寒。

中州集文季工書翰有晉人筆意興陵萬機之暇嘗購其遺墨學之有雪齋同韓公度登圓福寺閣和李效之詩今略載于此云云此下不可讀當俟善本考之

季炳

炳號寄菴

弔危翁一

南鄉老人危翁一歲晏雨晴扶杖出驚聞二帝塵再蒙歸闔柴門哭三日眼空愁絕聲遂止里人唁翁翁死矣凜然生氣申包胥萬古千秋葬忠義

邵武府志危翁一光澤人家貧業樵聞二帝北狩哭三日骨立而死季寄菴以詩弔之

余淳禮

淳禮靖康丙午海康令

題遺直軒

二蘇翰墨仙同謫百蠻裏時有田舍翁結茅住行李邇來三十年聞名輒掩耳天定能勝人稍復蒙料理公卿尋斷編臺隸藏敝屣敗屋亦見修變故乃如此開軒畫遺像凜凜有生氣卻恨封德彝不見盛時死兄弟對牀眠此意孤一世騎鯨儻相逢笑人真好事

廣東通志海康城南吳國鑑館蘇子由之所時子瞻亦謫儋耳同處月餘靖康丙午令余淳禮買地開軒繪二公像于中且賦詩

顏博文

博文字持約德州人靖官初官著作佐郎金人立僞楚時充事務官草勸進表南渡初竄澧州移賀州死

清河畫舫顏持約晚有鄭虔之貶作山水橫看頗有清致在五羊賣畫自活竟死瘴鄉

末利花

竹梢脫青錦榕葉隨黃雲嶺頭暑正煩見此萼綠君欲言嬌不吐藏意久未分最憐月初上濃香夢中聞蕭然六曲屏西施帶微醺叢深珊瑚帳枝轉翡翠羃譬如追風騎一抹萬馬羣銅瓶汲清泚聊復爲子勤願言少須臾對此鬱參軍

墨莊漫錄末利嶺外人或云抹麗謂能掩衆花也顏持約謫官嶺表時作詩云云

題李叔班山水橫卷

青山爲誰高影壓三百里竹深已迷橋荷密半藏水區區名利人坐暝真可鄙慨想雲屋中恐是古君子通江石泉滑崩崖朝雪重牧兒心苦飢牛寒挽不動誰人倚長松胸有九雲夢西風吹屋動一笑無與共後村詩話

王希深合和新香煙氣清灑不類尋常可以爲道人開筆端消息

玉水沈沈影銅爐裊裊煙爲思丹鳳髓不愛老龍涎。阜帽真閑客黃衣小病仙定知雲屋下繡被有人眠。

香乘

朱齊愈

齊愈字文淵靖康初官諫議大夫建炎初以推舉僞楚論死

絕句

向來松檜喜無恙坐久復聞南澗鐘隱隱修廊人語絕四山滴瀝雪鳴風

宮詞

禁城春水碧溶溶洗出桃花萬片紅葉上細看無一字始知無女怨春風

睢陽道中

竹溪晴絕雨纔通無數深紅閒淺紅山店落英春寂寂青旗吹盡柳花風以上能改齋漫錄

張激

濬字達明舒州人靖康初官監察御史建炎南渡至尙書右丞寓居臨川有澹巖集

源潭

露葉依灘急霜飄入髮清秋痕到晴樹江勢擁孤城野鶴疑仙羽檣鳥伴水程故園千嶂外白首不勝情

撫州府志

仰山

蕭寺藏幽谷，谿流燕尾分。松蘿諸澗合，鐘鼓上方聞。寶塔開晴日，龍潭隔暮雲。躋攀窮勝境，猿鶴似爲羣。

袁州府志

賀允中

允中字子忱，靖康中爲郎中。紹興中拜參知政事。

李伯紀丞相挽詩

已矣經邦業，茫然造物心。人生固有定，天意頗難謳。此日嗟亡鑑，當年用作霖。吾皇方願治，十事想遺箴。

梁溪集附

李 傷

傷汴京留守，靖康閒陷于金。

挽張忠文公叔夜

命世文章伯，鴻樞柱二臣。殞身因衛社，嗣德豈無人。丹旐西原路，輜車萬里春。一門蒙待遇，徒有淚沾巾。

雲麓漫抄：張忠文公叔夜，稽仲，靖康閒以南道總管知鄧州，首提兵勤王，以不推戴異姓，取過軍前，既議和，傳到計音云：靖康丙午閏十一月內，提兵次安上門，除簽書樞密院，在國子監街東陶潛園子內住。十二月二十五日，京城破，以不推戴異姓，取過軍前。丁未年三月二十七日，離京北去，道中不食，至白溝，或曰過界河也，仰天大呼，遂不復語。明日薨在易州孤山寨，五月十六日也。擡三程，遂火化。第六子仲熊，字慈甫，隨行祭祀。丁巳年十一月十八日，到東京相國寺慧林禪院，後于天壽院前幕士馮直家下。戊午年十月十七日，葬于陽翟縣旌忠功德墳寺及錄到挽詩四首。

上官仲恭

句

君不見喬木參天獨樂園。至今猶是溫公宅。

朱子語類。蔡京父子在京城之西南坊。對賜甲第四區。極天下土木之工。一曰太師第。乃京之自居也。二曰樞密第。乃攸之居也。三曰騎馬第。乃豫之居也。攸妻劉。乃明達明節之族。有寵而二劉不能容。乃出嫁攸。權寵之盛。亞之京攸。四第對開。金碧相照。嘗見上官仲恭詩一編。其間有城西曲。言蔡氏侈奢敗亡之事。最爲豪健。末句云。云仲恭乃上官彥衡之子也。惜其詩不行于世。

呂渭老

渭老。字聖求。嘉興人。宣靖閒朝士。

有感

塵斷征車杳。雲低毳帳深。古今那有此。天地亦何心。檇李詩繁。

宋詩紀事卷四十三

錢唐厲鶚編
錢唐汪啓淑勘定

朱弁

弁字少章，徽州婺源人。建炎初授修武郎，借吉州團練使副。王倫使金通問，被拘凡十九年。紹興十三年始與洪皓、張邵南歸，易宣教郎直祕閣。主管佑神觀卒，有聘遊集，輶軒唱和集，曲洧舊聞，風月堂詩話行世。

宋史本傳：弁留金，王倫先歸，以弁奉送徽宗大行之文爲獻。其辭有曰：歎馬角之未生，魂消雪窖；攀龍鬢而莫逮，淚灑冰天。帝讀之感泣。

北人以松皮爲菜。予初不知味。虞侍郎分餉一小把，因飯素，授廚人與園蔬雜進，珍美可喜。因作一詩。

吾老似出家，晚悟媿根鈍。滋旨郤羶葷，禪悅要親近。偉哉十八公，茲道亦精進。舍身充刀几，割體絕嗔恨。
鱗皴老龍皮，鳴齒溢芳潤。流膏爲伏龜，千歲未須問。便堪奴筍蕨，詎屑友芝蘭。踟趺得一飽，萬事皆可攘。
侍郎文懿後，落落衆推俊。澹然世味薄，內典得所信。香廚留淨供，頻食不言頓。宴然默不語，草木雷音震。
得法於此公，骨髓傳心印。應憐持節人，餉此爲問訊。欲將無上味，爲我洗塵坌。食之不敢餘，感激在方寸。

予以年事漸高氣海不能熟生暖冷旅中又無藥物遂用火攻之策灼艾凡二百壯吟呻之際得詩二十韻

不作漳濱臥年侵氣血衰據鞍思少壯攬鏡歎清羸有病方求艾無營莫問蓍心知出下策理勝遇中醫陽燧神逾速銅仙術盡施論功鄙炮製取穴辨毫釐火帝恩光異炎官績用奇書螢比差似珠蟻迫方知忖物嗟炮鼈觀形笑灼龜煙微初炙手氣烈漸鑽皮閉目書徒展支頭枕屢移發狂還自哂賈勇僅能支宋鵠追風日吳牛喘月時忠言勞緩頰善謹爲開眉服氣工夫遠燒丹歲月遲衛生防後患伐性釋前疑展轉那成夢呻吟且當詩因心念民瘼出位歎身卑欲已七年病當從百世師保身將保國未可廢箴規

元夕有感

朔雪餘千里東風徧九州關河中土異燈火上元愁綠蟻嘗新釀青貂戀故裘紫姑無問卜世事正悠悠炕寢三十韻

風土南北殊習尚非一躅出疆雖仗節入國暫同俗淹留歲再殘朔雲滿崖谷禦冬貂裘敝一炕且跔伏西山石爲薪黝色驚射日方熾絕可邇將盡還自續飛飛湧元雲燄燄積紅玉稍疑雷出地又似風薄木誰容鼠棲冰信是龍銜燭陽曦助喘息未害搖空腹惠氣生袴襦仍工展拳足豈惟脫膚鱗兼復平體粟負暄那用訖孰熱定思沃收功在歲寒較德比時燠雖餘炙手焰寧有爛額酷矧當凝沍晨炎帝獨回轂元冥真退聽祝融端可錄嗟予亦何者萬里歌黃鸝偃仰對窗屏妍暖謝衾褥壯懷羞寵媚晚悟笑突曲因思墮指人暴露苦皲瘃頻年未解甲蹈此鋒刃毒遙知革輶中旰食安豆粥陪臣將命來意懇誠亦篤

有奇不能吐。何術止南牧。君心想更切。臣罪何由贖。此身雖自溫。此志轉煩促。論武貴止戈。天必從人欲。
安得四海春永作。蒼生福聊擬少陵翁。秋風賦茅屋。

客懷

兵氣常時見。客懷何日開。形骸病自瘦。鬢髮老相催。已負秦庭哭。終期漢節回。風雷識我意。一雨洗氛埃。

白髮

白髮使車前。煙波思渺然。霜清櫓稻日。風急授衣天。客館但愁坐。釣舟誰醉眠。乘槎會有便。真到斗牛邊。

劉善長出示李伯時畫馬圖

俯首舉尾拳一蹄。掣韁欲嗅驕不嘶。奚官聳肩兩足垂。意貌自與造父齊。雞目麟鬢鳳凰臆。玉山禾遠未來容。食籞雲追電。有餘地。置之畫圖人。豈識精神權。奇孰可班。當在白兔青龍閒。君知此馬從何來。龍眼胸中十二閑。

謝崔致君餉天花

三年北饌飽羶葷。佳蔬頗憶南州味。地菜方爲九夏珍。天花忽從五臺至。崔侯胸中散千卷。金甌名相傳。雲裔愛山亦如謝康樂。得此攜歸豈容易。應憐使館久寂寥。分餉明明見深意。堆盤初見瑤草瘦。鳴齒稍覺瓊枝脆。樹雞溼爛慚叩門。桑蛾青黃漫趨市。赤城菌子立萬釘。今日因君不知貴。乖龍耳僅免一割沙。門業已通三世。偃戈息民未有術。雖復加飧祇增媿。雲山此去縱不遠。口腹何容更相累。報君此詩永爲好。捧腹一笑萬事置。

送春

風煙節物眼中稀。三月人猶戀褚衣。結就客愁雲片段。喚回鄉夢雨霏微。小桃山下花初見。弱柳沙頭絮未飛。把酒送春無別語。羨君纔到便成歸。

攄抱

客滯殊方久。山圍絕塞深。秋風入橫笛。夜月傍靄襟。造膝他時語。捐軀此日心。飛霜滿明鏡。髮短不勝簪。

李任道編錄濟陽公文章。與僕鄙製合爲一集。且以雲館二星名之。僕何人也。乃使與公抗衡。獨不慮公是非者紛紜於異日乎。因作詩題於集後。俾知吾心者不吾過也。庚申六月丙辰江東朱弁濟陽公謂字文叔通。叔通受官而少章以死自守。耽用叔通見比。故此詩以不敢齊名白託。至於晝年爲庚申與稱江東朱弁者。蓋亦有深意云。以上中州集。

句

平生所愛曾莫倦。天遣花王慰吾願。姚黃三月開洛陽。曾觀一尺春風面。謝范祖平朝散惠姚花。曲洧舊聞。

陳東

東字少陽。鎮江丹陽人。以貢入太學。欽宗時率其徒伏闕上書。論蔡京王黼等誤國姦狀。又上書請留李綱。高宗卽位召至行在。上書乞罷黃潛善。汪伯彥。會布衣歐陽澈亦上書言事。潛善遽以語激怒高宗。與澈同死于市。越三年。高宗感悟。贈東承事郎。紹興四年。加朝奉郎。祕閣修撰。有盡

忠錄

戴埴鼠璞，靖康中，孫覲論太學生陳東誘衆伏闕爲亂，建炎中，黃潛善輩實東極刑。覲潛善不足道也，張魏公亦奏胡程筆削東書，欲使布衣挾進退大臣之權，幾至召亂，遂以諷諭狂生，規搖國是，將勒追勅編置，或謂魏公乃潛善客，程則李綱客也。因借此去之。公爲一代人物宗主，亦復有此失。高宗特以靖康之闕爲懼，不欲伏闕，卻不以言罪人。他日贈東官祭東墓，瞻其家而官其後，以生前布衣爲身後法從。于東亦無憾。嘗曰：朕卽位聽用非人，至今痛恨之。贈官推恩，未足稱朕悔過之意。死者不可復生，追痛無已，聖心惻怛如此。予深爲魏公惜之。

與虞章舜卿二表弟季明游兼勝亭有作

野曠湖山遠，林深松竹幽。舊題看壁立，前事逐萍浮。荏苒荒三逕，依稀度九秋。故人應念我，雅會莫遲留。
與士繇遊金山，翌日分袂。

早別金山恰曉鐘，離帆分破一江風。瓜洲渡口波聲遠，後夜相思明月中。
以上盡忠錄

句

飛廉囚下鄴都獄，急使飛雪作水流潺潺。東方出日還照耀，坐令和氣生人寰。
大雪在太學作。梅磈詩話。

歐陽澈

澈字德明，撫州崇仁人。建炎初，徒步走行在，伏闕上書，請誅汪黃等，與陳東俱死于市。紹興中，贈祕閣修撰，有飄然先生集。

秋試下第有感

離菊金英歎異香。杜門岑寂獨持觴。風掀脫葉橫斜舞。雲襯平林淺淡黃。塞管有情增哽咽。野花無緒伴淒涼。不禁景物撩秋眼。剩與新篇付錦囊。

重游寥陽洞有感

尋真曾到寥陽殿。小立廊腰花影轉。飛瓊仙子下瑤臺。綽約雲鬟眼波剪。水沈煙斷一簾秋。醉睡海棠紅玉軟。武陵歸去探年華。揚州夢覺江波遠。重來風物恰依然。愛日融融素煙卷。洞門寂歷鎖長春。異木槎枒插天半。霞衣冉冉媚東風。綠瑣窗前重識面。酒酣春筍理琵琶。曲終依約含幽怨。人間名利幾時休。馬蹄不駐空留戀。桃花流水古猶今。回首碧雲人不見。

戲促朝宗酒約

雨收雲海湧金盆。簾卷香絲破篆紋。雙陸無心酬白璧。十千有約醉紅裙。哦詩誤許聯師服。載酒真當過子雲。待遣秋娘呈妙舞。春衫已把水沈熏。

臨溪弱柳

柳弄嬌黃暖律催。臨溪約略笑殘梅。鴨頭春水回環綠。龜甲屏山掩映開。媚日依依籠霧閣。搖風裊裊拂煙槐。柔絲恨不同攀折。獨立江臯首重回。

曉發吳城山

風掃陽侯雪陣平。雨催摩詰畫圖成。氣吞浦激重林盡。秋著江湖去鳥明。厚祿故人無一字。長年三老伴。

餘生會須滿意開懷抱，到眼廬山不世情。以上飄然先生集。

曲

端

端字平甫。一字師尹。鎮戎軍人。建炎初累官威武大將軍涇州防禦使。爲張浚所忌。誣以反。下恭州獄。糊其口。燙之以火。乾渴求飲。予以酒。九竅流血死。

三朝北盟會編。張浚既失全陝。退保蜀中。復欲用曲端。王庶曰。不可。富平之戰。宣撫與曲端有勝負之約。今日宣撫以何面目見端。吳玠亦懼。端之嚴明。乃書曲端謀反四字於手心。浚雖有殺端之意。而未有罪。庶等曰。曲端作詩題杜。有指斥乘輿之意。曰。不向關中興事業。卻來江上泛漁舟。此其罪也。浚乃送端萬州羈管。復令恭州取勘。康隨先在鳳翔。遭端決背一百。浚以康隨爲提點刑獄公事。端聞之。曰。吾其死也。呼天者數聲。端有馬名鐵象。日馳四百里。惜之過於子息。連呼鐵象。可惜者又數聲。既死。不旬日。鐵象亦斃。

蜀中作

破碎江山不足論。何時重到渭南村。一聲長嘯東風裏。多少未歸人。斷魂。賓退錄。

鶴林玉露。曲端在陝西。甚有威望。張公宣撫擢用之。金人萬戶婁室與撒離曷等寇邠州。端擊敗之。至白店原。又大敗之。撒離曷乘高望。師懼而號哭。金人因目之爲啼哭郎君。後以端恃功驕恣廢不用。又懼其得士。心竟殺之。自端之死。衆心稍離。金人再戰于富平。我師詐張端旗以懼敵。婁室知端已死。撫掌笑曰。何給我也。于是盡銳力攻。我師敗績。自是陝西非我有矣。宋淳熙間。高廟配享。洪景盧舉此爲魏公罪。迄不得佑食。昔孔明斬馬謖。已爲失計。魏公譏其事。幾于自壞萬里長城。至于詐張

端旗大爲拙謀，徒足以召敵人之笑。沮我師之氣，且端亦知書。嘗作詩云：「破碎山河不足論，幾時重到渭南村。昔人詩欲挂衣冠神武門，先尋水竹渭南村。」卽此事也。

岳飛

飛字鵬舉，相州湯陰人。宣和閒，應真定宣撫募，累立戰功。南渡歷少保河南北諸路招討使，進樞密副使，封武昌郡開國公。罷爲萬壽觀使，爲秦檜所陷，殞大理寺獄。淳熙六年，賜謚武穆。嘉定四年，追封鄂王。淳祐六年，改謚忠武。有集。

題鄱陽龍居寺

巍石山前寺，林泉勝境幽。紫金諸佛相，白雪老僧頭。潭水寒生月，松風夜帶秋。我來屬龍語，爲雨濟民憂。

池州翠微亭

經年塵土滿征衣，特特尋芳上翠微。好水好山看不足，馬蹄催趁月明歸。以上岳武穆王集

題青泥市寺壁

雄氣堂堂貫斗牛，誓將真節報君讎。斬除頑惡還車駕，不問登壇萬戶侯。

賓退錄：紹興癸丑，岳武穆提兵平虔吉羣盜，道出新淦。題詩青泥市蕭寺壁，閒淳熙閒林令梓欲摹刻于石，會罷去不果。今寺廢壁亡矣。其孫類家集，惜未有告之者。

雩都華嚴院

手持竹杖訪黃龍，舊穴空遺虎子蹤。雲鎖斷崖無覓處，半山松竹撼秋風。贛州府志

題池州翠光亭

愛此倚欄干。誰同寓目閑。輕陰弄晴日。秀色隱空山。島樹蕭騷外。征帆杳靄間。予雖江上老。心羨白雲閒。

清河書畫舫

毛國英

國英衢州人。

投岳侯

鐵鎖沈沈截碧江。風旗獵獵駐危檣。禹門縱使高千尺。放過蛟龍也不妨。

娛書堂詩話。毛國英澤民之從子也。以詩自鳴。嘗經岳侯駐

兵之地。江禁方嚴。國英投詩云云。侯曰。詩人也。委舟以渡之。

李易

易字順之。江都人。建炎二年。高宗駐蹕維揚。策進士爲第一。授簽書江陰軍判官。紹興元年。爲太常博士。轉工部員外郎。爲太常少卿。遷中書舍人。改直祕閣。知揚州。官至敷文閣待制。提舉江州太平觀。卒于秀州。

貴門卜築

亂後亦擇居筮山。山輒許居民百餘家。喜甚。手欲舞。云久聞公名。此幸殆天與。感茲鄭重意。時節共雞黍。剡川非沃野。地僻民更窶。趁時務擗茗。餘力工擣楮。寡婦念遺秉。汚池憐數罟。我欲教耦耕。盡力循南畝。

桃杏種連山。深居可長處。東鄰有節士。酒酣乃發語。
公昔起布衣。高誼掩前古。親擢類平津。決見逢真主。
兩宮佇六飛。萬乘思一舉。交侵正倔強。蠭起益旁午。
浩然公獨歸。偶出寧有補。默塞復何言。長歎汗如雨。
以上刻錄

荆溪幽居

勝絕荆溪邊。巢枝度半年。燕回衡落絮。魚涌接飛泉。
丹鼎山頭氣。茶爐竹外煙。幽居已成趣。佳致若爲傳。

竹西懷古

淮南昔繁麗。富庶天下稱。管弦十萬戶。夜夜聞喧騰。
不徒竹西寺。歌吹相豪矜。一朝烽火急。塵市爲溝塍。
風月無歡場。睥睨皆射堋。荒荒野月白。照地如寒冰。
自從畫江守。歲歲輸金繪。蕭條閭井閒。水旱又頻仍。
我來經故里。日暮此一登。隋唐倏已往。遺跡幾廢興。
江山極蒼莽。望之涕沾膺。揚州府志

俞處俊

處俊字師郝。新淦人。登建炎龍飛乙科。未及仕而卒。

傷春

黏天芳草綠蒙茸。久客傷心望不窮。山色自隨人遠近。鶯聲只在水西東。

搜春

千林欲暗稻秧雨。三月尙寒花信風。九節老筇應不惜。步隨流水看殘紅。

以上合璧事類前集

句

叫月子規喉舌冷宿花蝴蝶夢魂香獨醒雜志

胡銓

銓字邦衡廬陵人建炎二年進士甲科紹興五年以賢良方正薦除樞密院編修官抗疏詆和議累謫吉陽軍孝宗朝歷權中書舍人兼國子祭酒權兵部侍郎以資政殿學士致仕卒謚忠簡有澹菴集

鵝林玉露胡澹菴十年貶海外比歸飲於湘潭胡氏園題詩云君恩許歸此一醉傍有梨頰生微渦謂侍妓黎倩也後朱文公見之題絕句云十年浮海一身輕歸對梨渦卻有情世上無如人欲險幾人到此誤平生

瀛奎律髓紹興十八年新州編管人胡銓移吉陽軍編管先是廣東經略使王鉢問知新州張棣曰胡銓何故未過海銓嘗賦詞云欲駕巾車歸去有豺狼當轍棣奏銓倡和毀謗而有是命棣選使臣游崇部封送小項洞過海銓徒步赴貶人皆憐之至雷州守臣王趨捕游崇私茗械治厚餉銓趨後亦得罪

雷州和朱或秀才詩時欲渡海

何人著眼觀征驂賴有新詩作指南螺髻層層明晚照蜃樓隱隱倚晴嵐仲連蹈海徒虛語魯叟乘桴亦謾談爭似澹菴乘興往銀山千疊酒微酣澹菴集

到瓊州和李參政

落網從前一念斜崖州前定復何嗟萬山行盡逢黎母雙井渾疑似若邪行止非人十年夢廢興有命一

浮家此行所得誠多矣更願從今泛北槎。

貶朱崖行臨高道中買愁村古未有對馬上口占。

北往長思聞喜縣南來怕入買愁村區區萬里天涯路野草荒煙正斷魂以上方輿勝覽。

題自畫瀟湘夜雨圖

一片瀟湘落筆端騷人千古帶愁看不堪秋著楓林港雨闌煙深夜釣寒梅磯詩話

題畫扇

誰向生絹白團扇畫將羈客據征鞍南遷萬里知前定壁上崖州莫怕看。

陳郁話腴胡潛菴於福州僉廳分扇得一扇畫古木聞

一人騎驢向西南行及有新興之行方知爲先兆也。

登南恩望海臺

君恩寬逐客萬里聽歸來未上凌煙閣先登望海臺山爲翠浪涌湖拓碧天開目斷飛雲處終身愧老萊。

豫章詩話時孝宗登極起
爲祕書少監將歸朝作

句

盈尺子魚來丙穴一鉗女酒敵新興。

夷堅志。胡邦衡獲罪來福州。黃思憲致子魚紅酒爲餉。
胡報以詩。以子對女丙對新爲工。新興酒闋人重之。

陳宗古

宗古字述之。候官人。建炎二年進士。終朝奉郎。

遊大滌山

洞天三十六奇邃。此無儔。笙鶴有時下。神仙何處遊。巖花自照水。谷鳥不啼秋。盡日松陰底。閑聽寒澗流。

洞霄詩集

鄧柞

柞字成林。沙縣人。建炎二年進士。累官知隆興府江西安撫使。有焦桐集。

題白蓮院

古樹紛紛千嶂雨。遠寺鳴鐘迷處所。一水東流浮落花。隔雲應有秦人住。海風不斷長松路。萬籟寒生蒼玉塵。此去江南山更深。桃榔葉暗猿啼苦。南安縣志

陳剛中

剛中字彥柔。閩清人。祥道從子。建炎二年進士。紹興閒。任太府丞。應詔上封事。胡銓貶韶州。剛中作啓事賀之。忤秦檜。謫定遠縣卒。

陽關詞

宋詩紀事

卷四十三

一一三

客舍休悲柳色新。東西南北一般春。若知四海皆兄弟。何處相逢非故人。

北窗炙輶

石材廟題柱

疏爵新剛應論功。舊石材能形文母夢。還訝僉人來。海市爲誰出。衡雲豈自開。乞靈如見告。逐客幾時回。

鵲林玉露寺丞南行時吉州江濱有石材廟隆祐太后避金兵泊舟廟下夢神告以兵至卽發舟指章貢金兵追至造口不及而還寺丞題詩廟柱云云卒不如願悲夫

飛來峯

寒峯插天出玲瓏。萬菌蒼微風起松際怪石勢搖撼。上有百尺松。幽花綴紅繆。野猿忽躍去。滴下露千點。回首冷泉亭。天鏡光瀲瀲。游姬脩眉青。嬌童兩髦髮。平生山水癖。如人嗜昌歎。對此一壺酒。玉色翻醉臉。路逢老祝髮。絳袍金光閃。茲山信自佳。恨爲緇塵染。置之且復醉。天竺鼓紈紈。咸淳臨安志

阮 閣

閔字閔休。舒城人。宣和中知郴州。建炎初知袁州。有詩話總龜。松菊集。

郴江百詠并序存六首

郴古桂陽郡。陳迹故事盡載圖史。亦間見于名人才士歌詠。如杜子美寄聶令人郴州。韓退之郴江。柳子厚登北樓。沈佺期望仙山。戴叔倫過郴州之類是也。山川寺觀之勝。城郭臺榭之壯。未經品題者尙多。亦可惜爾。余官于郴三年。常欲補其闕。愧無大筆雅思可爲。然因暇日時。強作一二小詩。遂積至於百篇。雖不敢比迹前輩。使未嘗到湖湘者觀之。亦可知郴在荆楚。自是一佳郡也。宣和甲辰二月中和

日舒城阮閱序。

東樓

危城雉堞對東山。誰翶高樓十二欄。獨鶴不來松已老。春風動處日三竿。

山陰堂

脩竹蒼蒼似剡川。浮觴可繼永和年。不知誰有羲之筆。欲寫蘭亭第二篇。

碧虛亭

筇竹枝彎屐齒搖。登臨身覺在煙霄。千峯險似三川峽。一水深如八月潮。

湖亭

城外高堂俯碧灣。山如螺黛水如環。有時鼓棹來尋勝。直到斜陽未欲還。

蘇仙觀

寂寂星壇長綠苔。井邊橘老又重栽。城頭依舊東樓在。未見當時鶴再來。

東山

藜杖芒鞚過水東。紅裙寂寞酒尊空。郡人見我應相笑。不似山公與謝公。以上郴州文志。

宣風道上

馬蹄西去夕陽催。濃淡寒山翠作堆。北鴈無情怕秋熱。帶將寒信過江來。

題春波亭

數葉荷衣一短藜。春波亭上倚斜暉。無人會得詩中畫。凭盡闌干又獨歸。以上袁州府志。

胡嶧

嶧，字仲達。崑山人。建炎初任安遠尉。有如村豪

遊慧聚寺

政欲相攜紫翠閒。不堪風雨徑催還。何時更上月華閣。細認仙山是假山。玉峯詩纂。

黃大輿

大輿，字載萬。南渡初蜀人。號岷山耦耕。嘗輯梅苑。

華亭山房象山

客游厭城市。僧房見巖壑。偉石羅衆峯。寒砂結層崿。爲谷旣窈窕。置嶺復躋邀。溪源互相注。花草紛已錯。空聞先王夢。徒觀楚臣作。行雲在俛仰。北渚應酬酢。天機契如幻。意匠起冥漠。周流屬多豫。寤寐欣所託。有懷山中人。從爾芳杜若。成都文類。

王銓

銓，字性之。汝陰人。自稱汝陰老民。南渡寓居剡中。建炎初爲樞密院編修官。有雪溪集。

追和周昉琴阮美人圖

龍眠李亮工家藏周昉畫美人琴阮圖。兼有宮禁富貴氣象。旁有竹馬小兒。欲折檻前柳者。亮工官長沙。而黃魯直謫宜州。過見之。嘆愛彌日。大書一詩於黃素上曰。周昉富貴女。衣飾新舊兼。髻重髮根急。

薄妝無意添琴阮。相與娛聽弦不觀。手敷膜竹馬郎跨馬。要折柳此畫後歸禁中。胡馬驚塵流落何許。
而詩亦世不傳。獨僕舊見之。位置猶可想像也。病中追和其詩。當令善工試圖之耳。

丹青有神藝。周郎獨能兼。圖畫絕世人。真態不可添。卻憐如畫者。相與落誰手。想像猶可言。雨重春籠柳。

雪後渡西溪

雪後孤村一段煙。晴光遠照玉山川。酒旗隔步招閑客。獨上西溪渡口船。

上方

松閒清月佛前燈。菴在孤峯更上層。犬吠一聲秋意靜。敲門知有夜歸僧。以上雪溪集

王文孺臞菴

全家高隱白雲關。事不繁懷夢亦閑。欸乃交撐漁市散。隔江城郭是人間。

山村

家依溪口破殘村。身伴渡頭零落雲。更向空山拾黃葉。姓名那有世人聞。墨莊漫錄

雲門寺

青山春又到。白髮策烏藤。已是他鄉客。還同寄住僧。瘦松黏凍雪。流水帶寒冰。更覺蒼崖路。雲深不可登。
越詠

周芭

芭字秀實。錢唐人。邦彥弟。邦式之子。南渡初。廬陵倅。

贈劉美中尙書

劉郎校書天祿閣。太白下觀光燭。心知漢祀厄中天。夜半瞻星涕零落。

獨醒雜志。宣和中。太白見甚高。尙書劉公才邵時在中祕。見而歎曰。是兵象也。國家其有外患乎。因與僚友同觀。憂形于色。未幾虜犯畿甸。後周芭秀實來倅廬陵。贈詩云云。

鄭

昺

字彥明。南渡初人。

題閻立本十八學士圖

閻公十八學士圖。當時妙筆分錙銖。惜哉名姓不題別。但可以意推形模。十二匹馬一匹驢。五士無馬應直廬。五鞍施狨乃禁從。長孫房杜王魏徒。一人醉起小史扶。一人欠伸若挽弧。一人觀鵝憑闌立。一人運筆無乃虞。樹下樂工鳴瑟竽。八士環列按四隅。笑談散漫若飲徹。盤孟杯勺一物無。坐中題筆清而癯。似是率更閑論書。其中一著道士服。又一道士倚枯株。三人傍樹各相語。一人繫帶行徐徐。後有一人豐而鬚。獨吟芭蕉立踟蹰。一時登瀛客若是。正觀治效真不誣。書林我昔曾曳裾。三局脫脫幾百儒。雄文大筆亦何有。餐錢但日糜公廚。邦家治亂一無補。正論出口遭非辜。時危玉石一焚埽。覽畫思古爲嗟吁。

獨醒雜志。予嘗得登瀛圖本。規模布置。氣象曠雅。每思瓶始者必非俗筆。又有石本。皆書名氏。後有李丞相伯紀贊跋。乃欽廟在東宮得閻立本此畫。親爲題識。以賜詹事李詩。二本絕不同。嘗見鄭昺所賦長句云云。考其所序。列意鄭必爲畫本賦之。然長孫王魏元不在其中。不知鄭詩何爲及之耶。按翰林盛事記。開元中。張燕公等十八人。爲集賢學士。於東都含象亭。圖寫其貌。意二本必居其一。而後人皆以爲正觀學士耳。

李

宏

宏字彥恢宣州人。宣和初以左丞直郎署涇縣建炎中呂好問知宣州得士四人詹友端周紫芝王相如與宏也紹興初李光爲守復檄署縣累遷轉運使

遊金泉觀

昔時謝女昇天處此日遺蹤尚宛然。蟬蛻舊衣留石室龍飛勝地涌金泉碑書故事封蒼蘚殿寫真容鎖翠煙薄暮松巔聽鶴唳凌空髣髴是神仙。四川總志

許

顥

顥字彥周建炎中襄邑人有詩話

夢中作

閑花亂草春春有秋鴻社燕年年歸青天露下麥苗溼古道月寒人迹稀。

彥周詩話宣和己亥僕在洪州宿城北鄭和叔家夜夢行大路中寒沙沒足其傍皆田苗丘隴一婦人卓衣素裳行田間曰此中無沙易行僕從之不能登婦人援僕手登焉月明如晝彌望皆野田麥苗婦人求詩僕藉草坐有矮瓢壺一上有紙筆僕題

詩四句云云拍筆瓢上有聲驚覺
宛然記憶是歲大病後亦無他故

秋雨

零雨不出動隔旬門前秋草長于人江湖浩渺欲無岸錦石最小猶生雲微陽片月何曾見只有莓苔昏

筆硯田家黍穗未暇悲茅屋且爲螢火飛。宋藝圃集。

秦湛

湛字處度少游子。

句

大勝商山老同居一木奴。

詩說雋永秦處度爲韓齊胄作枝巢詩述炎

聞在會稽先得兩句以語伋未知成篇不

蔡向

建炎中承議郎提舉兩浙常平事。

題隱真宮

福地流傳號隱真麻姑曾款蔡翁門。白春雲子自堪飽。井溢丹泉便可吞。山露五峯疑指爪。溪盤百疊想裙痕。我來旣躡靈蹤後知是仙家第幾孫。赤城志

聞人偲

偃天台寧海尉。

淨因院建炎兵火獨存紀事

湖海浮家二十年重來春色尙依然杏花離落歎紅霧楊柳林塘護綠煙草暖邦人出遊地鳩鳴刺史勸

耕天覺場獨在三災外。試問支郎第幾禪。至元嘉禾志。

張瓊

瓊官舒州守。

雨中自萬壽宮歸

草草登臨未擬回。煙昏雨溼賦歸哉。山寒未放遷鶯出。地勝先聞駕鶴來。老去春光都是夢。嬾邊心事總如灰。歸尋藥裹扶筋力。準擬東風得屢陪。安慶府志。

顏岐

岐字夷仲。復子。建炎中累官至門下侍郎。

句

念昔從學日。同升夫子堂。

萬姓統譜。顏夷仲嘗從榮陽呂公學。呂居仁爲潤陰主簿。時夷仲適在曹南。贈居仁詩云。云夫子蓋謂榮陽公也。居仁罷官歸作詩留別夷仲云。昔日同升夫子堂。如今俱是鬢蒼浪。蓋用其語也。

李方敬

秋蟬

粉蝶爾何知。秋深尙戲飛。憐渠迷節物。猶若弄春暉。露葉今非昔。霜叢疇可依。籬邊菊無幾。薄命寄餘菲。

合璧事類別集

陳石齋

葵花俗名一丈紅。

愁是牡丹重換紫。又疑芍藥再翻紅。嬌饒不辨桑閒女。蔽苦深迷苧下翁。合璧事類別集。

徐月溪

麗春花

照眼裝新就。扶頭酒半醒。妖姿隨變化。薄命易飄零。合璧事類別集。

唐觀

南郊仗廻

傳警千門寂。南郊綵仗廻。但驚龍再見。誰識日雙開。德澤施雲雨。恩光變爐灰。閱兵貔虎振。聽樂鳳凰來。合璧事類外集。

陳貢道

貫道子致一閩人。

題嚴陵釣臺

足加帝腹似癡頑。詎肯折腰求好官。明主莫將臣子待。故人只作友朋看。

庚溪詩話云。
白出新意。

程宿

送葉善卷致仕歸吳

衛尉新除蓋次公，便拋簪紱向江東。
秋鱸正與蓴絲美，夜鶴休驚蕙帳空。
滿腹詩書元未試，會心林壑許誰同。
自憐華髮無歸處，慚媿冥冥物外鴻。
吳郡志

唐耜

耜南渡初人

題巫山神女廟

楚澤隱巫山，翠壁開鴻濛。萬流束長峽，怒浪日簸春。
朝暉澹高唐，嵒阿闕彤宮。眾鬼散煙霧，榮光繞長虹。
恭聞雲華君，少陰體沖融。受道紫清闕，飛化凌三空。
徜徉江海上，千騎馳蒼龍。羽節回天津，央央弭層峯。
悽惻下士人，昏墊無所容。寶書授神禹，百靈倏奔從。
蛟螭委鞭策，山川奠西東。九州免爲魚，遂成萬世功。
嗟余晚聞道，蓬心蔽倥侗。維舟垂崖邊，再拜望遺蹤。
嶙峋山頭石，雲衣尚溶溶。縹緲玉瑛臺，如在指顧中。
童律不可問，至言誰擊蒙。仰首天壇下，松柏悲回風。
名勝志

令狐慶譽

慶譽南渡初人

題雲安下嵒

地遠塵寰絕點埃，懸崖屈曲寄層臺。
山頭玉溜隨檐滴，嵒下金容就石開。
寺影不妨流水過，松香長逐好

宋詩紀事 卷四十三

一一三四

風來徧游未盡無窮景爲報舟人且莫催名勝志。

宋詩紀事卷四十四

錢唐厲鶚緝

吳江都陸鍾輝
王藻勘定

何蓮

蓮字子遠號韓青老農浦城人去非之子東都遺老入南渡尙存著春渚紀聞

章序臣得銅雀硯屬余作詩

阿瞞示姦雄挾漢令天下惜時無英豪。礲裂異肩踝終令盜坯土。埏作三臺瓦。雖云當塗高。會有食槽馬。
人愚瓦何罪。淪蟄翳梧櫟。錫花封雨苔。鴛彩晦雲罅。當時丹油法。
銅雀瓦用鉛丹雜胡桃油拂治火之取其雨過即乾實非謀諸野。因之好奇士。探琢助揮寫。歸參端歛材。堅澤未渠亞。章侯捐百金。訪獲從吾詫。興亡何足論。徒足增忿罵。但嗟瓦礲微。亦以材用捨。徒令餽甕餘。當擅瓊塊價。士患德不備。不憂老田舍。
春渚紀聞

何蓮

蓮字子薦。蓮從兄寓居餘杭。與友張圖南伯鵬俱早世。蓮集二人遺句。名南金錄。

句

不使翠分旁牖去。卻緣清甚畏人知。
賦藏筠軒 春渚紀聞

張圖南

圖南字伯鵬餘杭人

句

坐中競病分明久驢上推敲兀未裁。

春渚紀聞圖南督予分韻詩未就有詩云云用事精穩如老作者惜乎天不少假之年以觀其所止也

鄭魁

賦林叔睿端硯

仙翁種玉芝耕得紫玻璃磨出海鯨血鑿成天馬蹄潤應通月窟洗合就雲溪常恐魍魎奪山行亦自攜。

春渚紀聞永嘉林叔睿所藏端石馬蹄樣深紫色厚寸許面徑七八寸下鄭魁銘詩隸字甚奇末句所寄旨哉

莊綽

綽字季裕清源人官鄂州守有雞肋編

程致道云季裕著本草蒙求三卷甚工

軒渠錄莊季裕年未衰老而體極癯瘠洪析仲本呼爲細腰宮院子

建炎三年七月寓長洲白馬澗張氏舍題壁。

昔年隨牒作邊侯愁望長安向戍樓今日衰顏來澤國又看烽火照長洲雞肋編

和吳正仲觀李廷珪墨

賴召陳元典籍傳。冇教邊腹擅便便。竟誇削木真餘事。卻笑磨人得永年。三友不居毛穎後。五車仍在楮生前。祇愁公子從醫說。火燄生分不直錢。

雞肋編。吳升正仲家蓄唐以來諸李所製墨。無出廷珪之右者。其堅利可以削木。王彥若墨說云。趙韓王從太祖至洛行宮。見架上一簾。取視皆李氏父子墨也。因盡以賜王。後王之子婦尋中血運危甚。醫求古墨爲藥。因取一枚投烈火中研末消服。卽愈。諸子欲各備產乳之用。乃盡取墨燬而分之。自是李氏墨世益少得。

姜光彥

光彥字仲謙。號松菴。淄州人。

己酉中秋。任才仲陳去非會飲岳陽樓上。酒半酣。高談大笑。行草閒出。誠一時俊遊也。爲賦之。

岳陽樓高幾千尺。俯視洞庭方酒酣。萬頃波光天上下。兩山秋色月東南。興來鸞鵠隨行草。夜永魚龍駭笑談。我欲煩公釣鼈手。盡移雲水到松菴。岳州府志

周莘

莘字尹潛。錢唐人。邠之孫。爲岳陽決曹掾。與陳去非爲友。

野泊對月有感

可憐江月亂中明。應識逋逃病客情。斗柄闌干洞庭野。角聲淒斷岳陽城。酒添客淚愁仍濺。浪卷歸心暗

自驚欲問行朝近消息。眼中羣盜尙縱橫。瀛奎律髓

康與之

與之字伯可。渡江初以詞受知高宗官郎中有順菴樂府。

鶴林玉露。建炎中大駕駐維揚。伯可上中興十策。名聲甚著。後秦檜當國。乃附會求進擢爲臺郎。值慈寧歸養兩官燕樂。伯可專應制爲歌詞。訛豔粉飾。于是聲名掃地。世但以比柳耆卿輩矣。檜死。伯可亦貶五羊。

題宣和御畫扇

玉輦宸遊事已空。尙餘奎藻繪春風。年年花鳥無窮恨。盡在蒼梧夕照中。

楊史康與之在高皇朝以詩章應制。與左璫狎適。眷思殿有徽祖御畫扇。上時持玩流涕。璫偶下值竊攜至家。而康適來。留之燕飲。漫出以示康。給璫入取看核。輒泚筆几閒。書一絕于上有頃。璫出見之大恐。而康已醉。無可奈何。明日伺閒叩頭請死。上大怒。亟取視之。天威頓震。但一慟而已。

僻居

巷僻過從少。柴門盡日關。鶯聲常在柳。雲影不離山。有道難言□。雖貧未厭閑。川原煙四暝。春思有無間。

鶯

春暗汀洲杜若香。風標公子白霓裳。碧天片雪忽飛去。何處人家水滿塘。

琵琶

夜深琵琶聲似裂一曲霓裳一庭月曲終人影在西階困倚東風步搖折

可惜

簾幕重重下玉鉤隔簾春在柳梢頭東風著意相料理吹去楊花不自由以上前賢小集拾遺

題清江慧力寺

天涯芳草盡綠路傍柳絮爭飛啼鳥一聲春曉落花滿地人歸

江上濃陰曉未開瘦筇支我上蒼苔春寒前日去已盡今日又從何處來詩人玉屑

招真詞并記

自姑蘇出齊門沿而北望山如巨鼈常熟縣之虞山也邑去江不及程陂湖畝澗之積自南至者傾馳會于江江河既應則迅瀾倒流二水相制移時而不能去山無奇谷惟荒墟白草醜石陂陀迤邐而西有修林橫抹隱見于兩山之間其中爲招真菴元祐中道人申氏海陵徐處士弟子也松林森茂庭宇簡寂如隱君子之居通州道士喻抱元增治之舊名竹陵自是更以招真請記于僕乃歌招真之詞以系之曰

白鶴巢兮丹井空蓬山杳兮煙霞濛陵谷變兮今古木葉下兮秋風飛仙去兮朝太微黃冠野服兮以遊以嬉餐霞臥月兮世不我違與世滌映兮天門可馳蒼龍啤兮雲漫屏石泉冽兮山芋肥俯仰宇宙兮日月蔽虧靈秀回薄兮野芳呈姿山中之樂兮萬化莫移仙人不來兮隱者曷追蘇州府志

李唐

唐字希古河陽三城人徽宗朝補入畫院建炎閒太尉邵宏淵薦之授成忠郎畫院待詔賜金帶

圖繪寶鑑李唐年近八十善畫人物山水筆意不凡尤工畫

牛高宗雅重之嘗題其長夏江寺卷云李唐可比唐李思訓

畫繼補遺建炎南渡李唐如杭得幸高宗余家有唐畫胡笳十八拍高宗親書劉商辭留空絹俾唐圖寫亦見高宗雅愛唐畫也

題畫

雲裏煙村雨裏灘看之容易作之難早知不入時人眼多買燕脂畫牡丹

郁氏書畫題跋記錢唐宋杞云唐初至杭無有知者貨楮畫以自給日甚困有中使識其筆曰待詔作也唐因投謁中使奏聞而唐之畫杭人即貴之嘗有詩云云

張九成

九成字子韶號無垢居士開封人徙家錢塘紹興二年進士第一歷宗正少卿兼侍講權刑部侍郎累謫南安軍起知溫州丐祠卒贈太師封崇國公謚文忠有橫浦集心傳錄日新錄論語詩

南安寶戒院作

苦無人事擾閑居贏得終年學著書今日欣然出門去秋風吹意滿芙蓉

橫浦心傳錄

菩提寺

高僧居物外有戶晝常局海闊知天大泉甘識地靈一簾春月靜數點別山青便卜歸歟計移文休勒銘

遺樊茂實硯 詩刻硯後

端溪石硯天下奇。紫光夜半吐虹霓。不隨凡石追時好。真與日月爭光輝。韜藏久矣不亂用。唯恐翰墨汙染之。樊子文章有餘地。汪汪萬頃誰能窺。贈君此硯無輕棄。經史妙處其發揮。飛流濺沫徧天下。要使咳唾皆珠璣。游宦紀聞

施德操

德操字彥執。鹽官人。與張九成子韶。楊璇子平。號三先生。著北窗炙蟬。

廣福禪院在鹽官有雪峯禪師手鑿井。

何處登臨眼最明。雪峯佳處一川平。潮從海月生時上。峯在雲天盡處橫。幢蓋神扶喬木影。風雷井閉古泉聲。靈蹤鑿盡翻惆悵。何日□山報道成。咸淳臨安志

楊璇

璇字子平。鹽官人。與施德操同時。里人號德操爲持正先生。璇爲謹獨先生。

東山廣福院在鹽官有葛仙翁井。

檮櫟青山下。來尋薊子家。人魚皆靜樂。水木亦清華。松老已成蓋。菊寒殊未花。何須覓句漏。此地有丹砂。咸淳臨安志

西山廣福院在海寧紫微山。

地勢連滄海，名山號紫微。
景閑僧坐久，路僻客來稀。
峽影清相照，河流石自圍。
塵喧都不到，安得此忘歸。

刁文叔

文叔不知其名。張橫浦子韶之友。

春日旅中

來時江梅散玉葉，歸去麌麥如人深。
桃花只解逞顏色，惟有垂楊知客心。

橫浦心傳錄云。思致尤遠。不止工也。

陳棠

棠字德召。紹興二年進士。官祕書少監。

晚步

晚步沙頭倚小晴，南山正與暮雲橫。
棲鴉啼處野煙合，飛鳥去邊孤月生。
樹暗風微花氣度，溪深雨漲水痕平。
夜闌衣溼迷歸路，髣鬢前村燈火明。
前賢小集拾遺

鄭仲熊

仲熊字行可。衢州西安人。紹興二年進士。累官權參知政事。忤秦檜落職。孝宗卽位。復端明殿學士。

桂花

天公憐我太岑寂。每歲殷勤兩度開。收拾落英將底用。博山香裏薦清杯。全芳備祖。

鄭剛中

剛中字亨仲。婺州金華人。紹興二年進士。累除祕書少監。出爲四川宣撫使。爲秦檜所忌。能謫桂陽軍。徙封州卒。檜死。復原官。謚忠愍。有北山集。

老學庵筆記。蜀人任子淵好譖鄭宣撫。剛中自蜀召歸。其實秦檜欲害之。鄭公有惠政。衆皆太息。或曰。鄭不來矣。子淵對曰。秦少恩。戰人稱其敢言。方萬里跋。北山文簡古詩。峭健。在封州詩尤佳。

脩脩窗前蘆

脩脩窗前蘆。孤瘦倚青玉。心虛知夜涼。風葉亂相觸。使我入幽夢。如在江湖宿。方茲困炎曠。愛爾眼中綠。奈何柔脆姿。行犯秋霜肅。霏霏霜露中。菱荷等摧覆。大抵無勁節。不及歲寒竹。

過越江見人家臨水竹可愛

何人此地得幽居。水竹中閒宅一區。無盡江山千萬里。有情花木兩三株。應無俗客來驚犬。時有扁舟過賣魚。我欲他時成卜築。更添幾架古人書。

寒意

嶺南霜不結。風勁是霜時。日落晚花瘦。山空流水悲。棲鴉尋樹早。凍蟻下窟遲。季子家何在。衣單知不知。

辛未元夜

輕寒擁山城。遠綠生春草。迎神樂元夜。笑語聞蠻獠。惟有團圓月。報我時節好。寸燈豈爲孤。卮酒未爲少。
微醺短檠旁。人靜茅屋小。以上北山集

范達夫硯

范郎紫玉餘半圭。翻手作雲雨。雹隨龍蛇起。陸孔翠飛雲。收雨霽千首詩。硯箋

王伯庠

伯庠字伯禮。鄞人。參政次翁之子。紹興二年進士。官至夔州路安撫。

和潘良貴題明州三江亭韻

使君不受二毛侵。杖履逍遙得勝尋。撥遣薄書聊永日。登臨山水亦何心。殘梅隨雪垂垂白。弱柳搖春淡淡金。倚闌大江供一笑。幾多襦袴在謳吟。延祐四明志

陳栖筠

和潘良貴題明州三江亭韻

紅塵一點不相侵。下瞰澄江幾萬尋。地接海潮分鼎足。簷飛鳳翼峙天心。三山有路雲垂幕。午夜無風月涌金。欲識襲黃報新政。滿城爭唱使君吟。延祐四明志

贈泊宅翁方勺

學道悠悠未見功。敢云凡質有仙風。他年一鉢江湖去。先向苕溪訪葛洪。金華府志

謝伋

伋，字景思，上蔡人。參政克家之子。官至太常少卿。紹興初，侍父寓居黃巖，自號藥寮居士。有藥寮叢藁。

妙庭觀

蕭蕭六轡天邊路。雲竹風松正歲寒。欲洗衰顏換凡骨。應須九轉大還丹。

雲輶一去遠難追。丹鼎埋光固不疑。承露仙人辭漢後。幾重深杳隔瑤池。杭州府志

陳用中

用中，字彥才，永嘉人。

戲作

賦命安能比鉅公。偶然年月與時同。只因日上爭些子。笑向連江作醉翁。

竹坡詩話。紹興初，有退相寓永嘉，獨陳用中彥才雖鄰不謁，及再相，有薦之者。止就部注邑連江。戲作小詩云云。蓋其所生年月時，適與時宰同，但日差異耳。

陳述

述，紹興初知袁州。

化成巖

出郭二三里。覽勝適願言。羣山接天際。一水經巖根。參差崖上屋。蕭閑松下門。真趣自往古。聊可開清尊。
袁州府志

董 穎

穎字仲達德興人紹興初從汪彥章徐師川遊有霜傑集

江上

萬頃滄江萬頃秋鏡天飛雪一雙鷗摩挲數尺沙邊柳待汝成陰繫客舟

前賢小集拾遺

句

雲壑釀成千嶂雨風蘋吹老一川秋

夷堅志

高 登

登字彥先漳浦人宣和間爲太學生與陳東等上書乞斬六賊不報紹興二年廷對極言授富川簿轉古縣令以不可祠秦檜父胡舜陟誣奏下靜江獄會舜陟以他事下獄死乃得白編管容州卒有東溪集

思歸

忽忽已秋杪言歸欣有期接物想吾廬青蘂繁東籬流匙白雲子蘸甲黃鸝兒對此憶羈旅多應歌式微喜慰倚門心愁銷舉案眉稱子鬧檐隙繞膝牽人衣歸心念如許兼程猶苦遲明朝秋色裏烏帽風披披冒寒行風雨有感

號風撼枯桺凍雨凝路塵乾坤祕日月八荒同一雲遙知沙漠寒黯黯愁殺人天涯望不極流淚滿衣巾水漲謝邑宰送米

心知一字不堪煮。矻矻窮年黃卷中。食粥由來未爲拙。儲瓶況乃嗟屢空。令君好賢媿韓愈。賤子受賜慚盧仝。春水從教繞舍北。癡兒不復啼門東。

中秋對月

繡江再見中秋月。歲去月圓人尚缺。相望千里共嬋娟。苦恨亭亭照離別。今夕一樽誰與同。孟光舉案對梁鴻。衆雛立侍儼成列。以此持杯壽乃翁。乃翁看月揩病目。手足傾頽頭髮禿。但願團巒三十秋。不計東西與南北。以上東溪集

劉儀鳳

儀鳳字韶美。普州人。紹興二年進士。孝宗朝累遷祕書少監。兵部侍郎。斥歸復起知漢州果州。

詠范志元

誰家遊冶郎。鬪首窺幽闥。但見臉如花。不知心是鐵。一夕變其軀。雪姿映雲髮。昔爲桃李顏。今作松篁節。

方輿勝覽。純陽山在合州石照縣北。唐女冠范志元得道處。天寶閒。天使任安者至山中慕之。而志元變爲男子。劉儀鳳有詩。

自歸州陸行至夔州

戶口村無幾。犁鉏力不堪。林荒樗櫟壽。月黑虎狼貪。幽絕雲眠穩。清閑谷飲甘。故山深未極。壞斷蓋茅菴。曠野無人宿。危亭犯雨過。嶺雲堆最負。刹海現兜羅。酒觸秋懷壯。天留暮色多。不勝行役苦。裁入竹枝歌。顧氏積善齋選

李衡

衡字彥平號樂菴江都人紹興二年進士累遷監察御史出知溫婺台三州召除起居郎祕閣修撰致仕居崑山

慧聚寺作

盡日用登陟踟趺聊對牀巖空炫層碧草細涵幽香弔古漫秋思開尊已月光隨身有竿木作戲且逢場天面無纖靄平川瀨氣吞脩筇臨閣道拂石憩雲根柳映山前路煙搖水北村醉歸風滿袖斜月在蓬門樂菴初成

老子平生百不足菴成那平管食無肉終朝閉戶只讀書四面開窗都見竹以上玉峯詩纂

辭靖

靖鄆人紹興二年進士

望金山

一柱支空立濤聲春寺聞消來巴地雪飛到潤州雲寂寞江山色縱橫盜賊羣不堪形勝裏北望涕紛紛

薛氏世風集

孫雄飛

雄飛字翬之吳郡人紹興二年進士祕書省正字

靈隱寺蓮峯堂

堂開金色界。梵客爲鉤簾。山影碧侵座。水聲清繞簷。粉雲埋石腳。露滋松鬚。終擬攜孤笛。凭闌喚玉蟾。

咸淳臨安志

楊 愿

愿字謹仲。清江人。紹興二年進士。歷簽書樞密院事兼參知政事。罷提舉太平觀。

伏承駒父祕校惠示見和鄙句七言四韻二首。降歎之餘。因成二絕。往謝。

冷官廳事客來稀。衆綠陰陰結夏帷。忽得君詩愜人意。陶家風到北窗時。

只今侍讀周夫子。屢說君詩似杜詩。速把冠塵盡彈卻。玉堂宵直伴王維。願數見侍讀侍郎周公盛稱駒父詩有句法。故後篇及之。周益公題跋。

汪 應辰

應辰字聖錫。玉山人。紹興五年進士第一。孝宗朝歷吏部尚書翰林學士。出知平江府。卒謚文定。有集。

輓宣撫吳郡王

節義家傳久。艱難始見忠。一心惟徇國。百戰竟平戎。環列周廬肅。官儀道路同。細看麟閣上。誰得似初終。

太傅元功首。汾陽異姓王。恩榮兼二美。聲迹遠相望。名載風雲會。神遊水月鄉。維師空贈典。無復見鷹揚。

分韻送胡丈歸建康

先生高臥武夷巔。一旦趨朝豈偶然。報國自期如皦日。歸田曾不待來年。懷鉛共笑揚雄老。鞭馬今輸祖

遜先冊府風流久寥落送行始復有詩篇。以上汪文定公集

湯莘叟

莘叟字起莘寧化人紹興五年進士終饒州推官。

馬上吟

宿雨洗山新綠嫩曉風吹杏淺紅乾沙頭路暖日初上行客揚鞭不覺寒。

句

葛巾簪下無多髮茅舍門前有好山。幽居 以上汀州府志

孫起卿

起卿吳郡人紹興五年進士

江纂墓碑

家有古篆碑近自田家獲藏之五六年未甚見省錄古苔侵文理封結殆莫識偶然嗟其窮一一爲磨剔始若漫無文細尋適可讀文云晉江纂長夜垂茲刻貞石殊不用塊然但埏埴合葬無別銘背面書反覆一字不涉華本枝記明白二父遂兼書于迺乃宗嫡自注誌云養父諱本父迺也考諸晉史篇真是小出入字畫亦嶮勁然不類鐫斲漢魏尚豐碑茲獨何褊迫豈時丁喪亂不暇治品式于時義熙季處次實庚戌五胡剖中華典午竄南極苟簡理宜爾寧詒不孝責審訂昭昭然疑去喜自適歷年七百餘營爾駒過隙名節苟不傳埃化先疣石實茲當眼前用代銘几席

吳郡志江纂江遁子也木瀆孫起卿頃于天平山下地名上沙
獲墓碑乃以大方瓢刻之字畫俱存與石無異起卿爲賦詩

吳詠

詠字永言仙居人芾從兄紹興五年進士仕西安令有西安集

殊聖寺和孟戎幕韻

院靜僧疑少門幽客自稀山寒雲近屋逕狹石侵衣松鬢蒼鬚古薑芽紫筍肥騷人詩戰罷踏月夜深歸

台州府志

魯 告

告字季卿號冷齋海鹽人紹興五年進士仕至太府卿注杜詩行于世

樂郊私語杜少陵集自遊龍門至過洞庭詩目次第爲此州先正魯季卿編定大都一循少陵生平行跡可以見其詩法升降隨其年自少而壯而老愈入于細而化也

春詞

疊穎叢條翠欲流午陰濃處聽鳴鳩兒童賭罷榆錢去狼藉春風漫不收

詩林萬選

沈作喆

作喆字明遠吳興人丞相該之姪紹興五年進士嘗爲江右漕屬作哀扇工歌忤洪帥魏良臣道
弼据深文劾之奪三官有寓山集

哀扇工歌

黃州竹扇名字著。織扇供官困追捕。史君開府未浹旬。欲戴綸巾揮白羽。新模巧製旋剪裁。百中無一中。
程度。犀革鐫柄出蟲魚。麝煤熏紙生煙霧。叢山老姥羞翰墨。漢宮佳人掩紈素。衙內白取知何名。帳下雄
擎不知數。供輸不辨箠楚頻。一朝赴水將誰訴。史君崇重了不聞。嗚呼何以慰黎庶。聞道園家賣菜翁。又
說江南打魚戶。號令亟下須所無。官不與錢期限遽。歸來痛哭辭妻兒。宿昔投纏挂枯樹。一雙婉婉良家
子。吏兵奪取名爲顧。弟兄號叫鄰里驚。兩家吞聲喪其嫗。死者已矣可奈何。冤魂成羣空號呼。去聲殺人
縱欲勢位尊。貪殘無道天所怒。邦人蓄憤不敢言。君其拊馬章臺路。清波別志。

鵝按草居安梅磾詩話云。哀扇工詩不傳。今從清波別志檢得無名子哀扇工歌一首。當即是沈詩佚其姓名爾。陳直齋云。哀扇工詩屬而非諷。今讀之良然。仍以還沈。

鄭若谷

若谷、鄞人。紹興五年進士。

和潘良貴題明州三江亭韻

遠望登高萬象侵。元戎端不爲花尋。未誇駕鶴蓬山路。應壯斬鯨遼海心。小艇鱸肥盤膾玉。危闌客醉枕
揮金。中流擊楫雄圖遠。回笑三閭澤畔吟。延祐四明志。

關注

注字子東。景仁子灝弟。紹興五年進士。教授湖州。至太常博士。自號香巖居士。有關博士集。

記夢

元衣仙子從雙鬟緩節長歌一解顏滿引銅杯效鯨吸低回紅袖作弓彎舞留月殿春風冷樂奏鈞天曉夢還行聽新聲太平樂先傳五拍到人間

墨莊漫錄宣和二年睦寇方臘起幫源浙西震恐關注子東在錢塘避地攜家於無錫之梁溪明年臘就擒子東賀未能歸僑寓毗陵郡崇安寺古柏院中一日忽夢臨水有軒主人延客年可五十儀觀甚偉元衣而美須髯揖坐使兩女子以銅杯酌酒謂子東曰自來歌曲新聲先奏天曹然後散落人間他日東南休兵有樂府曰太平樂汝先聽其聲遂使兩女子舞主人抵掌爲節已而恍然而覺猶能記其五拍子東以詩紀之云云

松聲

夢破松聲枕上聞睡魔夜半戰吟魂初疑夜雨連江岸乍覺寒潮上海門招引好風來古寺追隨月色下前村晚行欲向聲來處鬱鬱蒼波盡日奔南窗紀談

句

鐘聲互起東西岸漁火遙分遠近村

春渚紀聞此余友關子東西湖夜歸所作非身到西湖不知此語形容之妙

夜長何時旦苦寒不成寐

強行父唐子西先生文錄關子東一日寓辟離朔風大作因得句云云以問唐先生云詩律雖不到對亦似不穩先生云正要如此一似藥中要存性也

朱敦儒

敦儒字希真洛陽人以薦起紹興五年賜進士出身爲祕書省正字兼兵部郎官遷兩浙東路提點刑獄上疏乞歸居嘉禾晚除鴻臚少卿有巖壑老人詩文一卷又有獵較集

二老堂詩話希真詩詞獨步一世秦丞相晚用其子某爲刪定官欲令希真教秦伯陽作詩遂落致仕除鴻臚少卿蓋久廢之官也蜀人武橫作詩嘲之未幾秦丞相薨希真亦遭臺諫高宗曰朕用明橐薦以隱逸命官置在館閣豈有始恬退而晚奔競耶其實希真老愛其子而畏避風逐不敢不起諭者憐之

小盡行

避地廣中作

藤州三月作小盡梧州三月作大盡哀哉官歷今不頑憶昔昇平淚成陣我今何異桃源人落葉爲秋花
作春但恨未能與世隔時聞喪亂空傷神竹坡詩話

絕句

輕陰小雨晚難收柳瘦梅窮卻似秋可恨水仙花不語無人共我說春愁

春怨

梨花雨送海棠風不借胭脂作小紅幾日無人吹玉笛鶯鶯飛入館娃宮以上後村詩話

絕句

青蘿包髻自行纏不是凡人不是仙家在洛陽城裏住臥吹銅笛過伊川

澄懷錄。陸放翁云。朱希真居嘉禾。與朋儕詣之。聞笛聲自煙波間起。頃之櫂小舟而至。則與俱歸。室中懸琴。筑阮咸之類。簷間有珍禽。皆目所未覩。室中籃缶貯果實脯醢。客至挑取以奉客。其詩云云。

句

過時不語鶯解事。怕客深藏魚見機。
人閒萬事老無味。天下四時秋最愁。
翦茅編鶴屋。篩米聚雞糧。
燈昏鼠窺硯。雨急犬穿籬。後村詩話

孫松壽

松壽。字嵒老。鄆縣人。紹興五年類試進士。嘗爲漢嘉守。除直祕閣。

觀古魚鳧城

在溫江縣北十五里。有小院。

野寺依脩竹。魚鳧迹半存。高城歸野壠。故國靄荒村。古意憑誰問。行人謾苦論。眼前興廢事。煙水又黃昏。
賦成都碧雞坊李氏石君。原注事見成都古今記。蓋湖石之最大而奇者。著名舊矣。

造化小兒斲山骨。幾年流落蛟龍窟。太湖一碧浸玻璃。瀾吞浪吐窮奔突。瑰奇未許困泥沙。漂出江臯空傲兀。清寒偃蹇如高人。冥向蓬蒿念埋沒。曩聞上苑饒奇珍。千形萬狀高嶙峋。當年搜索困山海。甌包席裏車鱗鱗。規模豈但肖五岳。氣象直欲凌三神。一朝胡馬窺城下。倒隨矢石荒荆榛。憐君分落幽人手。不逐爾輩汙塵垢。首陽寂寞伯夷清。瀟湘冷落三閭瘦。李侯胸中飽雲夢。得君不用斯瓊玖。館之舊隱與周旋。竹士松賓三益友。相看一洗名利心。眉宇更清元德秀。君今幾世德未衰。霜寒玉立癯而壽。咄嗟世眼多嗜好。玩形忘理十八九。奇章所蓄森琅玕。名標甲乙空紛然。到溉奇礓高峯嶧。一擲徒爲負進錢。石君

於汝非不厚較其所得無何有願公世濟此君爲不朽

以上成都文類

王

灼

灼字晦叔遂寧人嘗佐總幕有頤堂先生集

贈王道成

龍鍾健兒須如棘幼事秦府持鞭勒戰塵撲面心已灰徑上三峯弄泉石乾坤變化五百年人間未識地行仙布囊落魄荆州市丹經祕法爲君傳散盡千金何所有腹中氣作蛟龍吼功成直欲投紫霄尙愛岷峨山下酒年來我亦厭樊籠乞取微言爲指蹤君不見葉縣雙鳧綠嶺鶴古來度世多吾宗

夷堅志王道成先生者夔州人射利江湖間爲賈客政和六年忽遇異人傳內丹之妙遂破家從王鼎學道遨遊東西二蜀鼎亦時見荆南市中不與人交一談無能識其誰何者身長七尺廣目美髯狀貌如四十許人荆南父老自兒童時蓋已見之一

日與道成飲自通姓名曰吾洛陽人唐武德初事秦王爲御者奔走兵間後得仙法隱華岳山中以至於今酒酣別去不知所往道成本愚民不能從其詞訪大業武德中事且驗其是否紹興六年道成見王灼晦叔於金川講巖盟之好爲作古風一篇與之此篇見頤堂集中
不終言道成之究竟也

銅馬歌并序

郫城村民鑿古墓遂得一銅馬高三尺許制作精妙前簡池守景季淵取以歸中宵風雨輒聞嘶聲怪之不敢留移送佛寺紹興丙子予以事至成都黃伯淵見索作銅馬歌

君不見武皇逸志凌九垓。追風蹤影思龍媒。魯班門外立銅馬。天廢萬匹皆塵埃。又不見伏波將軍破交賊。歸來殿前獻馬式。據鞍習氣殊未衰。想見老子真嬰鑠。兩京翻覆知幾秋。只有山河供客愁。孤煙落日蠶叢國。出此神物于荒丘。千年黃壤誰作主。猶把歸心泣風雨。但恐一朝去無蹤。有似豐城寶劍化雙龍。

以上頤堂集

宋詩紀事卷四十五

錢唐厲鶚輯

仁和徐元杜勘定

陳淵

淵字知默。初名漸，字幾叟。南劍州沙縣人。瓘之從孫。紹興五年賜進士出身。累遷右正言。終宗正少卿。有默堂集。

錢清堰待潮

江潮來去自有時。扁舟閣淺心如飛。岸容霜竹青照眼。春信梅花香撲衣。天寒鄞江道路阻。歲晏錢清風俗非。故園回首二千里。落日看盡行雲歸。

題綠波亭

南浦江波綠。陽關柳色青。夕陽千古恨。分付短長亭。

寄內

明月向人圓。愛之不能睡。坐久風露寒。忽忽心如醉。念君一適我。所遇無歡意。況乃久別離。相思到夢寐。我生百不堪。謬學屠龍技。于今半世人。升斗亦未遂。賴有室中友。素懷隱居志。冒與梁伯鸞。扁舟共東逝。

天姥寺

浮雲作秋陰，細雨如朝霧。放形山水閒，意適無艱步。
忽遇古招提，空翠森回互。倚杖聽泉鳴，悠然不能去。

季修舍舟趨諸暨，謁劉元成，獨泛錢清江，有懷其人。

人遠牛羊暮，春深草樹滋。野橋低映水，浦岸曲縈籬。風雨江湖思，乾坤杖履疑。論心竟誰是，短棹欲何之。

邑中諸公見和再用前韻

看盡愁人萬點紅，曉來雙鬢白于茸。他時儻記江南夢，畫我黃梅細雨中。

錢塘江

潮頭駕月衝殘夢，水色浮空送峭寒。十幅輕蒲連夜發，不知身到海門山。以上默堂集

題善山院

拄頤長劍上凌煙，自古功名亦偶然。鍾鼎山林俱不惡，一瓢可飲盡吾年。延平府志

秦梓

梓字楚材，檜弟。歷知台秀袁太平常湖六州。除翰林學士，出知宣州，再移湖州，進資政殿學士，致仕。

溧陽貞女祠

史氏之女生寒門，白璧粲粲貞義存。上無所天漂爲業，春風三十報母恩。斬奢芟尙白日昏，子胥脫身閒道奔。遠來困窮乞于此，分以壺漿救虛餒。子胥還吳雪讐恥，貞女可憐身已死。一飯之德古必償，遺以千金投瀨沚。謫仙高才解幽沈，奕奕穹碑照江水。有客停舟臨古祠，涼颸動木興遐思。蕉黃荔丹幾千古，烹

萬悽愴若見之更憐其目人已去姑蘇臺上草萋萋貞烈集

鄭樵

樵字漁仲莆田人居夾漈山中自稱溪西逸民紹興中以薦召對給札歸鈔所著通志書成入爲樞密院編修官有夾漈遺稿

北山巖

西風洩洩片雲閑一夜寒泉臥北山倚杖巖頭秋獨望稀疎煙壠是人間

興化府志

黃公度

公度字師憲莆田人紹興八年進士第一簽書平海軍節度判官累仕考功員外郎有知稼翁集

悲秋

萬里西風入晚扉高齋悵望獨移時迢迢別浦帆雙去漠漠平蕪天四垂雨意欲晴山鳥樂寒聲初到井梧知丈夫感慨關時事不學楚人兒女悲

知稼翁集

包孝肅清心堂

千里有餘刃一堂聊賞心庭虛延遠吹簷敞受繁陰休吏簾初下忘懷機自沈人閒足塵土無路到清襟

分水嶺

嗚咽流泉萬仞峯斷腸從此各西東誰知不作多時別依舊相逢滄海中

肇慶府志

肇慶府志，黃公度爲祕書省正字，貽書臺官言者謂其譏訕時政，罷爲主管台州崇道觀，過分水嶺有詩云云。及公歸第，趙丞相鼎謫居潮陽，讒者傅會其說，謂公此詩指趙而言，將不久復偕還中都也。秦檜怒，令通判肇慶府。

題嵩臺二絕

四山如畫古端州，州在西江欲盡頭。
漫道江山解留客，老夫歸思甚東流。

松菊壺山手自栽，二年羈宦客嵩臺。
無端卻被東風誤，又作恩平一夢回。廣東通志

陳俊卿

俊卿，字應求，莆田人。中紹興八年進士。累遷尚書右僕射同中書門下平章事，兼樞密使。淳熙二年除少保，判建康府。以少師魏國公致仕。卒贈太保，謚正獻。有集。

共樂堂在興化軍治西州峯之顚，爲城中登眺勝處。

共樂堂前花木深，登臨當暑豁塵襟。
紅垂荔子千家熟，翠擁貲簮十畝陰。
老退已尋居士服，清歡時伴醉翁吟。
憑闌四望豐年稼，差慰平生憂國心。方輿勝覽

哭林艾軒

出爲嶺嶠澄清使，歸作甘泉侍從臣。
百擔有書行李重，十金無產橐中貧。
經旬把臂言猶在，昨日題詩墨尙新。
清曉訪君呼不起，寢門一慟淚霑巾。合璧事類續集

題夾漈草堂

流水三間屋，公曾半席分。
帝嘗招此老，天未喪斯文。
人去留青竹，山空只白雲。
升堂時想像，金石恍猶聞。

方 耆

耆字次雲。莆陽人。紹興八年進士。調閩清尉。召對除祕書省正字。補外卒。耆與鹽官施廷先遊。傳楊龜山之學。林艾軒亦定交焉。

癸酉冬赴部除夜宿信州客舍

隔屋青燈一點明。臥聽簷雨落三更。無因作得還鄉夢。門外兒童爆竹聲。

讀老子

且柅流沙青犢車。蔥蔥佳氣滿城闕。白頭不解家人語。枉學司空城旦書。

呈柔立兄

雞犬還家自識村。重營生理長兒孫。時平戰地逢華屋。歲久他鄉是故園。別後塵埃如我老。歸來耆舊幾人存。雁行疇昔從遊者。莫話凋零恐斷魂。以上林虯齋續集

寺中別林謙之兼寄諸鄭

遊從忘朝晡。尊酒輕招呼。笑語恣玩狎。翻覆雲雨疎。我友數君子。古心相與娛。每見輒賓敬。衣裳儼而趨。惡石寓規諴。美疢疾佞諛。深山足風雨。零落梅花株。亭亭巖上松。霜姿一何孤。感茲各努力。勿以歲事徂。

莆陽文獻

句

秋明河漢外。月近斗牛旁。

楊誠齋詩話。林謙之
嘗稱其友方次雲句。

山寒一杯酒。歲晚兩窮人。和鄭處易溪邊贈別。可惜聽泉夜。還當殘月時。游石泉

林虯齋續集

龔茂良

茂良字實之。興化軍人。紹興八年進士。孝宗朝累除敷文閣待制禮部侍郎。尋拜參知政事。安置英州。卒後復官謚莊敏。有靜泰堂集。

靈源菴

遲回不忍去。復作抱衾留。斷續雲閒雨。蕭騷木末秋。勞生那有此。漸老欲相投。最愛千山暮。鐘鳴處處幽。

莆陽文獻

王之望

之望字瞻叔。穀城人。紹興八年進士。孝宗朝附湯思退。拜參知政事。兼同知樞密院事。罷爲資政殿學士。知溫州。有漢濱集。

活溪中興頌碑

蜀日旣衰洛日亡。前星靈武騰光芒。元功百戰兩京復。萬里阿瞞歸故鄉。干戈紛紛徧四海。活碑已立湘江旁。太師艱難喜初定。作此大字龍鸞翔。紙摹繅搨四百載。家家傳寶踰琳琅。唐文中世未變古。燕許偶

儼爲班揚次山之文可也。簡此頌未追周魯商。祿山滔天等窮澆春秋之法誅無將。聘兵二字斥邊將。此語豈足懲姦強。末篇三章頗辭費。筆力不復能鏗鏘。磨崖勒銘亦何有。反復自贊乃爾詳。向來各人過許與舉世附和無雌黃。淮西仆碑無墨客。惜哉不得逢鍾王。

房公湖 在漢州。又名西湖。房琯上元閒爲牧。始鑿湖治平閒韓標序云。今亭館皆非房公時事。

金雁橋南二頃湖。房公遺墨未湮蕪。人遊杜牧晚晴賦。境對王維別墅圖。經始園林心自巧。折衝廊廟術何迂。當時只作幽人計。留得陳濤四萬夫。以上方輿勝覽

過石城

滄浪渡口莫愁鄉。萬頃寒煙落木霜。珍重使君留客意。一樽芳酒對斜陽。

江上危亭思黯然。追遊陳迹欲經年。別來西望應相憶。郢樹荆門共一川。

湖廣總志

陳長方

長方，字齊之，號唯室。福州長樂人。徙居吳中。紹興八年進士。終宣教郎。江陰軍教授。有唯室集。

題定武本蘭亭

昭陵一入見無從。鐫石猶將贊本供。八法典刑今在此。華山天外立三峯。不須苦恨厭家雞。自是鹽車後月題。弄筆數行書紙背。莫教人喚庾安西。此甥此舅兩風流。翰墨相傳不誤投。大似曹溪付衣鉢。臨池他日看銀鉤。

蘭亭續考跋。吾友胡少明教官以王文正家所得蘭亭惠其甥王立之定武石刻屢經牧守私易此本信非近年撫搨失真者所能考覈也。紹興乙卯上元日閩人陳長方齊之題于笠澤寓舍。

葛立方

立方字常之丹陽人徙吳興勝仲之子紹興八年進士隆興閒官至吏部侍郎有西疇筆耕韻語

陽秋歸愚集

避地傷春

洛陽宮闕半成灰草草花枝濺淚開國色天香消息斷妝臺誰奉紫金杯
石門連日動征鼙花柳無情自繞溪回首故園今好在杜鵑花落子規啼

新城道中

已去日邊遠宜春程尙賒呼童秣征馬帶月趁啼鴉橋斷復揭水路窮還渡沙誰能飾廚傳裏飯野人家

以上歸愚集

喜子鄰登第

吾家五世十三人競擷丹枝撼月輪慶歷賢科開後裔隆興儒業繼前塵泥金帖報家庭喜燒尾筵開帝里春從此傳芳應未艾桂香早已襲天倫

余居吳興泛金溪上暇日率同志拏小舟載魚鼈蝦蟹命五比丘誦寶勝佛名若十二因緣法作梵唄捨之溪中坐中有請作詩以紀事者余輒爲書云

漁師竟日漁水族作斤賣小捐使鬼兄滿載獲鱗介鯤鯨未易羅所得亦殊態青蛙盡公私朱鮒兼小大
霜鱸尙貫針土負或黏塊輪囷積文螺郭索走蒼蟹溼沫相响濡自分煮薑芥豈知惻隱人規作江湖貸
因呼小青翰收留舞澎湃趺坐延黑衣號佛指清瀨經飛流水篇流水長者事見金光明經梵起魚山唄傾盆
帶寒藻圉圉看于邁驚疑或依蒲喜躍或生喝快若鷹辭韻歡如囚破械定非校人池恐是餘不派願汝
藉佛力永脫鉤網債口腹聊爾耳香餌莫渠愛以上韻語陽秋

李 羲

羲字仁父號巽巖眉州丹棱人唐宗室曹王臯之後紹興八年進士孝宗朝歷官祕閣修撰同修國史拜禮部侍郎除敷文閣學士致仕卒贈太師謚文簡

從何使君父子遊墨池分韻得名字

成都縣治前有洗墨池揚雄草太元經處

蜀學擅天下馬王先得名簧如巧言語于道蓋小成子雲最後出振策思遐征斯文大一統歛使聖域清富貴盡在我紱冕非所榮旁皇天祿閣聊亦觀我生懷哉不能歸舊宅荒荆榛寂寞竟誰顧正路今莫行使君蓬萊仙弭節歸赤城門無俗賓客家有賢父兄慨念此耆老不登漢公卿臨池一尊酒尙友千載英拜呼嚴與李月旦共細評區區可無憾彼重適我輕謁來成都市塵土汙冠纓古人不可見見此眼自明請爲懷古詩玉振而金聲成都文類

客懷

寂寞三秋節淒涼萬里風關河盡形勝人物幾英雄秦葉隨流水周禾滿故宮此心懸象闕夢繞浙西東

久客厭塵土。幽居懷翠微。只餘清夜夢。長作故山歸。菊已開三逕。松應長十圍。晨鐘忽驚覺。猶有露霑衣。

曹氏歷代詩選

登金山

金山何處好。四顧不相連。窗迥前無地。波澄下有天。堂留三楚客。門泊五湖船。暝色關詩思。江籠兩岸煙。

金山志略

陳巖肖

巖肖字子象。東陽人。紹興八年以任子中詞科。仕至兵部侍郎。著庚溪詩話。

洗竹

直幹解新箨。低枝蔽舊叢。芟繁留嫩綠。引月更添風。庚溪詩話

范正國

正國嘗爲太和通判。

重經快閣

時紹興庚申閣燬獨跨牛菴存

僑寓窮滄海。心棲快閣間。煙雲浮四座。几席對千山。闌檻何由見。神明悵未還。興崇應有待。高躅付誰攀。

快閣紀存

王達

達壯節王公之孫。爵之子。

送田謌

兩地音塵隔死生。十年常效執珪吟。羨君已作遼東鶴。顧我空存魏闕心。日下旣蒙新眷遇。海邊休忘舊知音。儻憐萬里親庭在。爲向雲山處處尋。

蘆浦筆記。王復字景仁。淄川人。高宗詔公知徐州。黏罕寇徐。公領兵閉城拒守。城陷不屈。爲虜殺。凡閨門百口俱遇害。時建炎三年正月二十九日也。天子震悼。特贈資政殿學士。謚壯節。先是公長子佾以太僕丞從高宗過淮陽。紹興八年和好成奏乞訪先臣遺骸。優詔許之。行至泗州。馬上得疾暴卒。佾子達留淄川。南北隔絕。紹興十年承宣使田謌扈從顯仁太后回鑾。達以詩送謌云。云詩至而佾卒已一歲矣。聞者哀之。

洪

适

适初名造。後更今名字。景伯。皓長子。紹興十二年中博學宏詞科。孝宗朝歷尙書右僕射同中書門下平章事兼樞密使。提舉太平興國宮。卒。謚文惠。有盤洲集。

寧國寺

幾日山南北。端期汗漫遊。水痕秋雨過。竹色曉煙收。宦海何時了。僧房爲少留。卻尋歸去路。餘興漫回眸。
曉發泰安驛在臨海。

秋夢不能曉。起行山徑迷。小車驚宿鶩。列炬誤鳴雞。冷怯霜華重。光瞻斗柄低。金庭有佳處。芳桂想幽棲。

題三瑞堂

久矣馳魂夢。今登三瑞堂。故山有喬木。近事話甘棠。展驥慚充位。占熊憶問祥。白雲留不住。極目是吾鄉。

以上盤洲集

方輿勝覽洪公弼爲寧海主簿時建適以荷花桃實竹幹有連理之瑞已而生适故适以貳車行縣題詩云云

書懷

早歲那知世事艱中原北望氣如山樓船夜雪瓜洲渡鐵馬秋風大散關塞上長城空自許鏡中衰鬢已先班出師一表真名世千載誰堪伯仲閒詩林萬選

洪 遵

遵字景嚴皓仲子與兄适同中博學宏詞科賜進士出身歷徽猷閣直學士出知平江府孝宗朝召除翰林學士承旨拜同知樞密院事江東安撫使資政殿學士提舉洞霄宮卒謚文安有小隱集

丁香花

來自丁香國還應世所稀叢生盛花葉亂結胥巾衣冷豔瑤爲色低枝翠作圍蔓連疑鎖骨時見玉塵飛

全芳備祖

洪 邁

黃介 許子紹

邁字景盧鄱陽人皓季子紹興乙丑中博學宏詞科孝宗朝累遷中書舍人兼侍讀直學士院拜翰林學士進煥章閣學士知紹興府以端明殿學士致仕卒贈光祿大夫謚文敏有野處類稿容

齋五筆·夷堅志·萬首唐人絕句行于世。

四朝聞見錄·洪邁歸鄱陽與兄丞相適酬唱觴詠于林壑甚
適偶得史氏瑞花種之別墅名曰瑞野樓曰瑞圃園曰瑞圃

秋日漫興

江湖久客日思家。坐覺微霜上鬢華。節序又催秋後雁。風光爭發雨前花。倦遊已夢莊生蝶。不飲何憂廣
客蛇。怪底朝來衣袖薄。一川白露下蒹葭。

一夕西風木葉飛。畫梁落月淡餘輝。銀燈夜照還家夢。金剪親裁寄遠衣。霜信早隨新雁至。素書深訝故
人稀。無因爲謝東曹掾。鱸熟蓴香莫使歸。野處類稿

鎖院同葉晦叔作兼簡謝景思。紹興十九年晦叔爲福建帥屬予嘗因春補諸生白于府主邀與同考校鎖宿貞院兩旬。
沈沈廣廈清如水。市聲人聲不到耳。一閑十日豈天賜。慙媿紛紛白袍子。相逢更得金玉人。久矣眼中無
此士。連牀夜語不成寐。往往雞聲忽驚起。是中差樂真難名。昔者相遇安得此。但憐時節不相謀。正墮清明寒食裏。梨花已空海棠謝。外閒物色知餘幾。只恐風雨摧折之。負此一春吾過矣。謝公尋山飽閑暇。應
笑腐儒黏故紙。錦囊得句應已多。萬一相思頻寄似。容齋三筆

車駕宿戒幸玉津園命下大雨將曉有晴意已而天宇豁然至晚歸邁進一詩歌詠其實

五更猶自雨如麻。無限都人仰翠華。翻手作雲方悵望。舉頭見日共驚嗟。天公的有施生妙。帝力堪同造
物誇。上苑春光無盡藏。可須羯鼓更催花。容齋五筆

和朱子淵賦石柏

海底靈根石效奇。山經地志不曾知。
凝紅幻出珠千顆。染紫裝成玉一枝。
鶴骨龍姿隨質見。鸞棲鳳宿與
香宜元戎高唱真難和。媿我年來筆力衰。
夷堅志赤城志

寄題兄景伯清閑堂

台州通判廳

昔聞王子猷借宅亦種竹。此君固可喜。人亦清不俗。
伯氏貧而癯。一飯不飽肉。堂前自經始。護此無盡綠。
一官歲強半餘日。如轉燭。待其長稚子而已。牽歸轂。
何由享嘉蔭。償我志願足。應煩彼邦人。日報平安福。

王龜齡王嘉叟木蘊之同過小園用郡圃植花韻

節到中和暖尙賒。東風隨後起芳華。
自慙翳翳松三逕。相對蕭蕭馬五花。
老去醉鄉爲日月。年來痼疾在煙霞。
午橋別墅歸公手早定淮西取白麻文翰類選

泛舟遊武夷九曲

武夷之山如畫圖。中有玉洞藏仙都。
一溪穿空舞澎湃。九曲度盡方盤紆。細看直疑路中斷。已轉始覺川
平鋪。諸峯削成烏亦怖。危磴豈復人能踰。機巖學館第傳授。鼓樓石牀知有無。
坐令丹梯化一鶴。又喚立笱成三姑。遊人來觀但借問。道士指說猶驚呼。神君曾孫在何許。
想見幔亭空藥爐。千崖萬壑心賞倦。正喜松風清坐隅。歸舟瞥然箭脫手。醉目眩我雙明珠。
武夷山志秀川館聯句并序

鄱陽洪遇景盧還自衡岳道宜春買舟東下永嘉方雲翼景南置酒秀川館餞之邵武黃介景達開封向瀟巨源歷陽許子紹季韶與焉坐中屬聯送行且強景盧同之人賦十許韻賓主皆醉不復續惟巨源止酒不開涓滴獨又唱出八十字以成章且書之明日以遺景盧云紹興二十七年九月乙亥景南序

江聲牀搖寒山色窗拗綠方歸舟著沙邊客夢遙鄉曲洪簪盍豁秋悲筵開從夜卜黃黃花散疎籬蒼竹圍破屋向詩豪爭擊銅談劇屢消燭許借君五言城洗我愁萬斛方主人意無窮客子去敢速洪杯寬怯鯨吞詞澀媿貂續黃注瓦亦傾銀聯珠仍綴玉向天迴月明洲霜清風慍木許飛齊水擊鵬揮退日斜鵬方臭味漆投膠芬芳蘭閒菊洪味甘一鬱嘗話勝十年讀黃未用賦驪駒方看舉鴻鵠向行當歲九遷勿憚晝三宿許妙語子蟬嫣孤蹤吾鹿獨方一老上星辰三君進鳬鶩洪平生仰高山此夕宿賸馥黃飛龍十九章金馬三千牘向儻非論石渠定是讌天祿許筆健翻狂瀾辯雄噴飛瀑方抄傳疲小胥侍立倦更僕洪力舉六鼈連肘運千兔秃方庖廚洗玉盤萍豆鄙金谷向豈無麟脯羞亦有熊蹯熟同上不須羅羶葷安用窮水陸許搜尋到蹲鳩飮釘兼苜蓿方但畏酒樽空寧知更漏促黃勑頻難固辭意厚敢虛辱許一一罄鉢罍紛紛吐茵蓐方茶甘旋汲江火活乍然竹向聊烹顧渚吳更試蒙山蜀洪清風生玉川石鼎壓師服黃忍醉興方新語離情轉篤洪明朝轉船頭西風飽帆腹黃去櫓響嘔啞歸車聲轔轔累突諒難黔曹裝行復促便揚武林鏹勿戀番江築聖神攬權綱賢俊登肅穆向君恩晉接三臣職坤用六方夷路合騰驤上心資啟沃許吾道竟何憂斯文欣有屬洪執政猶股肱天官乃眉目當培紅藥翻規地青蒲伏

遙知此數途歷徧財一蹙長吟美且箴細酌壽而祝端期千一逢毋諱再三瀆德進朝廷尊河潤京師福前修庶拍肩能事當繼躅君無廢此篇隨車編卷軸向袁州府志

句

天上長留膝六在人間會有葛三來

困學紀聞野處雪句葛三事

出太平廣記葛仙翁第三子

向

瀟

瀟字巨源開封人有葵齋雜稾

從吳傅朋遊芝山登五老亭以駕言出遊分韻賦詩得駕字

茲山何巍巍氣欲等嵩華從公二三子勝日飽閑暇躋攀謝車輿自辦兩不借捫蘿覓幽磴行椒得孤榭側送夕陽移俯視高鳥下登臨記曩昔歲月驚代謝卻數一周星復命千里駕身從泛梗流事與浮雲化揭來共一尊似爲天所赦明發還問塗合離足悲咤

題吳傅朋遊絲書

先生著名節百世追延陵我評先生賢不以能書稱功成磨蒼崖盛德頤日昇勿書凌雲榜華顛踏高層以上容齊三筆

雲翼、字景南。永嘉人。

題寶積寺

暫脫塵闐馬足埃。僧窗高臥白雲堆。青山影裏春醒解。黃鳥聲邊午夢回。坐嬾且推書冊去。吟清時喚茗甌來。要知門外無車轍。十日新生一逕苦。袁州府志

李端民

端民、字平叔。

和元微之春遊韻。寄洪景伯。

東閣經年別。窮愁客路難。望塵驚岳峙。懷舊各雲散。茵醉恩逾厚。檣欹興未殘。馮唐嗟已老。范叔敢言寒。玉燭調魁柄。陽春在筆端。應憐埽門役。白首滯江干。容齋五筆

葉南仲

紹興乙丑仲春遊崧臺作

斗峯遙憶舊崧臺。爲勸農耕特地來。短李高名光翠壁。僞劉陳迹沒蒼苔。洞天日永風埃淨。巖壑雲收霽色開。好景最宜供宴樂。操觚欲賦媿非材。崧臺石室志

胡憲

憲字原仲。文定公從子。紹興中貢入太學。賜進士出身。授左迪功郎。添差福州教授。以母老求監南嶽廟歸。起爲福建路安撫司屬官。復請祠。秦檜方用事。家居不出。檜死。以大理司直召。未行。改

祕書正字既至病不能朝詔改秩與祠歸卒學者稱籍溪先生。

答朱元晦

幽人偏愛青山好爲是青山青不老山中出雲雨太虛一洗塵埃山更好。

濂洛風雅朱子跋云右衡山胡子詩也初紹興庚辰某臥病山間親友仕于朝者以書見招某戲以兩詩代書報之曰先生去上芸香閣閣老新我多角冠留取幽人臥空谷一川風月要人看甕牖前頭列畫屏晚來相對靜儀刑浮雲一任閑舒卷萬古青山只麼青或傳以語胡子子謂其學者張欽夫曰吾未識此人然觀此詩知其庶幾能有進矣特其言有體而無用故吾爲是詩以箴之庶其聞之而有發也明年胡子卒又四年某始見欽夫而後獲聞之恨不及見胡子而卒請其目也因敍其本末而書之于策以無忘胡子之意云

胡宏

宏字仁仲文定仲子幼事楊時侯仲良卒傳其父之學紹興中以廩補右承務郎卒學者稱五峯先生有集

題上峯寺

百年身似客浩蕩世閒遊入望青山好夢魂偏我留我家巫山十二峯浮江直過巴陵東瀟湘水與蒼梧通環遶衡嶽青冥中扁舟白雲不可度杖藜蠟屐乘春風山光浮動可攬結雲舒霞卷飛煙虹深巖大壑翠巘崿足力已到心無窮羣峯迤邐勢不競上盡祝融五千仞祝融峯高天更高太空人世如牛毛風雲

萬變一瞬息。紅塵奔走真徒勞。

西林寺廓然堂有懷

超然峯頭秋氣清。廓然堂延秋月明。我乘清秋弄明月。中有所感思冥冥。峯勢凌蒼穹。上有煙林封去天。
不盈尺。路斷心忡忡。虛名過耳如松風。以上五峯集

李侗

侗字愿中。南劍州劍浦人。從羅仲素遊。學者稱延平先生。謚文靖。有語錄行世。

和靜菴山居

勝如城市宅。花木擁簷前。一雨曉來過。羣峯翠色鮮。採荆烹白石。接竹引清泉。車馬長無跡。逍遙樂葛天。
延平府志

李繪

繪字參仲。號鐘山。婺源人。所著有論語西銘解義等書。朱子尊稱之。

曉步

曉步閑隨蛺蝶行。村南村北雨新晴。山花野草自幽意。布穀一聲春水生。
新安文獻志

張元幹

元幹字仲宗。長樂人。向伯恭之甥。紹興中。坐送胡邦衡詞得罪除名。有蘆川歸來集。

苕溪漁隱叢話余宣和閒居泗上于王周士處見張仲宗詩一卷因備錄之後三十年于錢唐與仲宗同館穀初方識之因戲謂仲宗曰三十年前已識公于詩卷中仲宗請余舉其詩渠皆不能記反從余求之

夜宿宗公丈室求詩甚勤爲賦五字

林表登層閣秋聲聽暮鐘鴉鳴苦竹寺雨闌亂雲峯屢乞留新句重來訪舊蹤松門罕車馬似喜老夫逢次韻晁伯南飲彥達官舍心遠堂

今夕知何夕真成累十觴爐薰飄月影蜜炬剪花香政嬾還詩債無從發酒狂故人憐久客舞袖要須長
以上蘆川歸來集

瀟湘圖

落日孤煙過洞庭黃陵祠畔白蘋汀欲知萬里蒼梧眼淚盡君山一點青艇齋詩話

鄭汝諧

汝諧字舜舉青田人紹興中進士官吏部侍郎徽猷閣待制致仕有東谷集

題盱眙第一山

忍恥包羞事北庭奚奴得意管逢迎燕山有石無人勒卻向都梁記姓名

齊東野語南北通和時聘使往來旁午于道凡過盱眙例遊第一山酌玻瓈泉題詩石壁以紀歲月遂成故事鐫刻題石幾滿紹興癸丑國信使鄭汝諧一詩可謂知言矣

題石門洞

每移征棹並雲根。便覺幽懷謝世喧。皓色飛來天際雪。紅塵不到水邊門。破荒康樂名猶在。紀勝元章字不存。但有好山容老子。何須更訪武陵源。括蒼集紀

蘇雲卿

雲卿廣漢人。與張魏公浚爲布衣交。紹興閒。結廬南昌之東湖灌園。織屨自給。人稱曰蘇翁。浚爲相訪知所在。馳書函金幣。屬洪州帥漕禮致之。翁力辭不可。期以詰朝上謁。比遣使迎之。則局戶閭然。排闥入。則書幣不啟。家具如故。翁已遁矣。

還張德遠書幣題詩蔬圃壁閒

多年別作一番風。誰料聲名達帝聰。自有時人求富貴。莫將富貴汙蘇公。四朝詩

米友仁

友仁一名尹仁。字元暉。自稱嬾拙老人。襄陽人。芾之子。紹興中擢工部侍郎。終敷文閣待制。

畫繼云。米友仁元章之子。幼年山谷贈詩曰。我有元暉古印章。印刲不忍與諸郎。虎兒筆力能扛鼎。教學元暉繼阿章。遂字元暉。宣和中爲大名少尹。所作山水草草而成。不失天真風氣。每自題曰墨戲。被遇光堯。旣貴。甚自祕重。衆嘲之云。解作無根樹。能描懵懂雲。如今供御也。不方與閑人。

題禊帖

圖契朴璫推聖智。萬古奔沈餘末伎。蘭亭醉墨更無加。始信功名皆儻爾。庾翼兒郎豈不黠。自是家雞慙

野雉退之強聒六藝疎見處纔能到姿媚相公有官那得取不與官家深自祕卻因同好露心胸謾使蕭郎誇末計摸金不必曹阿瞞溫韜家有昭陵器披沙只恐取黃金剔軸誰能收故紙天章寶塔高嵯峨永表文皇好文藝至今油蠟傳未休善本何辭萬金棄蘆浦筆記

題定武本蘭亭

翰墨風流冠古今鵝池誰不賞山陰此詩雖向昭陵朽刻石猶能直萬金紹興十六年歲次丙寅姍拙翁米元暉在行朝天慶觀東私居之北窗跋蘭亭續考

自題大姚村圖

廣文當日官雖冷可奈才名振世何他日君家須炙手而今聊復雀堪羅老年尚喜管城子更愛好山江上青武林秋高曉欲雨正若此畫雲冥冥紹興戊午季春十一月書于大姚五湖田舍

自題山水

霄壤千千萬萬山東南勝地熟躋攀古人作語詠不得我寓無聲縑楮閒紹興己未除守鄆鄉待次平江寓居大姚村妹家戲作

寓意編按米氏襄陽人而宋史以爲吳人觀海岳撰樂圃墓表云予昔居郡興先生遊今觀畫跋則米老父子皆嘗居吳故其女嫁大姚其實非吳產也

題董源夏山圖

崇山過新雨。蒼翠濃欲滴。林深不通人。溪迴有吟客。日落古道空。天青暮雲碧。何處一聲蟬。幽棲仍自得。

題自畫橫披與翟伯壽

山中宰相有仙骨。獨愛嶺頭生白雲。壁張此畫定驚倒。先請喚人扶著君。以上清河書畫舫

司馬端衡

端衡溫公後人。與米元暉同時。

題自畫杜詩意圖

潺潺石澗溜

峯迴石路轉。足可娛瞻聽。其中如有屋。便是醉翁亭。郁氏書畫題跋記

吳 蒂

蒂字明可。自號湖山居士。台州仙居人。紹興中進士。孝宗朝歷官禮部侍郎。終龍圖閣直學士。卒謚康肅。有湖山集。

見市上有賣海棠者。悵然有感。

連年蹤跡滯江鄉。長憶吾廬萬海棠。想得春來增絕麗。無因歸去賞芬芳。偶然擔上逢人賣。猶記樽前爲爾狂。何日故園修舊約。贋燒銀燭照紅妝。海棠譜

和胡經仲卽事

世事憑誰論。羈懷只自誦。風煙悲蜀魄。桑柘老吳蠶。晚步惜殘照。春衫怯曉嵐。日來鼙鼓近。牢落愈無堪。

赤城詩集

北望二首

延福池臺荆棘深，上皇無復更登臨。
寂寥崇觀當年事，愁絕關河萬里心。

漠漠黃雲塞草稀，年年空說翠華歸。
孤臣淚盡仍嘗膽，白首江湖雁北飛。

台州府志

熊克

克字子復，建陽人。紹興進士。累除起居郎兼直學士院。

壽芮祕書三首

帝調玉燭召春還，仙袂同時度九關。
萬品欲需何處得，東風今起道家山。
歸來未對小延英，便向蓬萊作主人。
要督仙宮讎玉籍，卻收衆妙入經綸。
冊府都無未見書，毫端萬斛瀉明珠。
若爲池上星辰履，謾與瀛洲作畫圖。

翰墨大全

沈樞

樞字持要，一作持正，德清人。紹興閒登第，歷官太子詹事。

百福寺孝豐縣東南

築室最高處，軒窗八面通。
鑿山流乳液，開戶納薰風。
巾履隨涼設，茶瓜與客同。
我來資解悞，不羨楚王雄。

仲并

并字彌性，江都人。紹興中進士。歷光祿寺丞、淮東安撫司參議。有浮山集。

句

政恐崖州如有北卻應未宜受讒夫。

困學紀聞仲彌性詠韋執誼不
看嶺南圖詩誅姦誤之蕭斧也。

唐文若

文若字立夫眉山人庚之子第進士仕至直敷文閣知溫州遷中書舍人孝宗朝參贊張浚都督府軍事卒。

登金山

江流出岷蜀萬折東南傾茲山若巨舫勢欲扼滄溟天高象教尊海岳朝百靈雲水渺四極下上涵日星朱甍倚霄漢倒影魚龍驚重遊十年舊挂席鷗鳥驚維揚魏公幕回首劍戟明行都望北固鐵甃高崢嶸孤舟繫煙月六尺僧窗橫印師支遠儔靜對如風鈴曠懷憐此翁得法世慮平塵勞霜鬢禿風月冰壺清乞詩寫崖壁指月雙浮萍金山志略

陳世守

世守字端厚崑山人

紹興壬申五月臥病東禪之北窗惟庭柯相對手植綠橘枇杷皆森然出屋枇杷已著子橘獨十年不花各賦一詩鶴按此首又見范成大集

枇杷昔所嗜。不問甘與酸。黃泥裹餘核。散擲籬落間。春風拆句萌。樸櫟如榛菅。一株獨長成。蒼然盛屋山。去年小試花。瓏瓏犯冰寒。化成黃金彈。同登桃李盤。大鈞播羣物。斡流不作難。樹老人何堪。挽鏡覓朱顏。頷髭爾許長。大笑敲巾冠。

綠橘生西山。得自髯翁家。云此接活根。是歲當著花。俛仰乃十霜。垂蠹紛相遮。芳意竟寂寞。枯枝謾槎牙。風土諒非宜。翁言豈余夸。會令反故山。高深謝汚邪。石液滋舊根。山英擢新葩。黃團挂霜實。大如崆峒瓜。當有四老人。來駐七香車。岷山雜詠 鶻按二首又見范成大石湖集

宋詩紀事卷四十六

錢唐厲鶚輯
歙洪振珂勘定

周紫芝

紫芝字少隱宣城人紹興中登第歷官樞密院編修右司知興國軍自號竹坡居士有太倉稀米集及竹坡詩話

方萬里跋少隱嘗謂作詩先嚴格律然後及句法得此語於張文潛李端叔

越臺曲

玉顏如花越王女自小嬌癡不歌舞嫁作江南國主妃日日思歸淚如雨江南江北梅子黃潮頭夜漲秦淮江江邊雨多地卑溼旋築高臺勻曉粧千艘命載越中土喜見越人仍越語人生腳踏鄉土難無復歸心越中去高臺何易傾曲池亦復平越姬一去向千載不見此臺空有名

方輿勝覽在建康府縣西七里今尉廳後故老相傳云昔越王女嫁於此懷土思歸故越王築臺以居之慰其懷土之思

秋蘭

宋詩紀事 卷四十六

藝蘭當九畹，蘭生香滿路。
纵君身上衣光明，奪縑素孤芳一衰歇。
凋零溼秋露，佩服君子心。亦足慰遲暮。

弔洪氏女并兩侍兒

就死由來不自疑，玉顏那爲賊鋒低。
了知今日投淵婦，猶勝當年斷臂妻。
敵騎駿駿戰艦驕，春江漫漫溼金翹。
但將紅袖供歌舞，卻爲周郎笑二喬。

梁溪漫志：中興死節之士固不乏，而女子守節者亦多有之。洪鴻父羽之女，適繁昌焦浦，一日遇巨盜於江中，欲逼之，女義不受汗，投江而死。兩侍兒大曰宜恩，小曰匀奴，姓吳氏，女兄弟也，俱有色藝，亦相隨赴水死。焦之甥徐伯遠傳其事。竹坡周少隱爲之賦二

詩云云

黃文若攜秦別駕侍兒像見過戲題二絕

能事空傳王右丞，句如徐庾轉難名。
明眸正似溪光樣，自古無人畫得成。

謝家林下小梅花，不著紅藍染絳紗。
莫笑畫師無國手，玉肌元不愛鉛華。

題錢少愚四畫

鶯浦、

一點傷春恨，看成兩鬢霜。
如今無此夢，莫畫兩鴛鴦。

釣雪

一作東吳去，回頭又十年。
可憐江上雪，空落釣魚船。

蘭亭

事去空千載。何曾有若人。只應煙樹裏。便是水和春。

秋觀

雨足三湘岸。煙含七澤秋。可能無尺地。分得庾郎愁。以上太倉稀米集。

題淨空院

誰穿巨石貯清泉。不見超公舊講筵。龍伴白雲歸寶藏。魚隨流水下春田。咸淳臨安志。

元忠作胡人下程圖

單于獵罷臥錦紅。解鞍休騎荒磧中。蒼駒騶駠六十四。隱谷映坡分尾驥。九駝五牛羊頗倍。沙草晚牧生寒風。貴賤大小只五百。執作意態皆不同。二鷹在臂二鷹架。駿犬當對能爭功。氈廬鼎列帳幕擁鼓角。未吠驚塞鴻。上山高高置烽燧。毛囊貯獲閑刀弓。水泉在側挹其上。長河杳杳流無窮。素紈六幅筆何巧。胡瓊盡妙誰能通。今日都城有別識。別識共許劉元忠。

許貴州出蘇叔黨樹石

老坡騎鯨上天去。小坡落筆如風雨。能添老樹著巖閒。爲石傳神自翁語。兩坡俱死真可惜。君有一拳何處得。誰向九原呼此翁。爲我五日畫一石。以上聲畫集。

題湖上壁

寒食風埃滿客巾。西湖煙雨送愁頻。日高未起鳥呼夢。春晚不歸花笑人。前賢小集拾遺。

戲作小詩用少陵事

百尺寒松老幹枯，韋郎筆妙古今無。何如莫掃鵝溪絹，留取天吳紫鳳圖。

竹坡詩話：使少陵尙無
恙，當爲我一捧腹也。

句

設客元無琴裏曲，供官尙有篋中詩。

太倉稊米集云：東坡嘗言古今語未有無對者。琴家謂琴聲能娛俗耳者爲設客曲。頃時有作送太守詩者，僕嘗問之，其人曰：此供官詩不足觀。于是設客曲乃始有對。戲作俳體詩云云。

關耆孫

耆孫，字壽卿，蜀人。紹興閒進士。官著作佐郎。

送劉朝美侍郎歸蜀

清議久不作，世無公是非。祇因翻故紙，不覺蹈危機。東壁夢初斷，西山蕨正肥。十年成底事，贏得載書歸。

庚溪詩話：兵部侍郎劉朝美，儀鳳蜀之普州人。性酷嗜書，喜傳錄。初以禮部侍郎攝祕書少監，後卽真。凡祕府書傳寫殆偏，如國史之類，又置副本，親自校讎。至杜門絕交，遷兵侍衛，猶傳寫不絕。張持國之綱爲副端，言其書辭至曠廢職事，以是罷歸蜀。關

壽卿以詩贈行。鶴按：宋史劉儀鳳傳亦載此事。

劉
惆

惆字寬夫吉水人沈孫紹興進士官至待制

青原臺在廬陵郡西射圃東南隅

春臺百尺枕蕪城傑檻層軒入紫清坐嘯風雲生畫棟劇談河漢瀉朱甍山圍蘭若青螺遠江帶蘋州白練橫挂席會凌南斗去羽人遼海看騎鯨

豫章詩話

陳鵬飛

鵬飛字少南永嘉人紹興進士官太學博士崇政殿說書忤秦檜謫居惠州卒有羅浮集

文獻通考陳氏曰秦檜子燝嘗從之游在禮部時燝爲侍郎文書不應令鵬飛輒批還之燝浸不平鵬飛說書崇政殿因論春秋母以子貴言公羊非是檜怒謫惠州以歿

贈邑管察推陳仲輔

幕下誰人識呆之微聞贊畫向蓮池登樓不恨鄉關遠拄笏只言山色奇直道自能消鬼魅高人何處不軒羲佗年坐上話銅狄可是蓬萊清淺時

惠州府志

唐仲友

仲友字與政金華人登紹興進士復中宏詞科累官知台州爲同官高文虎譖于提刑劾罷主管武夷沖道觀有說齋集

遊蓋竹山在台州臨海縣

藍輿東出初雨收。衆山捲霧奔蒼蚪。麥田幪幪連千疇。去年見種今有秋。農家榦大卽快活。使君不去能無羞。春光欲盡誰挽留。千林薿薿新綠柔。桐花遠近澹無色。自開自落那關愁。洞天爲我暫晴霽。使我蠟屐窮冥搜。天門發秀萬馬下。水口離立羣峯稠。瀑泉對面瀉絕壁。寶劍卻倚丹鳳樓。溪聲噴薄雷震動。石色古怪神剜鏤。洞門豁豁風颶颶。香爐峯下蛟龍湫。中岑特秀小爲貴。左右旌節森戈矛。幾時祕奧一日睹。談笑指示君知不。精廬但欲占勝處。專事棟宇非良謀。飛閣跨水納佳氣。突兀殿堂居上頭。軒窗高下有奇致。洗滌肺腑明雙眸。我將于此棲羽流。鳳笙鶴駕應來遊。丹成一舉凌九州。下視濁世如浮漚。靈祠款謁路阻脩。層巖傾澗邃且幽。經營輪奂亦未就。揮金爾助何須求。晚雲漠漠鳴雨鳩。僕痛泥滑吾欲休。虹橋列炬趣歸騎。城鼓已報初更籌。追攀別乘聊復爾。乘興何如王子猷。習池不爲倒載去。兒童不用拍手攔街謳。赤城志

折彥質

彥質字中古。雲中人。涇原帥可適之子。紹興閒官樞密使。爲趙鼎所薦。秦檜指爲黨。謫昌化軍。後移郴州復官。

過太平州拜李端叔遺像

東來遂數月。弛擔已渺茫。猶喜蓄身獲。登先生堂。肅衣拜遺像。依然雙頰光。宛若侍坐側。妙語發天藏。厄窮出天意。人理難度量。所幸言不朽。與世爲文章。齋此復何恨。私淑良不忘。小郎出見我。問知雛鳳凰。他年起門戶。塵滓濯秋陽。世事幾變滅。人生真黃梁。置之不足道。感慨涕淚滂。我行方有程。墳山空相望。

跋浯溪造極圖

浯溪未到已登臨。筆力能窮造化心。我是零陵新逐客。披圖一一可追尋。

跋湘西清絕圖

與山分淺正傷神。蠟屐明朝陌上塵。誰寫湘西清絕景。巧移林壑慰行人。以上聲畫集

湘山

寓久渾忘客。臨行似別家。途窮身更怯。秋老鬢先華。生計黃茅合。歸期碧海賒。湘山今夜雨。留我意無涯。

桂林府志

超然亭

超然亭上鬢毛斑。浩蕩秋風小立閒。豈爲詩情堪過海。祇緣腳力要尋山。峭峯斷續天容缺。高壘繁紜地勢慳。回首不堪東北望。桂林萬里是秦關。粵西詩載

謝許君瑤

東坡遺物來歸我。兩手摩挲思不窮。舉取吾家阿堵物。愧無青玉案酬公。

廣東通志。東坡移廉州。以茶孟惠許君瑞。後爲折樞密所得。有詩謝許云云。

何耕

耕字道夫。紹興中守蜀之嘉州。有惠政。與何逢原孫松壽宋誨號四循良民繪像祀之。

青羊宮 按趙閔道成都記載宮乃老子乘青羊降其地今有臺存焉

一再官錦城。咫尺望琳宮。未始得得來。正墮役役中。今朝弄晴雨。策蹇隨春風。頗愛意象古。停驂小從容。

題龍華佛閣

西川鑿山三大像。突兀皆在江之湄。脩覺九頂見略盡。獨此恨未瞻容儀。竭來勝地了疇昔。輕軒瘦馬相追隨。百尺金軀信雄傑。三乘寶閣何瑰奇。燃犀不用照幽鬼。擊鼓自合趨馮夷。前人開創願力廣。下與舟楫扶傾危。六月灘濤劇奔吼。一分性命爭毫釐。篙工落膽行者泣。彈指乞活天人師。人心狎水水多禍。佛力在人人不知。慈悲但作布施想。江神雖怒將何爲。

普通山距府東十數里。青州禪師洪杲道場也。自龍華歸過之。棟宇頽落。僧徒鄙野。良爲可惜。是夜雨大作。因書所聞所見爲長韻。

錦城之東山培塿。突起伽藍壓山口。入門氣象頗不凡。在昔規模定非苟。黃絹碑詞著眼看。青州老衲知名久。自披榛徑結茅屋。不翦霜華散蓬首。市門有女捧巾盥。衣械無花生穢垢。至今一轉鵠鵠語。散作諸方獅子吼。祖燈寂寞何人繼。窣堵岩峩惟鬼守。法席草長深沒膝。僧榻屋穿光見斗。似聞占籍多衍沃。合選名縉振頽朽。我來不覺三歎息。眼底盡空諸所有。自開庵席掃塵坌。聊寄閑眠憩奔走。夢回中夜雨鳴櫓。臥聽東風寒入牖。明朝散步轉山脊。好語相呼聞野叟。抽芒已見麥翻浪。擣麪懸知香滿手。須臾日影

散林樾。絢練春光被花柳。僕夫催歸屢不應。景物殊佳寧忍負。出山騎馬更躊躇。乘暇應須重載酒。以上
成都文類

李彙

彙。紹興中添差台州通判。

游九鎖山

何人能識洞中天。勝地興從漢武年。石作雙門標俗駕。路爲九鎖折溪泉。四山松檜相迴合。五洞煙霞暗接連。浮世功名何日已。挂冠來結此山緣。洞霄詩集

鄭昌齡

昌齡。紹興中太府寺主簿。

李忠定公挽詩

炎圖第一相蕭公。王謝風流愧下風。力正君臣先僞楚。不將金帛問和戎。輸忠自昔忘夷險。注意如今見始終。駐馬佳城天莫問。寒空慘淡沒孤鴻。梁溪集附

吳岡

岡。紹興中閩縣尉。

李忠定公挽詩

夢卜庸真相。艱難倚大儒。英風起衰懦。直氣懾姦諛。琳館終高臥。燕然漫壯圖。哀榮看贈典。猶足慰寰區。

宋詩紀事 卷四十六

頓起

起汝南人紹興中提點西川刑獄

贈成都寓舍賢婦二喻詩

嘗聞趙清獻恤孤慰亡友至今西蜀人談美不容口二喻出儒家清貧一無有零丁依老母破屋僧堂後相對誦詩書未嘗窺戶牖圭折玉彌方山寒松更茂縣宰初聞名咨嗟爲之久從容語其配夫人曾見否長者二十三次亦十八九青裾長蔽膝荆簪短在首我欲效清獻言不爲人取近於吾邑中選婿得豪右夫人相率意魚蔬薦尊酒屈致二喻來呼名老與壽長曰安壽次曰安老女子當有行詩稱遠父母飢寒日月長蓬華風雨漏大喻前致詞灑淚溼衣袖荷德固已深緘情亦須剖上言親未葬心欲土自負下述妹

未笄婢婢無傅姆還家復獻書自敍貧且陋鉛華世所悅銅臭非吾偶官效閭閻碌碌逐雞狗世無梁伯鸞應嫌孟光醜孔明若再生承女甘箕帚陳義一何高夫人驚拊手至今書稿在光輝射星斗董子慕高風喜曰真吾婦吾親雙白髮吾弟室未授曉言姊妹賢可以相先後五兩幣雖輕意則千金厚輜軒雙造門觀者競奔走女子尙能爾男兒宜自守重聘或不來豈欲終畝畝畜德尙未充高位亦虛受寄語事君者慎勿輕去就成都文類

范浚

浚字茂明蘭溪人紹興閒舉賢良方正以秦檜當國不起學者稱曰香溪先生有集

讀長門賦

阿嬌負恃顏姝好。那知漢帝恩難保。一朝秋水落芙蕖。幾歲長門閉春草。自憐長世等前魚。舊寵全移衛子夫。獨夜不眠香草枕。東箱斜月上金鋪。曉驚永巷車音近。失喜疑君枉瑤軫。臨風望幸立多時。卻是輕雷聲隱隱。年年織女會牽牛。百子池邊侍宴遊。自從一落離宮後。無復穿鍼更上樓。

凌霄花

栽松待成陰。種漆擬作器。人皆笑艱拙。往往得後利。君看植凌霄。百尺蔓柔翠。新花鬱煌煌。照日吐妍媚。風霜忽搖落。大木亦凋瘁。視爾託根生。枯莖無殘蒂。先榮疾蕭瑟。物理固難恃。凌霄亟芳華。衰歇亦容易。

以上香溪集

馬

純

純字子約。自號樸櫟翁。默之孫。紹興中爲江西漕。隆興初以太中大夫致仕。居越之陶朱鄉。有陶

朱新錄

題能仁寺壁

十年衰病臥林泉。鶴鷺羣飛競刺天。黃紙除書猶到汝。固知清世不遺賢。

會稽志。僧宗昂住會稽能仁寺。有故相寓寺中。已而復相。宗昂被敕住持郎官。馬子約題詩法堂壁。

呂愿中

願中字叔恭紹興中知靜江府

宋史秦檜傳靜江府驛名秦城願中率

賓僚賦秦城王氣詩媚檜由此得召

郡守呂叔恭以甲戌季春七日游中隱巖山水膏肓之興未已後兩日再拉機宜劉子思監州朱國輔經屬陳朝彥同至新洞所見愈奇真所謂倒餐甘蔗聊書五十六字

爽壇虛明小洞天巉巖垂乳類峰鋸薰風習習來三面夏雨蕭蕭欠一檐指顧羣山勞應接徘徊歸騎縱觀瞻門前綠水泓澄淨底處應須是谷簾桂勝

蔣 琨

璿字宣卿宜興人之奇從子紹興中以集賢殿修撰知蘇州除敷文閣待制提舉洪州玉隆宮

沖寂觀去南莊數里肇建於有唐逮今數百年中閒衰弊吾家曾祖太傅公爲司出納且主盟興起之相繼累世不墜兵火之後殿宇久廢弗理房舍荒寂璿今再至不勝感歎故作二詩紹興甲子季秋某拜呈

兔井橋邊鵠首橫過逢仍怯近鄉情路人失喜交頭語鄰犬何知掉尾迎重到雲房驚落寞直須金闕早崇成百年香火追先志始信吾宗世濟榮慣見琳宮全盛時竭來荒梗倍傷悽虛堂不復瞻遺蹟自注先考通奉書壁在八蔣院今不復存敗壁纔容覓舊題自注伯考樞密太師題三史院僅留數字帝傳前修皆架雙雲孫後裔合攀躋興衰補弊應商略徒倚脩廊日

欲西式古堂書考

丁宣

一作卜

宣字宗旦延陵人紹興中處州通判

仙都山

世上洞天三十六縉雲第二十九區古木參天駕雲屋總真靈跡號仙都獨峯壁立三千尺凌空聳翠屹然孤仰瞻絕頂煙嵐際曾開菡萏名鼎湖舊說軒轅駐車轍雲輶風馭經此涂石釜烹煉丹砂就乘龍帝鄉在須臾紫虛碧落超塵世侍臣無路攀龍鬚唐朝天子仙李裔德格天心來瑞符祥煙嘉氣慶雲布山中九轉萬歲呼步虛一作欄對峙雲斷續東西互竦高下殊澗邊幽徑登鳥道上有鏡巖如方壘崖中乳水瀝嵌罅滴石成穴如仰孟水一晝夜斛加半潦不泛溢旱不枯魯望曾記周景復絕粒餐霞黃老徒棲真妙入懸珠會八十年餘隱此居千古寥寥桑海變仙跡縹渺還有無石門瀑布雖云好此閒殊甚未易居特然造化鍾神秀虎頭妙手亦難圖仙都山志

胡升

升字子上括蒼人紹興閒官湖北提舉

仙都山

鼎湖不可見巍然但孤峯特立亘萬古氣壓諸山雄黃帝久得仙游行跨飛龍至今世俗傳尙指筆路通頗如昇天檜追求白鹿蹤常言貴荒唐厥見真兒童顧惟此山奇實宜仙所宮水聲來冷風和以萬本松

客枕久未穩。笙簫滿虛空。頗疑九成音。不在二典中。但恐蚩尤旗。瞞瞞舒長虹。雖能獨不死。忍視斯民窮。君看涿鹿戰。萬古蒙其功。鼎湖何足道。帝德彌蒼穹。仙都山志

程元祐

贈朱童子虎臣浮梁人。年九歲。紹興閒武殿試。十二矢中九的。講孫子兵法諸葛八陣圖。賜金帶武狀元。補承信郎。

我聞汪鑄生列國。能執干戈衛社稷。孺子可教繫復誰。張良授書爲帝師。寥寥厥後不復繼。棘門老將反兒戲。邇來忽得朱虎臣。九歲知兵及古人。僕姑十上九破的。玉帳七書咸誦臚。壘石布作常山蛇。指陳八陣橫。復斜天姿安勇亞二子。腦脂壯士應羞死。虎生三月定欺牛。勿謂渠小將何求。志在奇功平禍亂。自許多益辨。欲造天闢試所長。中興君相正明良。拔萃爲將上不惜。好獎此郎明勸激。凌烈九歲初無謀。猶呼虎子封亭侯。觀君頭領合食肉。膽大于軀早驚俗。皇家祐武喜逢時。洗眼行看得意時。饒州府志

張表臣

表臣字正民。右承議郎。通判常州。與晁以道遊紹興中。爲司農丞。有珊瑚鉤詩話。

觀高郵寺壁曹仁熙畫水

曹生畫手信有神。豪端風雨生瀟雲。波濤不合來翻屋。鯈鰐何須欲噬人。湯湯此水勢方割。陽侯鬱怒馮夷搏。鼈鰐鯨吐海岳驚。霧塞雲昏光景薄。開元將軍愛驛驛。權奇滅沒隘九州。時危此物豈易得。寫此尙可銷人憂。未有乃孫能畫水。逋客見之心欲死。雷奔電擊走中原。魚怖龍愁寧忍視。先生道眼高崑崙。聊將妙語破迷津。中流險絕待舟檝。四海浩蕩須經綸。我衰甘作淮海客。身脫垂涎頭半白。驚心未定畏崩

湍欲覓平波泛家宅此身端的老江湖雨笠煙蓑是所圖他年但飽揚州米今日寧論甓社珠珊瑚鉤詩話題睢陽雙廟

漁陽突騎滿關東百戰孤城挫賊鋒唐室興亡繫公等九原可作更誰從

珊瑚鉤詩話睢陽雙廟俗謂之五侯廟蓋南雷賈與同功皆受封爵亦作其像于廊廡耳古今歌詠唯王荊公黃豫章爲警策予官宋城題詩自以爲無愧前人

聽琵琶

白鵠潛來入紫槽朱鸞飛去唳青霄江邊塞上情何限瀛府霓裳曲再調謾道靈妃鼓瑤瑟虛傳仙子弄雲璈小憐破得春風恨何似今宵月正高

和陳叔易就晁以道求長松

暫隱嵩高六六峯未乘雲氣御飛龍自餐白石求黃石更採長松寄赤松

句

碧藕連根絲不斷紅蕖著子意何多山塘莫車水梅雨正分龍婺州道中珊瑚鉤詩話

鄭望之

望之字顧道彭城人官吏部侍郎僑居上饒

揮麈後錄。舅氏曾宏父，生長綺紈，而風流醞藉，聞于搢紳。長于歌詩，膾炙人口。紹興中守黃州，有雙鬢小顰者，頗慧黠。宏父令誦東坡先生赤壁前後二賦，客至代謳，人多稱之。後歸上饒，時鄭顧道呂居仁晁恭道俱爲寓客，日夕往來。顧道教其小獲，亦爲此技。宏父顧鄭笑曰：「此真所謂效颦也。」

除夕

可是今年老也無。兒孫次第飲屠蘇。一門骨肉知多少。日出高時到老夫。

清波雜志。鄭顧道侍郎居上饒，享

高壽。嘗見其除夕小詩，親筆云。

何備

備字德揚，龍泉人。紹興甲科。爲吏部郎官。除福建提舉。有玉雪堂小集。

王文孺臘菴

多羨王居士，心閑事事幽。山從天末見，江近枕邊流。春圃千葩秀，霜林百果收。更能窮物理，濠上看魚游。
吳郡志。

王文孺臘菴

一島風煙水四圍，軒多竊窓更幽奇。眼中泉石論溪買，行處壺觴逐境移。勸馬虺隣前日路，寒松偃蹇舊

年枝自嗟老去殊癡絕一月春愁廢作詩吳郡志

李彌正

彌正連江人彌遜之弟官吏部郎兼史館

王文孺臞菴和祝鑑韻

勞車發危坂勸艘失飛湍滔滔櫓子疾走殊未闌鶴仙擺名宦結廬松江干笑拍萍風浮瞬視草露溥圖川不媿輞序谷寧先盤門豈俗駕拒室無哀筆彈按行松菊閒澹然有餘歡蓮巢衆香聚浮天百憂寬秋光斂洲渚暮翠籠峯巒我來挾良朋道故盟未寒鍊顏仰孤標耐久同蒼官終嘗役薪水刀圭卻衰殘吳郡志

徐作

王文孺臞菴

藜覓幽人室丘園隱者居一原青嶂合萬木綠陰疎手把歸田賦腰懸種樹書桑麻連畛秀網罟入溪漁吳郡志

程敦厚

敦厚字子山眉山人紹興閒官中書舍人附檜坐謫

朝野遺記程子山爲中舍時秦檜善之一日呼入內閣坐候終日獨案上有紫綾漂一冊書聖人以日星爲紀賦未有類貞進士學生秦墳呈文采豔麗子山兀坐靜觀幾成誦及晚竟不出乃退子山叵測也又數日差知貢舉乃大悟以此命題乃孫果

選首

王文孺臞菴

壁上煙蘿子。窗前鴻素書。短籬開窈窕。嫩竹轉扶疎。世事霜前葉。聲名澗底樗。柴桑陶靖節。日暮荷歸鉏。
吳郡志

惜海棠開晚

今年春色可勝嗟。二月山中未見花。長憶去年今夜月。海棠花影到窗紗。
海棠譜

題陳閔中畫明皇太真聯轡圖

並轡春風禁籞遊。外閒底事上心頭。騎驢後日嘉陵道。料得君王始欲愁。
高似孫緯略

曾
惇

惇字宏父。紂之子。紹興中守台州。黃州有詩集。

獻秦益公絕句

紹興壬戌既罷三天將議和曾守黃州作

黃泥坂下雪猶深。赤壁磯頭江欲平。驛吏西來聞好語。番人已出蔡州城。

和戎詔下破羣疑。無復旄頭彗紫微。屈指銷兵宜有報。先看長樂板輿歸。
能改齋漫錄

題東湖

三年領客醉東湖。欲去猶攜竹裏廚。誰解挽留狂太守。風荷十頃翠相扶。赤城志。

懷玉知名寺諸峯翠插天凌雲飛略約照水舞蜿蜒。午日孤穿履新涼定著鞭更須煩惠遠小立虎溪邊。

廣信府志

向滄

滄字豐之紹興閒爲萍鄉令有樂齋詞

莞爾堂夏日偶成

槐影參差日轉廊時看野鳥下橫塘閑窗綠映簷簷淨流水紅浮蘭蕕香座有琴觴真道院徑通花木似禪房文楸珍簟珠簾裏與子同消夏日長袁州府志

陳仲平

仲平紹興中知瓊州軍

吏隱堂在瓊州城北隅仲平建李光命名

海山地僻少迎將心逸身閑白日長儘欲吟哦追沈謝不求名迹擬龔黃旋移泉石成雲壑時引笙歌入醉鄉吏散簾垂公事省清風一榻傲羲皇廣東通志

葉黯

黯字晦叔嘗除敕令所刪定官紹興中爲福建帥屬

和洪容齋鎖院作

宋詩紀事

卷四十六

文章萬言抵杯水。世上虛名徒爾耳。我常自笑一生癡。那更將癡笑羣子。大屋沈沈餘百年。到今所閱知幾士。看渠得失自偶然。其間悲喜從何起。君聞我言亦大笑。爲說萬事總如此。缺兩句急須了卻公家事。門外不知春有幾。缺三句飛雨時聞打窗紙。他年萬一復相從。未必從容今日似。

送容齋自福倅滿歸

一門伯仲知誰似。四海文章正數君。何事與予如舊識。由來于世兩相聞。閑官各喜光陰賸。勝地空多物色分。忽復翻然從此去。便應變化上青雲。此地相從驚歲晚。登臨況是客歸時。卻將襟抱向誰可。正爾艱難唯子知。情到中年工作惡。別于生世易爲悲。梅花盡醉清江上。黯澹西風凍雨垂。以上容齋三筆

張昌

昌字師言。紹興中以參知政事出知潭州。

遊真源宮

漠漠山雲閣雨離離澗草搖風。看處行穿空翠。不妨小駐孤筇。

木末輕風索索。雲邊小雨斑斑。行盡丹霞林樾。皖山下看灔山。宋藝圃集

郭浩

浩字充道。順德軍中安堡人。涇原鈴轄成之子。充渭州兵馬都監。紹興中歷金房開達州經略安撫使樞密院都統制。卒贈檢校少師。謚恭毅。

隴口作

隴口山深草木荒。行人到此斷肝腸。耳中不忍聽鸚鵡。猶在枝頭說上皇。

蓉塘詩話。建炎筆錄云。浩按遷至隴口。見紅白二鸚鵡鳴于樹間。問上皇安否。浩詣其因。蓋隴州歲貢鸚鵡。徽宗置在安妃閣。教以詩文。及宣和末。使人發還本土。二鳥猶感恩不忘。浩因賦詩。

陳煥

煥字少微。博羅人。紹興中特科調高要簿。

梅花

雲裏溪橋獨樹春。客來驚起曉妝匀。試從意外看風味。方信留侯似婦人。肇慶府志

李若川

若川字子至。紹興中江南東路轉運判官。乾道初以吏部尚書使金。

途中阻雨

高雲無急雨。飛灑如絲輕。幽人動羈思。冒雨登歸程。風來曉煙亂。雲破春山明。眷言憩荒館。我懷有餘情。壺中載濁酒。飲罷還自傾。酒盡興不盡。關山鳥鳴。

理舟

爲客始逾月。迢迢若經年。晝永空館寂。古木參雲煙。我生聞道淺。未能超世緣。念此方寸地。憂來相縈纏。今晨動幽興。沙岸泊歸船。岸遠望不極。歸思隨長川。

村社歌

清曉鑿鑿鳴社鼓。前村後村走兒女。田家醵錢共賽神。謝神時晴復時雨。案有肴酒爐有香。老巫禱祝躬案傍。願得年年被神福。秋宜稻穀春宜桑。人淳禮簡酒無數。歌笑喧闐日將暮。田翁欹側醉歸來。山頭明月山前路。以上前賢小集拾遺

司馬伋

伋字季思。紹興中官處州通判。淳熙中以敷文閣待制守蘇州。

老學菴筆記。紹興末謝景思守括蒼。司馬季思佐之。皆名伋。劉季高

以書與景思曰。公作守司馬九作倅。想郡事皆如律令也。聞者絕倒。

點易亭在蘇治南園

洞天占勝作新亭。曲檻危簷揖翠屏。四顧風煙入懷袖。一灣溪水抱沙汀。羽人不見論平昔。雙鶴猶存舊典型。幸得官閑成吏隱。何妨續說舊羲經。處州府志

送汪尚書大猷歸鄞

憶昔銓衡地。爲郎得並遊。惟公合明陟。顧我分夷猶。功業行將遂。軒車去莫留。祠庭固誠請。帝眷益綢繆。
日者真奇中。春風畫鵠行。東山須繼起。南浦獨傷情。越岸江山麗。都門祖道榮。里閭高臥際。趣詔逐追程。
寧波府志

克字子高臨海人紹興中爲敕令所刪定官自號赤城居士僑居金陵有天台集

李庚跋云刪定余鄉人
也詩多情致詞尤工

三朝北盟會編紹興七年呂祉節制淮西軍馬辟陳克子高爲參謀子高欣然應其辟葉夢得曰呂安老非取將之才子高詩人非國士也勸止之不從夢得贈以詩曰解談孫破處那厭羽征西克留其家以單騎從軍後附瓊之變終于不免

代王正平從諫掾乞畫凭肩美人扇子二首

道人已悟孩提事棄擲泥兒壞紙鳶聞道近來都識破丹青便面亦輕捐難陀已幻登伽女童子猶參蘇密多正士逡巡不應受可能分供病維摩

跋趙朝議江行初雪圖

我本孤舟蓑笠翁雪崖烟樹一生中如今不向江湖去鬪艦旌旗照水紅

謝曹中甫惠著色山水抹胸

曹郎富天巧發思綺紈閒規模寶月團淺淡分眉山丹青綴錦樹金碧羅烟鬟爐峯香自湧楚客杳難攀政宜林下風妙想非人寰飄蕭河官步羅抹陵九關我家老孟光刻畫非妖媚繡鳳褐顛倒錦鯨乘榛莽忍將漫汗澤敗此脩連娟緘藏寄書篆曉夢生爛斑

曹夫人牧羊圖

日長永巷車音細插竹灑鹽紛妒恃美人零落涇水寒雨鬢風鬟一揮淚柔毛纏纏與人羣兒女恩怨徒

紛紛洞房那復知許事。但畫遠牧連空雲。檞葉飄蕭晚風勁。羖羣相追寒鵠並。短童何處沙草深。族走羣飛各天性。向來鞍馬曹將軍。文采斑斑今尙存。林下美人更超絕。新圖不作五花文。以上聲畫集

瑞香

佳人在空谷。雙星思銀河。契闊不自命。盛時豈蹉跎。娟娟匡廬秀。如此粲者何。幽窗下團圞。微風自婆娑。寂寥千載初。戢戢蓬艾多。何階計方便。千金聘綺羅。赤蘭青篾舫。丁寧護根窠。泥沙亦天幸。扳聯入宣和。誰令蘭蕙徒憔悴。守巖阿。苔溪漁隱著話

陽羨春歌

石亭梅花落如積。吐鯢爛斑竹茹赤。祝陵有酒清若空。煮梗蒸魚作寒食。長橋新晴好天氣。兩市兒郎櫂船戲。溪頭鐃鼓狂殺儂。青蓋紅裙偶相值。風光何處最可憐。邵家高樓白日邊。樓下遊人顏色喜。溪南黃帽應羞死。三月未有二月殘。靈龜可信滌水乾。葑草青青促歸去。短簫橫笛說明年。咸淳毗陵志

返魂梅次蘇藉韻

誰道春歸無覓處。眼齋香霧作春昏。君詩似說江南信。試與梅花招斷魂。老夫粥後惟耽睡。灰暖香濃百念消。不學朱門貴公子。鴨爐烟裏逞風標。漫道君家四壁空。衣篝沈水晚朦朧。詩情似被花相惱。入我香匱境界中。香乘

句

淚眼生憎好天氣。離腸偏觸病心情。贈別

許彥周詩話韓偓溫
庭筠未嘗措意及此

鳥聲妨客夢。花片攬春心。西溪遺話

臨春結綺今何在。屹立巉巉終不改。可憐江總負君恩。白頭仍作北朝臣。三品石 范溪漁隱集話

姚寬

寬字令威。宏弟。嵊人。以父舜明任補官權尚書戶部員外郎樞密院編修官有西溪集。

春晴

風雨惜春殘。新晴爲啓關。白雲歸去盡。還我舊青山。後村千家詩

春暮送碧雲閣黎歸靈巖

歸意太惄惄。逢春去住中。澹香花溼雨。薄影絮行風。覓句愁何許。談元學未窮。因緣知有處。祇莫恨飄蓬。
詩林萬選

天台夜雨

瘴海遠黏天。山城入暝煙。春潮生蛤量。夜雨長蠣涎。燈几花時落。風簾客未眠。平生懷此地。今夕意茫然。
天台山志

古博嶺在越城西

北風獵獵駕寒雲。低壓平川路欲昏。人馬忽驚俱辟易。一聲乳虎下前村。

宿大雄寺在諸暨縣

解榻無凝塵。雲房悵幽素。清寒薄衾枕。微涼散庭戶。夢彼流水聲。鉤簾捲山霧。時與靜者俱。爲擬湯休句。
以上紹興府志。

姚宏

宏字令聲。剡人舜明子。宣和中在上庠。南渡後。初任監杭州稅。調知衢州江山縣。秦檜以宿怨追

赴大理而死。

夢筆驛江淹舊居

一宵短夢驚流俗。千載高名挂里閭。遂使晚生矜此意。癡眠不讀半行書。

庚溪詩話云。

可警後學。

錢端禮

端禮字處和。臨安人。徙台之臨海。惟演四世孫少師忱之子。以恩補官。孝宗朝累除參知政事兼權知樞密院事。出知紹興府。卒謚忠肅。

題米元暉瀟湘圖

畫手自高前輩。雲山已屬吾曹。若會瀟湘物色。便合醉讀離騷。郁氏書畫題跋記

劉岑

岑字季高吳興人高宗朝官徽猷閣待制嘗知鎮江

皇宋書錄劉公能書縱逸而不拘舊法蓋有自得之趣有娑噭齋號柯山

齊東野語紹興以來文散階皆有左右字以別有無出身惟嘗犯讞者則去之劉季高得罪秦氏坐讞廢後復去其左字季高署銜不以爲媿也

貞女祠

貞女已云遠芳名聞至今烟波瀨江上松柏古祠深暮色留殘照悲風動遠林謫仙文不死讀罷爲霑襟

李茂之

茂之邵武人忠定公綱之子自稱蕭然羈客

侍家君詣洞霄宮道出天竺山紀興

九里松陰路三天竺國山日蒸巖霧紫花點石苔斑谿盡寺方到雲深僧獨還吟行隨杖履蹤跡出人間

天竺寺志

劉

韞字仲固軒之弟以門蔭入仕

建寧府志仲固歷倅三州典二郡歸隱于崇安縣南所居有家山堂拙致堂昉齋仙人方丈龜峯樓月波臺積芳園藥圃春谷香界晚蔬秋香徑曲池軒前村秀野朱晦翁爲作十五詠以紀其勝

場南寺

曉起陰霾喜絕收。急忙扶酒爲春留。落花千點野亭寂。啼鳥一聲春事幽。施食臺高禽易啄。長明燈暗鼠潛偷。山僧摘茗吹茶竈。留客殷勤學趙州。建寧府志

劉子翬

子翬字彥沖號病翁崇安人。翰季子以蔭補承務郎除通判興化軍尋以宿疾辭歸與胡憲劉勉之講學學者稱爲屏山先生有集

吳傅朋游絲書歌

圓清無瑕二三月時見游絲轉空闊誰人寫此一段奇著紙春風吹不脫紛紜糾結疑非書安得龍蛇如許耀神蹤政喜繫不斷老眼只愁看若無定知苗裔出飛白古人妙處君潛得勿輕漠漠一縷浮力遒可挂千鈞石眷子弟兄情不忘軸之遠寄悠然堂謝公遺鬢凜若活衛后落鬢搖人光翻思長安夜飛蓋醉哦聲落南山外亂離契闊四十秋筆意與人俱老大政成著腳明河津外家風流今絕倫文章固自有機杼戲事豈足勞心神

容齋三筆吳傅朋游絲書賦詩者以百數劉彥沖古風一篇尤爲馳騁痛快且卒章含譏諷正中傅朋之辭

聞箏

月高夜鳴箏聲從綺窗來隨風更迢遞繁雲暫徘徊餘音若可玩繁弦互相催不見理箏人遙知心所懷

寧悲舊寵棄。豈念新期乖。含情鬱不發。寄曲宣餘哀。一彈飛霜零。再撫流光頹。每恨聽者稀。銀甲生浮埃。

幽幽孤鳳吟。衆鳥聲難諧。盛年嗟不偶。況乃容華衰。道同符片諾。志異勞事媒。棲棲牆東客。亦抱凌雲才。

遊朱勔園

晨暉麗丹極。翼翼侔帝居。向來堂上人。零落烟海隅。聯翩際時會。振跡皆刑餘。閨帷尙帝主。阜隸乘軒車。流威被東南。生殺在指呼。樓船載花石。里巷無袴襦。至今江左地。風雲亦嗟吁。叨榮已過量。受禍如償逋。荒涼戟門路。尙想冠蓋趨。客船維岸柳。鄰人罾池魚。徘徊極幽觀。曲折迷歸途。夜月局綺戶。春風散羅裾。繁華能幾時。喪亂實感予。曹鄧予何譏。此曹真人奴。

汴京紀事

空嗟覆鼎誤前朝。骨朽人閒罵未消。夜月池臺王傅宅。春風楊柳相公橋。
篤耨清香步障遮。並桃冠子玉簪斜。一時風物堪魂斷。機女猶挑韻字紗。
萬炬銀花錦繡圍。景龍門外輭紅飛。淒涼但有雲頭月。曾照當時步輦歸。
橋上游人度鏡光。五花殿裏奏笙簧。日曛未放龍舟泊。中使傳宣趣鄆王。
盤石曾聞受國封。承恩不與侍臣同。時危運作高城礮。猶解捐軀立戰功。
梁園歌舞足風流。美酒如刀解斷愁。憶得少年多樂事。夜深燈火上樊樓。
倉黃禁陌夜飛戈。南去人稀北去多。自古胡沙埋皓齒。不堪重唱蓬上聲蓬歌。

瀛奎律體云

不減唐人

題胡原仙山居

寂寂臨湖屋。湖風爲掩門。
鳥聲幽谷樹。山影夕陽村。
好事長留客。雖貧亦置尊。
平生枯淡意。出此有誰論。

泊舟

莽莽荒茨岸。回回亂石灘。
雨寒收市早。風急泊舟難。
寓縣兵猶鬪。乾坤網正寬。
殷勤囑龍劍。莫久臥波瀾。

開善寺

寒聲蕭蕭霜葉秋。石路磽確穿林幽。
雲橫遠岫若平斷。風約小溪如倒流。
偶經名藍亦終日。喜有勝士同茲遊。
移牀果茗咄嗟辦。杖屨欲歸仍更留。

悠然堂

在崇安潭溪

吾廬猶未完。作意創此堂。
悠然見南山。高風邈相望。
賓至聊共娛。無賓自徜徉。

宴坐巖

在潭溪

青青櫟樹林。下蔭蒼蘚石。
幽人宴坐時。懷抱忘其適。
不見暮樵歸。寒山雨中碧。
以上屏山集

陳晉錫

晉錫、明州人。紹興十二年進士。

題衆樂亭

禪襟百慮不容侵。勝概乘閒偶訪尋。趺坐豈無觀水術。
字金郢曲調高人寡。和微生何敢綴雄吟。乾道四明圖經